

泰州志卷之六

人物志

惟百世師服膺安定地靈人傑山鳴谷應忠孝節義後先掩映於焉表章聿光史乘志人物

理學

胡瑗字翼之先世京兆人遷居海陵少時偕孫明復石守道讀書泰山攻苦食淡幾二十年得家問有平安二字卽投澗中不復展讀四方學徒從遊甚衆景祐初更定雅樂詔求知音者范仲淹以瑗薦白衣對崇政殿授試秘書省校書郎時承用周樂

泰州志

卷之六

一

其聲高不合中和太祖嘗詔下一律而未皇制作後命李照等修之瑗初得對崇政殿辨照等所修樂非是詔令改作與阮逸同較鐘律分造鐘聲各一簣以一黍之廣爲分以制尺律又以大黍累尺小黍實龠丁度等以爲非古制罷之及會秘閣議按周禮以正鐘律用上黨黍列爲九等纍其中者爲尺尺定而律成驗之比舊下一律於是撤前樂而新之用於郊廟又令作皇祐新樂圖記布之天下蓋積二十年而後成其間同議論皆貴官老儒相詆正者豈一二哉康定初元昊寇邊仲淹



陝西僻丹州推官實與府事建議更陳法治兵器
開廢地爲營田募土人爲兵給錢使自市勁馬漸
以代東兵之不任戰者雖軍校番首亭長廝役見
輒延以酒訪邊事初武人以儒懦少之後乃稱服
尋移密州觀察推官丁父憂舉其族之亾於遠者
九喪歸葬復除遷保寧軍節度判官主蘇湖學訓
人有法科條纖悉備具以身率先雖盛暑必公服
坐堂上嚴師弟子之禮時方尚詞賦瑗獨立經義
治事二齋倡明體適用之學如治兵治民水利算
數類各有齋瑗嘗言劉夔善治水夔興水利果有

功慶曆中建太學有司請下湖州取其法著爲令
又召教授諸王官病辭免以太子中舍改殿中丞
致仕皇祐驛召會秘閣議樂除大理評事兼太常
主簿辭不就歲餘授光祿寺丞國子監直講仍與
議樂樂成改大理寺丞賜緋魚當爲國子直講海
內學者踵至大學不能容假旁官舍寓焉禮部歲
舉士瑗弟子居十四五高第者知名一時餘散四
方皆循循雅飾不問而知爲胡公弟子也嘉祐元
年遷太子中允天章閣侍講仍治太學旣而疾不
能朝以太常博士致仕比去京諸生請闕下乞留

者累日公卿祖送都門車軹至不得前莫不惜其行也就其子節度推官致康養於杭州四年卒於官舍年六十有七耳詔賻其家諡文昭君子謂白河汾以後能立師道成人者必以瑗爲首稱後世稱安定先生有明嘉靖中從祀孔子廟廷所著有易傳周易口義易繫辭說卦尚書會解洪範解春秋要義春秋口義論語說中庸傳吉凶書儀樂府奏議樂圖記武學規矩資聖集言行錄百餘卷行於世

查許國字匪躬以奉議郎贊帥幕將上道矣而厭爲

秦州志

卷之六

三

吏僑居荆南開門教授其經指畫訓化者往往登科第忽一日令具浴已復盥醜意象如平時顧門弟子取管幅來疾書曰七十三年聖師之壽許國何人敢繼其後唯是平生恪遵善誘故從門人啓予足手卽端坐瞑目家人驚走環泣許國麾令去留侄與孫侍弟子前曰先生將逝矣此時有何景象頗怖畏否卽舒兩手曰此心閒而無事復筆詩一絕及戒母得用僧與火寓錢時服上加朝服事從簡命弟子誦孝經擲筆拱手而終許國素工書札此數紙尤迺勁弟子鑱之石云世人常以釋門

稿衲而達生死而不思吾儒教中曳杖易簣之際甚閒而不亂彼其縛於愛貪而驚懼隨之者以學力未至耳觀許國之逝了了如此豈出於釋氏者哉孫籥受學於許國廷對中首甲軋道中攝貳夏卿出典大藩而卒

儲燿字靜夫生而秀穎讀書一目成誦九歲善屬文弱冠御史婁謙見其文大奇之謂他日必魁天下鄉會試果俱第一廷對亦二甲第一人初授南考功主事歷員外郎郎中冢宰耿九疇知燿有宰輔器轉北考功嘗劾一官得實九疇忽欲改評燿不

泰州志

卷之六

四

從且云公所執何異王介甫時兩侍郎並坐省中九疇大慙良久曰我固知君然非我其能容也在考功三年持正議臧否不洧嘗薦張吉等五人可任諫職論救科道龐泮等不宜以言事下獄又上言乞令史官紀注言動如古左右史尋進南太僕卿馬政興革一準周官之法本郡寄養宜州馬奏蠲八百匹民賴其利已陞僉都御史總督糧儲首釐正倉庾宿弊條上應議數事省糧戶及京邑供給之費入戶部爲侍郎以逆瑾故辭疾歸越七年詔起仍戶部改吏部衆方望柄用命不待矣臨卒

友人顧璘王韋往問後事不能言猶舉筆作國恩
未報親養未終八字無一語及家事年僅五十七
賜葬於城西九里溝遣官諭祭蓋制恩也諡文懿
欽淳行清修與物無競而自守介然不可奪風度
簡雅人皆慕之爲文森嚴有法度尤邃于詩冲澹
沈蔚凌轍晉魏所著有柴墟文集垌野集奏疏若
干卷世珍重焉

王良初名銀後師事王文成公爲改名良字汝止號
心齋安豐場人也生而長九尺隆準廣顙丰骨奇
古有珠在掌左一右二自幼從塾師受大學章句

秦州志

卷之六

五

而家窶甚弗能竟學弱冠父使治商往來齊魯間
已又業醫然皆弗竟也嘗過闕里謁孔廟及諸大
儒從祀瞻注久之太息曰是聖人者可學而至同
輩駭其言及歸取孝經大學論語日誦讀置袖中
逢人質所疑義有得必見之行父役官府晨起以
冷水盥良痛哭曰身爲子而令親天寒盥冷水平
何用人子爲出代親役入掃舍奉席晨省夜定如
古禮惟謹忽一夕夢天墜壓身日月列宿失序奮
臂托天手自整布如初頓覺心地洞徹悟性無礙
而天地萬物爲一體題其壁曰正德六年間居仁

三月半按禮經製五常冠深衣縗經執木簡行則
規圓矩方坐則焚香嘿識聞文成公倡學洪都往
謁持海濱生刺踞上坐與語良知及堯舜君民事
業大悅居數日有省曰吾人之學飾情抗節矯諸
外先生之學精深極微得諸心者也乃竟執弟子
禮文成語人曰吾持萬衆擒宸濠未嘗動心今日
爲此生心動矣良益自任駕一招搖車將遍游天
下所至以師說化導人聚觀聽者如堵顧以良言
多出獨解與傳註異且冠服車輪悉古製咸目懾
之會文成以書促還會稽乃復遊吳越間自是益

敘圭角就夷坦因百姓日用以發明良知之旨究
極於身修而天下平大抵良之學以悟性爲宗以
反己爲要以孝弟爲實以樂學爲門以太虛爲宅
以古今爲旦暮以明學啓後爲重任以九二見龍
爲正位以孔氏爲家法其言曰只心有所向便是
欲有所見便是妄既無所向又無所見便是無極
而太極又曰知愚夫愚婦與知與能與鳶魚飛躍
同一活潑潑地則知性矣語持功太嚴者曰君子
不以養心者害心有問放心難收者呼之輒應而
起曰汝心見在更何求乎曰卽事是心更無心矣

卽心足事更無事矣郡守召辭以疾謂門人曰致
師而學學不誠矣往教教不立矣不往是不仁也
必往是不智也此道也或問先生何不仕曰吾無
往而不與二三子者是某之仕也或勸之著述不
應洪御史垣構舍居其徒劉巡撫節吳御史悌俱
疏薦不報大學士趙貞吉誌墓以爲契聖歸真生
知之亞文成公卒于官良迎喪桐廬營其家良年
五十餘學愈深造四方來負笈者甚衆及寢病夜
有光燭地達旦語門人曰吾將逝乎諸子泣請後
事顧仲子璧曰汝知學吾何憂無一語及他事遂
賦海內傳爲拱璧矣

林春字子仁號東城其先閩人以從戎隸泰州守禦
所因占籍焉少孤力學恒以竹筭注膏繫衣帶間
惟所適則出膏於筒燃火讀書父出奉漕役獨與
母妻織屨夜讀不少休已受學于知州王臣先儒
王良二君故王文成弟子因此始窺致良知之學

其爲文不事奇博，豐豐務發揮，所自得。戊子領鄉薦，壬辰舉會試第一，選戶部主事。歷遷吏部文選郎、吏部故矜崖岸，率自尊重，人亦多猜忌者。春色愉氣和，不以行能先人。在諸寮中，恂恂下之，惟謹與同志挾衾被櫛，具往宿寺觀中講學，竟夕以爲常。後以母癰歸養三年，未嘗以事干州郡。時齏院洪垣見所居湫隘，欲代爲鼎新，力辭曰：「學宮春發跡地也，修之愈於春室矣。」洪高其誼，發二千金修學人，以爲賢與鄉人處，恂恂如故。儒生時往萬壽宮故讀書處講學，以其間忝安豐，就師良叩所疑。

義每往必喜，以爲聞所未聞。母病間，補文選郎中。有州守某黷而虐，力請于部，尚書黜之。當赴官泊淮，淮守某以次謁諸過客，始及其舟，供帳又薄。後淮守入覲，考下當遠調，春獨薦其廉靖，懇留之。其無遠嫌怙勢類，此選曹多事，日夕勤瘁，竟卒。年四十四，出其橐，僅四金，不能棺。寮友賻助，得殮。都人爭憐惜焉。所著有東城文集，行世。皆有益身心語，可以覘學問矣。

王璧字宗順，良之次子。學者稱東崖先生。生九齡，隨父之文成公所，士大夫會者千人。公命童子歌多

嘖嘖不能應壁意氣恬易歌聲若出金石公詫曰
吾固知越中無此兒也輒奇而授之學踰十年歸
娶已之越復留者八年所師友相陶汰氣竦神涌
耳新目明繇派流而遡其源沛如也父坳壁望曰
隆四方聘以主教者沓至曾謂麻城耿定向曰道
者六通四闢之塗也藉謂我有之將採取焉而又
曰我能得之則已離矣聞者大賞其言至金陵與
多士講習博問精討靡不恢其欲以去楊道南紀
之云東崖子至而論學也問學何以曰樂又問曰
樂者心體也有不樂非其體也吾求以復之而已

然則如之何而後樂曰吾體自樂曰如之何而後
樂是加於體之外也然則學可廢乎曰否莫非學
也皆以求此樂也樂者樂此學學者學此樂吾先
子蓋言之矣樂有辨乎曰有所倚而樂者樂以人
也喪其所倚則不樂無所倚而樂者樂以天也舒
慘失得忻戚榮悴無之而不可曰無倚而樂非樂
道耶曰樂卽道也而曰樂道是床上之床也學顧
止此乎曰孔顏曰不改其樂曰樂在其中於此蓋
終身焉而何以加諸然則何以曰憂道曰君子非
以外物爲戚戚也所憂者道也憂道者憂其不得

乎樂也云爾平生孔孟之言未嘗一日去于口其推而與世共也未嘗一日忘于心而大意具此矣居恒不煩繩削動應矩矱非其義千金至前不一盼也喪祭必遵古禮建先祠置祭田月朔率子弟肅衣冠致奠隨考一月中所爲竟日乃罷居恒嚴取予敦孝弟聯宗族關於行誼者毛髮必謹宛然先人之法度言者疏薦于朝部擬召用壁堅臥自如臨終屏婦女毋使近諭門人子弟親賢講學語不及私

舊志有崔殷梅月唐珊三人皆以村中老學究冒

稱理學儼然躋於安定心齋東崖子仁四先生之列又取甲科右秩之孫應鰲亦以道學名無論叔敖衣冠絕不相似矧應鰲貴州產也其舛謬不經如此故駁正盡汰之惟唐珊善行可嘉傳亦云一門賢孝許其植紀維風今採衆議仍入高行傳

外史氏曰余聞之李贄曰陽明先生中弘治十二年進士時文懿已太僕少卿居然前輩而往來問學若弟子以是知其愈不可及也故李氏名臣傳獨標其出處大節輒理學文懿而謂心齋其聞風興起者迨陽明卒而心齋始授徒淮南心齋歿而東崖望日隆

四方聘以主教者杳至東崖之學雖出自庭訓然心齋在日親遣之事龍谿於越東與龍谿之女月泉老衲矣師友淵源所得更深邃也子仁其北面心齋者也故論學輒曰吾師心齋說如是推及門馴謹者必以子仁爲第一而安定之學主於明體達用至今談經義治事者猶以蘇湖爲宗

名賢

吳呂岱字定公少爲郡縣吏避亂南渡詣吳主權召署錄事出補餘姚長時會稽賊呂合秦狼等爲亂吳主以岱爲督軍校尉與將軍蔣欽等將兵討之

泰州志

卷之六

十一

遂擒合狼定五縣拜昭信中郎將督孫茂等十將取長沙三郡後代步騭爲交州刺史高涼鬱林桂陽諸賊以次討平遷安南將軍封都鄉侯時交趾太守士燮子徽逆命岱督兵三千人襲擊破之進封番禺侯又代潘濬領荊州會廖式作亂諸郡騷擾岱進討斬式還鎮武昌岱清身奉公所在可述初在交州歷年不餉家妻子困乏吳主聞以讓群臣曰呂岱出身萬里爲國勤事家門內困而孤不早知其責安在於是加賜錢米布絹歲有常限始岱親近吳郡徐原薦拔官至侍御史原性忠慝好

直言岱有得失原輒諫爭又公論之或以告岱岱
嘆曰是我所以貴德淵也及原死岱哭之哀曰德
淵岱之益友今不幸岱於何聞過談者美之年九
十六卒遺令殯以素冠疏布巾禭葬送之制務從
儉約子觀皆奉行焉

按岱墓在如臯縣時未置邑故舊志稱海陵人今爲改正

宋

查陶字大鈞其先徽人宋太祖時爲太常丞與諫
議大夫李符爭議事符理屈陶由是知名除監察
御史知南雄州俗雜徭徼陶至風俗丕變謂庾嶺
僻遠疏諸朝置南安軍嶺北以便輦運遷秘書少
監知審刑院卒陶與從弟道相友愛自江南平士

泰州志

卷之六

十三

族流離兄弟盡皆收卹聚食常百數人異姓貧困
者亦分俸周給居進德坊十三年與親友談論自
娛未嘗造請有司清白之操嶠然初應舉至襄陽
逆旅見女子端麗詰所從來乃故人女也遂以行
橐求良謹者嫁之因而罷舉又嘗於旅邸床下獲
金釵百隻留待求者其人至盡舉以付還感謝而
去

查道字湛然年十六中南唐進士宋平金陵奉母渡
江居梓里以孝聞母病思鰾羹方冬道泣禱鑿冰
得鰾尺許以進母病尋愈端拱初再擢第以秘書

丞知果州時寇黨何彥忠等尚依險自固詔諭之未下咸請發兵殄之道曰彼已懼罪欲延命須臾耳遂微服單騎攜數卒直趨賊所賊驚悉持滿外嚮道神色自若踞胡床而坐諭以德意賊相語曰查果州以仁義撫此境得衆是寧害我則相率投兵請罪道悉給券令歸農驛奏璽書褒諭咸平四年代歸出知寧州會舉賢良方正李宗諤以道名聞召拜左正言直史館六年拜工部員外郎充度支副使賜金紫有故人卒質女于人道爲贖之嫁士族薦紳間服其義卒年六十有四有文集二十

卷

周孟陽字春卿先成都人曾祖敬述知秦州家焉孟陽登進士爲王宮教授英宗居藩邸禮重之會除太宗正之命力辭前後十八表皆孟陽爲文又從容論古事以諷英宗竦然起拜及仁廟以英宗爲皇子遣中使宮嬪趣召且令宮長宗諤往請英宗猶堅臥不起宗諤曰召周教授宜可動孟陽至力勸入侍意乃決及卽位除直秘閣數引對訪以時務後召至隆儒殿知無不言孟陽尤謹密所論事人無知者上數宣諭將不次進擢常頓首懇辭遷

集賢殿修撰兼侍講神宗初立孟陽奏事上望見
哭左右皆感泣下旣而上疏陳五事謂好任耳目
以私察中外窮詰奏對而或加阻抑密有啓沃而
宣露於人與夫祖宗之訓願無輕改土木之役願
賜休息言極剴切拜天章閣待制年六十九卒近
臣以聞兩宮惻然命官其孫仍賜白金千兩

潘汝一字古玉貫經史善文章靖康初道君南幸童
貫等勸渡楊子汝一至江都上書乞廻鑾以慰天
子之思建炎間聞許容攝州事迎敵西郊不食者
數日敵將遣人誘之罵曰吾生於宋死於宋闔門

泰州志

卷之六

十四

爲忠義鬼含笑入地矣容欲作賀僞齊表召之不
往敵又命容擇文士草檄遽迫而遣之汝一以死
拒時敵多取城中圖書或求其所著文以獻汝一
指篋曰此豈可充鷄林庭幣也紹興中以進士久
次得官更歷州縣卒有羣玉府鳳池集共二十卷
周麟之字茂振敬述五世孫也少負邁才策紹興進
士以中博學宏詞第一教授宣州不赴授大學錄
尋擢中書舍人侔徽州明年召對授著作兼禮部
郎翰林學士使金金主爲殊禮厚遺還上嘉美之
除權吏部銓綜無失嘗陳利害四事其於糾蠹繩

吏尤切上從容曰卿在銓曹効力巨細必聞由是眷顧愈厚是秋拜同知樞密院明年夏敵遷都復銜命往賀未陛辭會天申節慶使至持嫚書且索兩淮襄漢地中外忿之麟之因奏猾寇意可卜宜練甲申傲使不當遣上曰卿言是也彼將割地何以應之對曰講信之始分封畫圻應有載書願出以示請將自塞使者果無語麟之又上疏極諍曰臣聞事有必至理有固然昔日之和戎今日之渝盟不待上智而後知矣若彼有速亡之形我有恢復之冀在陛下審處而應臣當竭志畢力贊成事

泰州志

卷之六

五

幾使搖尾乞憐復下穹廬之拜臣竊恥之疏入謫秘監分司南京居瑞州孝宗立復故官麟之有疾請復左中大夫尋卒年四十七麟之學識弘富爲辭令得體外制千餘篇名海陵周公文集

周穉字仁熟敬述五世孫少有遠度王安石一見奇之元祐初蘇軾舉爲鄆州教授穉上疏乞以王安石石配享神宗朝士愕然軾卽自劾舉官不當議雖不合然識者猶取其拳拳師表之地久之擢著作郎兼崇政殿說書陳瑩中力薦于上權起居舍人會咸陽民獻玉璽朝議欲因以收元穉言所獲者

秦璽耳以之改元甚無謂哲宗曰卿其與宰相等
議種退爲別白言之卒不能奪由是忤政府因鄒
道鄉之出陷以罪貶寧海軍僉判徽宗嗣位遷鴻
臚少卿自是補外爲桂帥時有黃璘者以南蕃洞
主歸義累擢觀察使提舉醴泉觀妄覲賞典誘蕃
商詐爲文理使人牂牁岸等爲其國主段和譽進
貢種劾其僞蔡京怒奪集英殿修撰罷領宮觀越
五年蕃商僞使以分賜不均爭相攘奪事聞璘竄
死徽宗諭執政除種次對王黼沮之復右文殿修
撰知廣州蕃舶抵郡象犀香珠之屬一無所受終

秦州志

卷之六

六

任不至舶務其歸也部人賦詩送行有三年清似
鏡之句靖節元年卒幼子方崇紹興中歷三院御
史擢禮部侍郎

周秩字重實與兄種同舉進士歷官有聲紹聖中當
國者革元祐政痛以法繩下時文彥博子及甫與
劉唐私語及時相有當族誅之語讐卒告變上遣
朝臣覈實命下卽以兵防二家悉囚其子弟召秩
爲京西轉運使俾推治之當國者遣人謂秩還朝
當以大司寇相處及奏對哲宗面諭曰彼欲盡誅
大臣以下將置朕何地秩到洛察其實無他乃一

時憤語譏議時相原不及乘輿非有異意事乃寢
大忤時相意仕終集賢殿修撰贈徽猷閣待制

明朝

張文字存簡發解第進士初任比部郎奉命錄囚

畿內多所平反有馬平兒者報父讐抵罪文上疏
謂君父之讐必報反覆累百言讀者感動平兒遂
得免死陞浙江副使伸雪冤枉全活甚衆平生自
奉儉約如寒士周人之急則罄所有弗吝尤嗜學
不倦有雜稿數卷散佚矣

王讓字時遜歷三縣尹有奇績復知洪雅縣縣初建
城垣公廨俱草創讓隨方規辦與民同畚鍤間出

秦州志

卷之六

七

已俸犒賞未期工竣民不告勞方建學時忽履地
心動指其下有碑隨掘而獲焉視碑陰有他日王

侯重立語

見四川通志

興勵學校勸課農桑暇則循行

阡陌疆理田稅無不均平數年戶口增至五千餘

麥產五岐禾穎九穗瓜茄一蒂而結十實

見嘉定州志李

東陽有五端詩序

以老辭職邑民塑生像於遺愛樓朝夕

尸祝歸後猶萬里走秦移文問安卒入鄉賢祠

陳相字子隣初守蒲州疏請王府祿米每石折銀一

兩民皆稱便遂爲定制值歲災大發賑給拾幼穉
棄道路者數百悉全活之陞民部郎遷台州知府

定策擒巨寇拜廣西叅政致仕台人立去思碑名宦祠所著有蚓鳴稿及同儲文懿倡和集

徐蕃號北屏由給事遷藩臬拜中丞官至工部侍郎爲給事抗疏論逆瑾械繫京被杖幾殆削藉放歸爲江西少叅寇亂會朝廷徵兵督勦崎嶇兵間十餘年坐不戢功僅贖罪爲浙江學副抑浮靡崇理學爲山西方伯振頽剔蠹文以禮義爲中丞出撫鄖襄清查流民得二十餘萬戶路絕豺狼客旅無警有去思碑爲侍郎提督易州廠以疾乞休蕃性簡淡寡嗜好居處服饌取給而已見其子治第頗

整肅之素無妾媵其夫人購少女備巾櫛蕃見卽命具裝遣還其家有古人風

王紀字理卿正德庚午辛未聯捷筮仕進賢令有洞蠻姚源古恣殺掠爲害甚劇紀身抵其穴討平之縣治故無城請令犯科者贖金計築今賴爲保障在邑三年滯獄苛政清革殆盡進南工給事中首列建皇儲謹大祀及邊防時務馬政屯田疏凡四十餘上內請蠲本所無田子粒迄今所中藉庇宸濠之叛畢太監謀內應紀與喬大司馬策縛之慷慨倡義誓不俱生賊平叙功有賜及武廟南巡

疏乞還後爲讐者所中謫丞嘉善陞武城令會漚
沱河決捍治有功尋擢高唐州守凡十四月以憂
去士民懇呈當路立祠立石服闋補河間未幾僉
事陝西以檄賑關內積勞卒於官

儲洵字乎甫懽猶子由進士歷官兵部郎中以讒左
遷守沔陽卽鉏剗奸蠹其尤巧黠者置之法歲饑
積逋賦所司督併洵下令悉停止民賴以安沔田
多水患疏請修築河防言甚剴切童太史修沔志
載洵良牧傳稱其河防一疏萬世之利惜未之行
也遷台州同知陞福建僉事巡漳南漳舊多盜洵

秦州志

卷之六

九

設條約督捕時述寇黃滿者剽掠郡縣焚劫庫獄
致煩奏勦已而亡命入廣復據舊穴流毒洵潛布
兵民密授方畧一朝撲滅餘黨悉靖顧以守正不
能附時遂致仕歸闕雉山園日讀書其中所著有
野集編輯革除錄博采靖難諸臣事畧題其首日
江河伏流及卒門人私謚爲貞文子

徐嵩號小石蕃之子由進士授戶部主政與議興獻
帝大禮忤旨廷杖尋復職未幾陞郎中會考選漕
運軍職甄別允當兩任保定河間知府推湖廣副
使分巡江防時牛首山礦徒猖獗辰衡二府騷然

撫按屬嵩調集官兵擐甲督戰一鼓殲其渠魁反側悉平捷聞賜勞金綺由山西叅政晉方伯督撫順天時朶顏三衛連結哈密聲言入貢將曷不軌嵩委身經畧諭德宣威賴以欵服先是朝廷從建議者添設總制而憚人胡守中以性貪狠不法爲言官劾奏下廷尉當路修私憾者因守中事誣以冒破逮理三年案牘具存駁覈明白守中伏法嵩竟編戍踰年以差假歸輿論寃之

沈良才字德夫十六游庠寔甚時富民劉欽出粟賑諸生獨却不受直指李東校士首拔良才檄學官

秦州志

卷之六

三

爲備禮冠婚郡守待如上賓遣其子師事焉由進士讀中秘書授給事越盧綱孫存互訐奏才往勘伸綱斥存一切株連皆釋人稱明允及都吏垣值上以祝釐相分宜疏論其貪污姦諂不宜驟膺簡命未報已而丞廷尉晉少卿敵突入畿輔烽火徹齋宮上怒下丁司馬汝夔獄良才與司寇都御史傅輕比失上意杖之庭幸無恙以御史大夫建節鄴陽四方亾命刀耕火種礦徒白日行掠良才寬繇省刑編戶安堵而勤習麾下士分布要害出不意禽斬渠魁諸脅從咸與赦除歲大祲發郡國倉

層以賑饑所全活約萬計陟左司馬佐其長運籌
帷幄每赤白囊奔命書至應之如嚮時敵駘籍東
南天子命良才視師趣治行柄臣趙文華自以
疏請往嵩附會他事遂罷免最後家孫道隆以夔
州滿別駕考上書訟祖生平忠直大概下家宰議
具如言爲復原職梓有文集十卷冲夷多致及讀
奏疏所彌射宜權貴眈眈側目矣

王陳策字師董由進士兩爲令歷官工部郎出守廣
信惠政非一其尤著者傷夏文愍遇害而嗣斬然
訪有一子在襁義僕竊逃得脫時寄寺爲僧策託

泰州志

卷之六

五

故往訊卽得已十四齡矣頂髮尚存卽輿至衙齋
集鄉紳曉以大義隨出之座間鄉紳無不垂涕一
時有許姻者策納幣擇日備鼓樂具文同遣孤往
告文愍家廟士論躋焉讀廣信生祠碑記中子之驥庠生工
韻語今鈔有遺稿

凌儒字真卿別號海樓中嘉靖癸丑進士筮仕永豐
令多惠政召拜御史初入臺會分宜以邊警欲修
鄧總督王忬命儒往勘儒力爲申理卽有聲朝宁
出巡鹽兩浙鹽固蠹藪也釐奸革弊商竈賴之時
鄧懋卿以督理鹽法至挾分宜重且以內臺出先

聳恟喝屬視御史儒恥爲屈卽稱病歸病間入朝
建言放宮人遠奄宦清馬政免操軍而薦人材一
事忤旨廷杖編管洎穆皇登極起原官掌河南道
首疏論郭安陽以服未禫趨爰立之命風裁凜凜
歲當計羣吏時新鄭在事多所掣肘儒秉公考黜
一時稱允旋爲監北關鄉試先是聘場中執事等
官主自銓曹御史無往例而儒不少讓太宰銜之
請之徐文貞公卽欲議處而文貞謂儒爲先皇帝
直臣當有所酬緣是補督學遷大理尋擢山西屯
鹽都御史方議設而卽議裁不過假虛銜以示不

用自陳疏上卽論罷矣儒家居絕跡公府至里中
有不公不法者卽奮袂而起爲之理直雪冤猝有
錢變民數千蠶擁或不逞儒曰錢法之變民用私
錢爲患耳立出千金盡鬻民間赤仄民帖然泰糧
六萬有奇四萬屬下河下河地勢卑窪田盡傍高
寶長隄隄一傾田沈水底民或魚鱉乃力請當道
議開丁溪白駒二港二港皆海口洩水處日借李
司理相度疏濬風雨不避水盡洩海民因獲有秋
今日三十餘年誰之賜也他若修學築隄救荒收
正編銀以馬草補料價種種條議多經允行儒去

世已久而里人談及猶思念不置蓋人人有口有心而業爲桑梓計者弘也卒年八十所著有舊業堂集方行世

顧廷對號直齋嘉靖戊午己未聯捷初授平湖縣令減驛馬復塘長濬河渠修城堞一時稱便擢御史多所建白不避豪右先是宣德時以宣城奏虎傷馬暫派泰州寄牧千六百五十匹爲害甚久弘治間儲懽爲太僕奏蠲馬八百匹及廷對視馬政變賣種馬一半鄉人賴之出按江西憲度貞肅處淹獄豁無辜覈成案慎招議疏請以行通省賴以全

秦州志

卷之六

三

活者無慮數萬人後謫判涪州隨陟嘉善令皆未任卒有尹湖末議江右奏疏梓于家他如養不天之妹以成貞聘不言之媳以完配其刑家篤倫世罕企及矣

陳汲字汝汲乙卯丙辰聯第授刑部主事卒于官初觀戶部政奉差解餉至山海關值敵帥擁衆聚圍與守關使者巡城誓師晝夜不息因畫奇計從材官中鑿有蔣武生者可用乃命旦日忽開門以偏師出敵不意貫其中堅嚙指驚以爲神因少却夜相率遁去關遂解嚴中丞蘇志臯欲上其事丁朝

力辭蘇嘆服以爲遠器

華湘字源楚號南畹生而穎悟絕凡淹貫星緯精于
數學鄉試時預識科名上春官自占正德丁丑乃
赴公車起家工部曹郎已用御史朱節薦改曆差
晉階光祿寺少卿管欽天監事爲明朝治曆名臣
鄭曉吾學編輯其疏載天文述寶子爾試策舉以
問士尋謫守蒲州稍遷廣西思恩府丞致政居家
不治垣屋泊如也治郡時囚越獄布筭去向無一
得逸者所著有石府元機天文幽堂寶照地理皇極元
機命理洞林秘髓書課靈樞秘要數學生成化壬辰以嘉

秦州志

卷之六

四

靖癸卯季冬子夜酣飲委蛻而化

李存文字應魁號曲江總角時藉藉有文名嘉靖乙
丑成進士改庶吉士館試讀臣鑒詩爲詞林所傳
誦詩文有金薤琳瑯之譽并書法稱爲三絕授吏
科給事中陞工科右主懇乞聖明講學勤政一疏
識者避之外補楚藩叅議提督太和宮屏絕常例
人情以爲難未幾返初服竟垂橐而歸前輩謂其
謙光待士清白持身流風餘韻猶堪砥俗惜乎其
辭課諫草遺佚不傳也年未艾而卒

陳應詔號次山海陵名士素有羸疾爲人弱不勝衣

而才思溢湧構文不屬草下筆數千言立就所著
奇論士林與宗子相作並矜式之以嘉靖乙卯丙
辰洎叔汲同聯捷初任浙江桐鄉令士民以漢朱
邑令季稱之先是爲諸生時下帷攻苦焚膏悉踰
丙夜爲率忽一夕嘔血數升母聞止其讀藏膏讀
如故以此學成而弱亦甚至是陞南工部主事視
權蕪關人多其廉平而疾已中膏肓不起矣歸時
惟圖書數卷積俸悉推與兄弟共之不析爨以傷
友愛

劉清號西郭少負奇節斤斤矩矱是束時林春講先

秦州志

卷之六

三

儒王艮之學北面師事毅然以見知自許於是從
清受業者如林用歲荐分訓浮梁教嚴而氣和務
接引士類薰之以善良士化之或有問著述曰帖
括是尊最誤後進問學術曰道寓諸庸目前皆是
故題壁有琴到沒絃應寡和笛如無孔豈容吹之
句可觀中藏矣一日忽治裝趣歸衿佩泣留不聽
因立石繫思司寇郎李大欽爲記子弘宇成進士
張桐號鳳樓自稱方外司馬筮仕山陰令其政大抵
獨行一意不畏強禦故民甚懷惠政就常調擢南
京戶部主事服闋謁選宜補北素性恬退仍以家

近請南稍改南職方歷車駕職方員外郎中時江陵相黨爲操江侵本兵權預選補江營諸將則引故事力爭勿爲屈左遷武定州會監司酷鷲無人理偶事與撐拒不得遂致政歸後閉鍵杜囂足不踰闌郡大夫罕識其面令人仰其清風高尚者三十年工書法爲世珍重日以臨池爲務七十外猶操管運腕如飛

陳應芳字元振號蘭臺令龍泉松陽俱有惠政遷儀曹主事職專教習駙馬都尉以壽陽公主婚禮愆時發左右欺蔽狀且言卽帝女當恪遵婦道不宜

泰州志

卷之六

五

使男下女姑拜婦上嘉納之已署主客郎典山西試所拔多名士如傅少宰新德韓少師燠趙少司空用光諸公皆表表者晉祠部郎有臺官事與考功爭職掌出爲鞏昌府丞未幾還郎中遷僉事改浙江督學執法秉憲端士習正文體實見諸行不徒頒規條具文已也旣叅閩藩攝司篆積羨若干緡籍爲正需尋遷南大理丞當入賀上敬天師古法祖勤民一疏及遷太僕少卿條馬政八議以上悉報行獨責成將領一項與巡視京營臺省二公左反覆辨駁杜門屢疏乞歸歸後甚留心於桑梓

以正改兌與鳳陽代糧二事力爭之當路其詳錢
敬止集中又有守愚歸來日涉園諸錄藏于家
章文斗號月鹿攻古文詞以歲薦授定海二尹著定
海三賦志畧雖才絀短馭而謝徵收常例却視艦
餽金邑人思之顏其碑曰遺愛嘗讀書夜分聞覆
舟者啼泣啓扉拯援被溺之人賴以全活其他言
動皆可矜式分修維揚郡志有鏡古叢奇臆見心
銘諸刻行世

劉希文號翼齋博涉群書隨手評騭藁幾充棟或有
叩以故實者輒具本末旁引曲撫疊疊言之聽者

泰州志

卷之六

七

忘倦天性耿直爲諸生嘗以朔望謁監司時有某
生怙勢豪橫出訟牒理債於公庭衆雖不直其事
然皆長跽莫敢先發者獨挺身起離班次竦立監
司遽詰其狀因抗聲前日所言公胡敢不伏謁若
結黨害正此膝寧輕屈耶時監司爲筆山陳公大
加器重而訶責干請者債遂寢後司鐸長洲嚴毅
樂易士心歸之有名士陳元素俞琬綸皆以棘闈
擬元魁援例入胄監惟納一詩箠不入其贊寮友
王學博以公謁出室人一夕暴卒卽爲之具衣棺
殯焉至今吳中多其高致

在成弘
年按先
後舊志
與不立
傳今補
選

胥政字有恒成化乙未進士授南京戶部主事歷員外郎郎中滯郎署者十二載弘治庚戌出守武昌守正奉公多所興革金沙浮梁之成也實其經畫歷陞山東左叅政分守東兗弛南旺湖禁以食貧民又分守遼陽正德間由遼陽陞江西右布政使將發以所餘餉銀數千歸于代者毫髮無所取奉新饑盜且起政賑恤有方一時晏然尋陞右副都御史巡撫寧夏會遣科道查勘遼陽軍儲有虧耗逮治下詔獄罰米三千餘石累歲事方竟褫職以歸未幾復職致仕林居十餘年卒賜祭葬如例政

秦州志

卷之六

六

爲人質直坦易居官廉正卒後家無餘資士論重之守武昌民遭大疫政因憶蘇長公得巢氏聖散子方叙以傳世且謂在黃州用之神驗茲地適宜命數醫按方治藥往給飲者皆愈又遼陽版築丁夫病如前給飲亦愈二處所活甚衆

袁杉字子才生而穎慧十二歲遊郡庠臺試每冠多士時稱維揚八俊杉居其一初授同安令寬平得大體以他事忤監司罷歸來牢騷不平於詩文中屢寓意焉杉子世科孫懋貞三世並舉孝廉懋貞起家開封郡丞擢南康守所至有聲終雲南副使

劉時雍字師舜舉孝廉任龍泉令有惠政移濟南別駕致政歸胸襟坦夷終身不見喜愠之色而澹泊寡營蕭然數椽畧不加拓真可廉頑立懦君子也外史氏曰秦故號材藪以文章道德爲中原之麟鳳何衆也自儲林二公首遷南宮外或批鱗納牖矢忠謇諤或建牙肅紀樹伐保釐他寄有民社而俎豆渤海桐鄉者後先並武蒸蒸盛矣若今之表表敷歷可垂竹帛者有在俟日久論定茲不敢阿其所好

武勲

潘原明初爲張士誠浙行省平章李文忠師至以城

秦州志

卷之六

无

降後平雲南署布政司事卒葬鍾山之陰

李伯昇初與張士誠潘原明俱起鹽徒爲浙省平章出降徐達征守陝西五年後征雲南功與江陰侯同十三年春召還卒

施文初從張士誠自後歸附中山王麾下從征克山東下河南守北平取陝西略察罕腦兒皆預焉尋從克戎都征和林入沙漠征大石崖所在有功陞

浙江都指揮同知改山東都司移鎮淮安

子儀襲指揮使

陳瑋開國功陞百戶調燕山護衛擒獲乃兒不花陞副千戶靖難奪九門雄鄭功陞指揮又壩上力戰

陞都指揮大戰楊村陞後軍都僉事洪武三十五年論功進都督同知封奉天靖難推誠宣力武臣特進榮祿大夫柱國泰寧侯食祿一千二百石與世券薨贈靖公諡忠襄子愉嗣

朱顯忠敵攻西門日且暮顯忠被傷暴瘡決戰力不支城破爲亂兵所殺事聞遣使吊祭贈正國將軍都指揮仍厚恤其家

紀信西廂人吳元年從軍有功陞遵化衛指揮其子紀...討賊有功陞陝西行都司陞指揮僉事

朱真安定鄉人吳元年隨駕有功授濠梁副千戶

泰州志

卷之六

三

朱士俊顯忠兄淮東道副都元帥

外史氏曰世率右薦紳而介胄藐弗置齒矣當版宇寧謐材官蹶張鮮所事事一或戎馬生郊寧能提不律升壇如陳琳退虜傳介子摩致也者則烏可抑武文下哉今盟在帶礪...陳侯以下開國靖難展矣可勸旂常卽與皇圖共鞏無疆誰曰虛語

隱行

王伯起字興公父綸爲太常博士伯起當以恩得官遜其弟舉進士不中嘆曰士不自重而與千百人旅進坐軒廡下獻小藝規合有司可恥也與其冒

恥以得祿寧貧賤而肆志焉於是閉門靜

十年善歌詩獨得深造清麗粹美名

曰王

先生州將部使薦諸朝而伯起老矣宋仁宗英宗皆賜粟帛不強以仕邵人王覲誌其墓謂先生不有其道而道信於朋友不居其名而名聞於朝廷堯允恭字克遜景定咸淳兩領鄉薦宋亡專意經傳邃於易深得性命之理江浙行省兩檄充濂溪東川書院長允恭皆不赴安貧樂善學者多從遊自號觀物老人大司農燕公嘗稱其古心絕俗清氣逼人

有詩文二十卷

泰州志

卷之六

三

明

朝儲宏字仲文生而醇篤孝弟早年嘗市鹽遼陽載

布數車值敵騎環城雨雪浹旬僵凍者道相屬宏探得橐中布散而給焉衆商止之曰商以求利若之何并其本棄之宏曰此何時尚利計耶比歸所得息無幾矣又曾拾遺金若干不使家人知也坐候遺者有男子攜婦哭而過詢其故以遠戍某地費不給祇一子鬻而得金忽失之將死道路矣宏立取金以還其人感泣謝去此宏之陰行德宜嚙及洵之昌大也

陳鳶字理卿以心例授本所副千戶少年用計然策

起家值荒歲以米粥賑饑民死者給棺瘞之有鄉人沈里袖金一袋來私囑曰余生平辛苦儲有二百金今老矣子且幼熟思非公無可托者其爲我寄之無令人知也因受而藏諸笥越數年沈歿爲往弔卽攜金以還封識宛然其子泣而拜曰微公長者吾不知死所矣太史瞿景淳爲之記

劉昆字谷臣多長者行少時母暱之甚私以金不自秘悉紆曲給諸伯兄乏亦不傷慈母意嘗拾遺裝金數百低回其處不忍去匡坐待遺者至立還之蚤年縮半通不樂隨隱去慕漢劉公爲人更名昆

好施不倦親友有乏輒周窶人子每待以舉火嚴寒賑糜療饑多所全活凡有贖鍰未入羈犴狴者必捐緡錢代納脫之有踵門泣謝者亦謝絕施棺槨亡慮千數尊經閣圯及寺宇橋梁募建一一爲之樂助以遐壽終先是里中某官侍御與李石麓相公連姻怙勢橫甚垂涎翁所業北門外市廛腴房一區輒遣奴詣翁欲得之時翁二子俱爲諸生靳勿與翁乃折節持房券畀奴歸亦不與值後此宦家業不旋踵蕩覆無准類其所奪者亦不知鬻何人而翁子姓代以爲善昌其後云孔大司成貞

運有傳行于世

宮永建字克昌性孝友當喪父家貧從舅氏貸木後償半而弟應償之半未也歷五十年病革召子景隆前亟取篋中書若衣代償且曰吾詒吾父安寧計所負屬誰耶父柩在堂會島夷入犯民盡竄子身居守日柩存與存燬與燬耳時比閩焚劫獨得免僉異爲孝感門人顧四教以景隆入泮持緡錢五爲餽已稔建需之狀更倍之建不得已暫貯後補納顧切矣家人不復記憶請辭曰若不受當掘置隧左強留而去其踐然諾多類是弱冠旣廩屢

泰州志

卷之六

三

試屢甲適以弟不檢含沙者嫁禍於建抱沈寃莫雪偶客有齒歲薦者孫從傍曰嚮大父不蒙鱗今者首進賢矣卽叱止及退語而忘而叔祖在坐耶建之意惟恐弟踧躅而委順受命尤人所難後七旬以勤讀失明踰十年雙瞳忽爛爛如漆異哉孫大壯方舉於鄉天所祚正未艾也

王好問字爾裕給諫順庵公冢孫承清白吏之後家徒壁立然喜耽文史不知柴米物價於書無所不窺悉手自抄錄下及詩韻亦然其勤學如是或勸之就試不應漆皴緯恤形於篇什旁獵陰陽卜筮

之書尤精大六壬數諸青烏術生曠皆其自定平生足不至官府迨請致賓筵造謝然後識郡署云里中稱爲次山翁多其隱德

外史氏曰士伏處岷巖解體世紛弗弋榮利於易得遜之義者乎又有但左方寸衾寢自慊還金蠲橐孳孳營施不倦此豈有所爲而爲之卒也于公高明延及數葉則天之福善若持衡可爲陰行德者勸

孝子

漢

董永丁溪場人卽世傳賣身以葬父者今本場永

與父墓並存焉

按廣德安父歿黃州賣身以葬事蹟

秦州志

卷之六

三

祠墓俱在德安碑碣可考永有子爲道士他去亦在楚地秦州董孝子想另是一人年遠傳訛遂傳會爲永好事者又爲地蹟以實之耳

南

查道其先徽人宋平金陵奉母渡江居如臯以能

孝養聞母病思鰕魚羹方冬寒泣禱於河得鰕以饋母母病尋愈

宋

錢涪字申伯翰林學士勰之孫也事親孝家貧而甘旨獨豐母病藥必嘗而進居喪哀毀骨立悲動隣里廬墓三年誦禮書周數百遍百卷

張熹字立道事母奉兄孝弟業儒貧不能自給宣和中買田唐灣就家焉自是絕葷日營甘旨以奉母

赤芝生於門越七年又產舍後竹間前後十四本
光潤如塗丹朱扣之鏗然有聲乃築三秀堂內閣
劉旣濟爲之記蔣侍郎燦毛筠州敦書皆以詩聲
其孝感

顧忻十歲喪父以母多病茹素不啖葷者十載每日
鷄初鳴具冠帶率妻子詣母室問所欲如此者五
十年母老目不能視物忻日夜號泣祈天母目忽
明以至燭下亦能縫紉年九十餘無疾而終

元

張緝字士明其先膠州人父右郵宦游揚州因家
焉至正壬午緝與兄紳弟經俱中山東鄉試緝授

秦州志

卷之六

五

秦州吏目時高郵兵犯揚州母方病賊兵持刃突
入舉家驚散緝以身翼蔽其母背負十餘鎗不動
子母保全移家姑蘇以天年終

沈政父爲屯田院衛官使酒殿平人死政中途見父
恐懼述其故卽號呼褫衣就毆其屍巡徼者捕送
官怡然就死聞者悲之

袁智周字道濟稅務禱西人其父敬夫占小海場鹽
丁籍至正五年爲總催劉正二所凌轢斃於非命
智周誓復讐陰佩刀寢苦枕塊凡六年後正二爲
他人殺死乃以刀棄之邢溝知州趙儼上其事旌

表之江陰王逢爲作佩刀歌

張起遭兵革與母失散晝夜悲泣行求四方二十年得之濟陰成廷珪以詩贈之許其與朱壽昌並美云周溢萬曆元年母陳氏邁危疾割股肉療之得愈父金於十六年邁危疾又割股肉療之得愈父母皆以八十壽終廬於墓所哀毀倍常所居廬墓最窪下水大至不浸人以爲孝感

宮景隆字美中天性孝友事兩親竭力奉甘旨不以貧爲解父七旬病瞽延醫治之無効廼朝夕顙天泣禱如是者十餘年遂爾復明僉謂孝感所致後泰州志

卷之六

三

領甲寅歲薦不忍離父入官迨親歿風木抱悲終其身惟隱遯而已

劉光宁生員侍母病衣不解帶者凡數載母歿居喪哀毀人比王戎已經學院駱旌孝毛院獎勵

外史氏曰身體髮膚不敢毀傷而世俗孝刲股是以先後二志皆譏焉庾黔婁嘗糞之事漢中主所不爲不聞以故貶孝君子愛人以德柰何以此等題目贈人也人抵文不典雅事不中庸不可以誌不則傳孝子者簡不勝折而董永袁道濟席亦不勝割矣

高行

唐珊字可珍招賢鄉處士也少師事陳美齋私淑玉
心齋良知之學敦倫重檢終身不見喜愠之色美
齋卒同志推爲主盟無遠邇小大磬折樞趨無慮
數十百人居家動遵古禮烝嘗時祀必戒必敬上
下相臨若嚴君然子禮奉庭訓惟謹養志承顏昕
夕定省如禮至如冢婦之矢節介婦之療姑漸染
家庭共成賢孝一鄉之善士允無愧矣著有質言
集鄉約解

外史氏曰唐可珍豈所謂聞風興起者歟儒者之言
曰聖人可學而至患不爲耳可珍亦云故構堂聚樂
泰州志 卷之六 三
借同志講論不倦從游者日衆余於可珍論著未詳
大抵必依傍良知暗中可摸索也傳又稱其師事陳
美齋亦不詳美齋出處則青出於藍將何所折衷焉
雖然珊有志聖人之學者也生而善蓋於鄉歿而崇
祀於社此豈若處士而盜虛聲者哉

尚義

宋 陳護字元法六世同居家衆百口政和七年詔旌
門閭廳事夾欄正門閤闕烏頭二柱端冒瓦桶衛
以棹楔左右建臺高一丈三尺朽以白而赤其四
角建炎中兵燹不存有孝婦向者未三十卽孀居

毅然有守紹興九年貸金贖產陳詞有司丐修遺
趾州郡賞其義復榜建門閭

茅信卿四世同居每旦家長坐堂上卑幼各以序立
拱手聽命分任以事畢則復命其有怠惰者輒鞭
辱之卒無怨言州守上其事表曰四世孝義之門
元顧仲庸佃儻好義有古豪俠風與保定張文友爲
友張任嶧縣尹秩滿僑居江陰一日暴卒仲庸在
京聞之卽走告當路者曰張文友未病願致仕因
代入狀中書遂獲以嘉定知州致仕旣領宣命又
代文友之子告蔭乃得注晉陵尉其家實不知也

秦州志

卷之六

三

仲庸南歸致奠賻奉宣勅授其子人始驚嘆

張毅丁溪塲人元朝奉二親避兵火明初爲大同行
都司書掾以勤儉廉潔著稱母病歿扶歸至中道
父亦歿路遠力窘火之負其骨歸葬丁溪服除補
浙江都司令史季叔客死瓜洲毅在浙念未舉其
喪有仲叔亦貧老不能自養時爲感泣乃求謁告
省墓始葬季張奉金帛爲仲張壽復赴浙衣食量
自給掇其餘遺以養仲叔時人稱之蘇伯衡有傳

明正統七年歲歉入粟一千五十石旌爲義民者六

人 雷信 許禮 劉懸

陸敬 盧源 游淮

宮貴字大陞正德戊辰歲歉入粟千五百石授散秩時學之講堂頽弊捐貲新之內子郡大饑餓孳枕藉于道貴購地劇坎瘞之幾千人其重禮教廣恩惠大率類此事載御史何宏誌中

盧澄盧源孫嘉靖年間屢值歲饑出粟賑濟藉以活者甚衆代巡黃以積善世家扁其門

趙禮草堰塲人初聘某氏女未婚而雙瞽其家欲辭婚禮竟娶之終身相好無尤鄉人稱爲趙長者

顧夢騏字德卿父侍御廷對爲聘太守王陳策女後

秦州志

卷之六

四

王女啞啞騏不欲悔盟遂完娶如禮白首相莊各院給匾優獎騏以明經司訓擢縣令

王之垣字得師廩於庠心齋先生孫也娶陳氏年十九病瘵疾目雙瞽陳不安欲爲畜妾力謝之竟有子陳早卒垣卽題其寢室云松作正人不妨霜雪蓮爲君子亦自污泥遂終身不娶房柯饒陳四學院交獎高按院請於朝歲給米布

顧楷字仲表好施不倦隆慶四年以賑粟聞於趙撫臺給以冠帶子四教亦修學代完漕米院道匾獎季子署丞四科孝友樂善月旦允孚人以爲一門

尚義郡守數延致賓筵云

韓士文號伴松精岐黃之業遠近徵聘無虛日所入以供施予贍貧族不治家人產遇窶者并却其金不納縉紳多高其誼嘗愛蒔一青松婆娑其下徐公小石贈之詩曰董生有地多栽杏子獨瀟然寄一松留與歲寒能濟世不求標記活人功曾著休休樓集志中賣藥伯休居諸詠卽指懸壺處也

黃呈祐字元祐天性孝友事後母老而不怠置義田樂捐助有父風曾辟粵藩幕職不就月旦歸之

沈道輝術擅岐黃天性孝友父早世遺弟中裕俱幼

秦州志

卷之六

望

爲撫長婚娶旣而兄光弟裕以業儒不暇治生義讓四百金產相助兵憲胥給冠帶優異焉且施藥貧窶數不勝計人額戴之

外史氏曰義之名不同有敦倫重檢有讓產捐金有賑饑輸粟有誼重結髮不以疾棄不以貧解與終身無二色者均之乎義也往牒流傳近而輿論交許是皆高誼可尚彙之以風後人

以上舊志以下宮志

秦州志卷之六

名賢

宋

許元字子春其先宣人父司封遺澤兄弟相遜从之乃以元補郊社齋郎稍遷太子中舍知如臯縣徙居海陵養母盡孝元喜修廢壞長於治財自元昊叛西兵久無功天下勞做三司使言其能以主權貨先是京師粟少而江淮歲漕不給叅知政事范仲淹謂元獨可辦以殿中丞爲江淮等路發運判官元曰以六路七十二州之粟不能足京師者吾不信也至則治千艘浮江而上所過州縣留二

秦州志

卷之六

四

月食其餘悉發而州縣之廩遠近以次相補由是不數月京師足食旣而嘆曰此可爲於乏時然歲漕不給者有司之職廢也乃考故事明約信令發歛轉徙至於風波遠近遲速賞罰皆有法江湖數千里外談笑治之不擾不勞而用以足就陞副使已而爲使賜進士出身待制天章閣先是歲漕京師者常六百萬石其後十餘歲益不足至元爲之歲必六百萬常餘百萬以備非常及去職人有勸其進羨餘者元曰吾豈聚歛者哉敢用此以希寵仁宗嘗謂執政曰發運使總六路之廣其財貨調

用幣帛粟歲千百萬宜得其任而久之元在職十有三年已而乞守郡乃以知揚州越州又徙泰州卒年六十九墓誌謂許氏居州城北有南園又謂君之美衆特書其一節以示海陵之人取其孝悌著於三世也與周氏查氏俱爲郡望族三家子弟多遊鄉序故有一學許查周之諺云

文學

仲并字彌性興化人紹興壬子進士幼好學強記每一展誦終身不忘其母嘗屏所觀書几上惟餘臺曆一冊明且默記吉懼凶煞纖悉不悞初授平

泰州志

卷之六

四

江教授仕終朝議大夫淮東安撫司參議官

明

沈道隆號念毅少司馬孫也素長才於吏治尤暗悉承祖蔭初任南京戶部照磨廉得楚黃豪掾贓狀論治如律大司徒多其才出判慶陽鎮定邊一切軍需皆取給鹽額花馬池歲課萬二千緡主計者割郡邑之半益惠安公爲正鹽筴條上十七議軍商便之以鎮帥某梟猛使氣具書訟公移疾歸明年以原官調判夔州上疏白祖司馬公論劾嚴嵩狀司馬公得還原官守沁州爲劉直指光復所器時萬曆己酉庚戌間也預試事以公慎自持拔

魏光緒諸生第一霍守與童子科第一等俱先後
聯捷移饒州同府饒故多盜隆率吏卒擒巨盜數
人箠殺之枹鼓不鳴商始通後復貳慶陽稽漢蹟
興水利檄郡邑引河漑田而令民芟牧其中越歲
河水汎溢徒步率吏民相地宜高下開渠築長堤
邊人至今賴之子二長復曾能爲詩白泰庠入太
學次傳曾諸生擅文譽工書傳曾子嘉植力學能
文壬子選貢授淮安學諭復曾子嘉禾孫壽昌
劉萬春字延之少廩於庠苦志下帷除夕猶寢外
館萬曆乙酉舉人丙辰進士授戶部江西司主事

辛酉給假壬戌補浙江司管西三倉權崇文門正
課外無所染仍以美金上奉溫旨優擢調武選司
陞職方員外郎車駕郎中往例武選一缺自邊大
帥以下悉納金綺人爭艷之春無所取人目爲迂
時吳姓官侍郎疏請王良易名從祀春具應謚名
賢二揭謂王公良胡公獻林公春宗公臣顧公養
謙邱公度六人又凌公儒劉公永澄王公納諫三
人士論韙之乙丑陞汝南巡道叅議加副使丁卯
陞浙江叅政溫處道所至有政績自丁卯讀禮後
里居十八年留心賦役爲小民請命諸上臺是時

士夫故優尊春在日吏胥豪猾尤有畏忌不敢肆一切利弊無不身先勞怨自釐剔來兵憲市河之開徐州守鳳頸之復皆春力也叅據典故於癸亥州志多所改正見姚太史序子懋賢懋贊懋勛懋寬賢勛先後登賢書贊明經寬諸生能世其學王相說字懋勳三重子給諫紀之元孫也生而孝弟敏慧夙成惟喜讀書無他嗜好九歲赴學十歲卽成文義凡日所過無不成誦執筆能錯綜出之廩於庠刻苦舉業有深得天啟辛酉壬戌聯捷司李袁州多治行識袁臨侯張爾公於諸生甲子本

泰州志

卷之六

省同考丁卯廣東同考戊辰行取四川道御史未半年疏四十五上俱獲溫旨至請復召對一疏卽奉旨行仍口諭朝臣以昨見御史王相說疏舉朝稱賀以爲榮遇尋以枚卜致溫錢之爭溫指錢爲黨說首抗疏謂人臣不可言黨人心當先息爭凡言黨者必有爭心體仁欲以黨字塞言官之口則自體仁言黨群臣始無黨而有黨也庚午巡三晉值撫軍耿如杞入援師潰被逮邊兵叛殺兵道守將說單騎詣營撫之而安仍令自推始事數十人斬於轅門譁兵甫輯潰兵劫掠入境說會同新撫

仙克謹同日起兵抵暮偵報仙撫中刺矣說聞亟馳至仙公營已中要害驅刺客至前問曰此人素有風病否衆云有斬以狗握其衆次於襄陵檄秦撫絕河流以防逸賊不旬殺賊殆盡餘二十七騎渡河秦撫不能遏是爲李自成之始釁矣秋闈爲監臨報陞湖廣下江防叅議卽日拂袖行俄告病歸歸則聚文學之士課藝家園先後登第皆從學之彥如是十年至壬午方以副使督糧江右事竣猶優游林下十餘年年七十六卒說爲諸生赴試與宮鶯鄰公同江船酒後耳熱以墓誌相屬後

果銘其墓兩人名位年筭說皆預定論者謂其大父得數學於華南畹云長子孫驄諸生次孫駝三孫驂先後舉於鄉四孫駟諸生卒後以十屬士夫請入祀鄉賢

黃太元字天侔天啟甲子乙丑聯捷舞象時穎異有神童之譽九歲善屬文十二歲州試冠軍遂入泮生平以忠孝自矢人品學問不隨波逐流成進士授中書歷丁內外艱丙子陝西典試是科得人爲最韓城高公辛卽富平田公本沛朝邑張公表其選也丁丑考選戶部主事督餉江北庚辰轉儀

郎會試提調會太學釋奠上躬閱兩廡特崇周邵
二程張朱六子爲先賢會議詳慎條析允當壬午
陞廣東叅議歷官皆清慎忠厚勤於職業操行無
纖曲尋陞廣西左布政使弟叅元泰廩生爲人個
儻有才思晚居木村足跡不入城市爲人所難今
諸生柱元其族弟諸生瑄其冢嗣也

王虹字紀芳安豐場人早年喜俠好施生大儒心
齋先生中年樂善不倦古朴坦夷壽九十三臺使
請於朝歲給粟帛分運周公汝登題其像曰心齋
之生間氣所鍾生心齋者間氣所從厥後何自九
泰州志

卷之六

四

十三翁是孟孫氏是程太中丹青雖巧若爲施工
洋洋海水泰安之東千秋百代永鑒斯容
崔殷字邦實富安場人賦性剛毅少聞心齋王先
生講學卽執贄就見隨悟隨行不事口耳先生以
大器歸之扁戶浩歌誦讀暮年不倦繼司周海門
造廬請益旌其門曰篤學真修居士

季來之字大來泰之安豐場人安豐爲心齋先生
故里季心慕焉試童子日奏多篇見賞於韋公宗
孔名置第二宮薦鄰公爲孝廉奇其文延至家課
其子偉鏐季因問奇焉壬午師弟同公車而偉鏐

成進士季右族自幼食貧然豎脊向人不少挫以捐介見推重於名公卿爲文富麗出經入史具雕龍繡虎之奇敦品行崇古道立身行己一以前哲爲楷模癸未後益潛心理學一夜夢王心齋先生與共講論日與學者講學於其家署其集曰誠心堂素能飲勸父以酒邁病瀕危數呼酒家人斬不與終其身斷飲同偉鏐受書於季者爲楊爾時字程一亦以丁酉舉於鄉

篤行

明 周鎬字子京年十七補弟子員先世累千金兄弟

秦州志

卷之六

四

未析鎬無所取以貢授山東淄州丞至卽署縣事諸生中有以邪僻聞者餽以金叱不受卒正法陞湖廣榮府審理致仕歸歸仍閉戶讀書比鄰喬干兵十年未見顏面子世臣爲諸生負才譽著述甚富交游盡賢士夫孫咸寧諸生曾孫恭先好學能文餼於庠與明經薦後裔多俊才世其家學

陳應旂號文郊鳶孫陳氏自百歲翁後代有耆舊應旂承累代之盛幼能徒手作家壯歲豪華遂甲郡邑爲人慷慨重然諾樂施予窮乏每待以舉火鄉里事有難決者立爲剖析人服其公窮冬設糜

粥餉獄囚及四門飢餓者續絮之施尤歲歲不輟
自秋江公後無如其樹德務滋者每獻歲元宵諸
士夫讌集其家火樹虹橋駢闐里巷各村鎮童叟
聚觀仍出酒餚相餉至今傳爲盛事晚授光祿署
丞郡守嘉其高尚延爲上賓年九十有六子四長
王道今丁亥進士給諫公忠靖道孫次太僕公冢
嗣三王猷號贊字授鴻臚序班忠厚著聞與物無
競無論識與不識皆服其長者年亦九十有二四
王烈諸生補上舍臨逝不亂猷長子允晨以歲薦
官江浦縣學訓導

秦州志

卷之六

六

陳王謨字友荀太僕公冢嗣以庠生上舍授光祿
散官生全盛之時此爲大宗居處高華禮文翔洽
望而欽其名貴年八十餘子繼昌乙亥拔貢讀書
有遠志爲人古道自持時俗儂薄無所得入其胸
中年七十餘四子皆能文長伯龍舉甲午賢書
宋漢麟秦之港口鎮人也宋爲秦名族漢麟生而
昂藏舉動必合乎禮義弟兄三人漢麟居二子懋
功幼失恃游舅氏宮明經家懋功束修從學言動
一以舅氏爲師至今里中談品行必懋功首稱
焉漢麟年八十舉鄉飲大賓懋功歲薦官沛縣教

朱承芳字懷萱其先姑蘇人勝國初海陵七世
至承芳有厚德官廣東市舶吏目輕財好施鄉鄰
賴以舉火者數十家生二子長宗周字蘭谷以選
貢除廣東布政司理問廉能精敏凡錢穀出入纖
毫必察左右轄每事必咨焉年九十一生九子入
太學者五人三子爲邑庠六子天申恩貢有文名
次天相子二長佩熹補邑庠次淑熹字艾卿順治
辛卯孝廉授知縣歲大水飢民載道於大賑外出
穀千石給飢戶周寒乞次宗周長子天俊孫扶上
字翼雲弱冠登順治丁酉鄉薦今子姓蕃衍幾二

泰州志

卷之六

兗

百人

杜日榮字春陽安豐場人自諸生入太學性至孝
母丁年老齒脫絕粒食糜參苓果餌代膳者垂二
十年蚤夜焚香稽首北斗冀延母筭雖逆旅中不
廢負侗儻才交游士林最爲諸君子推重崇正間
患歲澇廢園粟疏市河以甦貧窘場素未有以科
名起家者剏奎星閣於場東南獲應如響此其器
識有過人者年九十一治酒筵連十日別親友而
逝

王應麒明經字鏡如早年失怙每見父手澤必痛

哭失聲年過艾居母憂哀毀者六年盡讓先世居第與兄弟居之又以已所置良田予二弟口今日無可盡力於吾母聊用情於母所繫念者耳友人
有託以愛妾者同居數載未嘗一識其面有遇難以數百金寄藏者厚有贈遺先生與所寄金封藏一處事後悉返之卒不受年七十子礪品文行皆高自位置爲同志推重與明經選孫譽處舉於鄉
王應麟號真如初爲諸生後棄去隱居衡茅冠服甚古動循禮法旁通地理命數醫藥之術書法端勁如其爲人年八十二

黃軹字希烈輸粟爲好義倡郡侯旌以尚義數請致賓筵伯子呈祐字東畬天性孝友事後母老而不怠置義田樂捐助有父風四子呈理字大酉遊庠序黃氏世居姜堰鎮族甚繁理爲修譜建祠延師祠內凡子弟孝秀而修脯不給者皆與焉周急濟危人多受惠長子鑄戊子舉於鄉邑侯聞其賢舉鄉飲大賓年八十二

黃宸號慕渠姜堰人性孝友母臧氏曾浙米粉爲元宵節饌母卒遇元宵必流涕輟食待侄如所生每秋成糴穀得金子姪貧者或就手攫之析上哀

稱體徑著去辰亦不禁也嘗言人常奉法循理吟
耕田教子外便是非爲不遠數百里延師課子子
四人長巨卿事母王氏繼母阮氏以孝稱其訓子
也尊師重道如其父

田狩龍號鍾字泰之濠潼鎮人也抱道鄉居足不
歷城市孝友誠實課子外無他事生平如顓天代
父撫孤侄有成置義田義倉贍貧族立之教族
人讀書所著有明道大意良知說正心言意解樂
道歌勸學語教子格言 聖諭註疏遜菴詩集行
世皆有益人心世道年八十外卒子三長毓葵恂

恪恭儉時稱長者次毓芝庠生好學樂善三顯吉
原名毓惠巳卯舉人辛丑進士官嶧縣令葵子銓
丙子舉人芝子敬錫庠貢仕至西曹正郎諸孫能
讀書俱有聲庠序曾孫廣運壬辰進士令惠安繼
武多賢謂非積善之報哉

儲瑛字見賓郡庠生好學遇里中有公事能侃侃
言之啓禎間兩修州乘順治戊子舉鄉飲大賓年
八十餘卒

張廷案號見東泰諸生麋之父麋生時案踰六旬
矣說者以爲爲善之報也案素淵博能文章六試

棘闈不遇性至孝以不能終養凡忌辰時祭輒流涕兄某以錢糧罣誤州守崔訊以刑公匍匐請代崔素剛復亦義而釋之生徒百計多知名士有杭生汝楫不能具修脯公進而教之且館穀焉卒之日生徒鄰曲聚哭於庭者數十人啟正時兩修州乘著有南軒竹畦等集年七十五麋子囊之易俱鄉魁南闡靈之子蕃亦登賢書足見其教澤之長矣

丁士毅字堅素以布衣交天下士輕財好施窮窶孤絕者絮棺往往不乏也與伯兄士弘極友善千

金相其無恪色愛兒子如已子嘗一歲五易師皆竭盡情禮一文善輒與其師呼飲鼓歌以爲樂故毅之子孝廉茂才皆士之彥鄉里亦稱其善友行年八十一有廣戒殺早嫁婢二說行於世舉鄉飲大賓

陸九棘號三槐秦之三塘里人性孝友先世中落徒手作家有二弟貧孤爲之婚娶以所置生產分給之季弟有遺女同封母劉竭貲財出嫁慷慨好義鄉人感其周卹親鄰待以舉火一夕村居穿窬穴入覺之召給金帛勸諭歸正終匿其姓名子舜

自中翰成名進士典試廣西督學兩浙封如其官
舜長子與齡三歲通聲韻補弟子員年二十歲餘
殤士夫哀之舜刻其西渚集以行陸氏多才亦其
一斑而繩繩者又未艾云

張兆麒字趾徵祖子致早世父雲翼亦中壽逝家
道衰事母仇氏甚謹惴惴惟恐有憂色祖母杜氏
矢節老麒事之二十年無倦容生平多隱德每言
唯求無愧此心聞人冤怒然至廢食必解之以爲
快子琴癸卯登賢書癸丑成進士人謂此中有天
吳之諒字元亮自新安籍泰州世多名德諒青年

入國學爲人孝友端和終身不見喜慍之色同居
五世百口無間言人以篤行歸之子家驥字稚龍
樂善慕義如其父歲己亥新安兵失伍而鬻剽掠
徧四境獨驥一村晏然有過其門者輒曰此善人
宅也戒勿犯康熙四年舉鄉飲大賓子崇先明經
授中翰贈父如其官驥又有叔之讓之讚者諒同
產兄弟也樂善好施與諒同廵方以善士旌之
徐爾貞字介石上舍纂修國史恩貢授文華殿中
書舍人加禮部儀制司主事崇正十七年有奏免
漕糧三分并海口扼險二疏士民德之精醫著有

醫滙書行世

張應瑞號治徵教子甚嚴長幼學次邃學送之太倉州從學路過崑山借宿村舍有蕩婦夜扣門翁不答黎明留金三星置几上不辭而出其隱德多此類云幼學丙戌舉於鄉

蕭允第少好學篤於人倫樂善好施舉鄉飲賓年九十有八

周命新號明寰安豐場人少有聲譽序安豐俗倫薄好訐訟新秉性端方凡行有不正者必勸諭之習俗丕變弟命時號益寰與兄友愛讀書好道著

秦州志

卷之六

五

有戒殺文時子應昌家貧喜施盡大士像行世奉感應篇身體力行可謂世有善行者

戈世爵行年七十有七存心仁厚制行光明生平足跡從未至公庭矣知州方署州事韓知州傅給匾獎勵并免子丁以供孝養

石光霽字仲濂儒士任國子監博士少學春秋於古田張翠屏學士善屬文長於吟咏爲明初時學者所宗與劉學士三吾宋學士景濂所著有翠屏集

全英字

成化丁酉舉人嘉靖元年州志乃英

草創少與儲文懿公共學其父夢走馬摘杏而生英

周經歷山甫字陽岡負文譽宮恒山外翁也恒山博古嗜學課子之餘又課孫每孫應試出問得二題輒佇立每題口占數藝各不雷同而所讀書多得之外家泰有數周此爲洗白周姓最著自宜興分派以周處爲始祖仲仁仲智以及濂溪皆其世系也

林曜字見城東城公子也東城公當文運方盛之時理學行誼具見於文章正如唐薛諸公之後各

世其家曜於制舉業特深相傳應省試道遇同人戲作半揖曰恐文字流溢出也是年獲雋丞開封升治中歷秋官郎因請立儲謫廣西驛丞拂衣歸歸猶與後進論文疊疊不倦王鞠劬爲諸生時以文就評騭卒贈尚寶寺寺丞東城公固廉吏曜卒後更家世凌替說者謂廉近於刻此以語於矯廉則可公柔矯也或當年天道遠乎然爲善者後必昌於今近百年矣

劉有光字韞石選貢中萬曆甲午順天舉人高才博學負大名不拘拘細行文章有聲節李公三才

開府秦州偶一二機兵與光發難出亡亡後數年
猶於除目見光名云是福清相公愛才故署時有
光久已赴玉樓召矣

李嘉賓字鹿鳴杜維屏字殿公童希舜字蟬孫方
苞字白英宋灌字廣生夏光弼光彝兄弟俱泰庠
名彥能文章或兼及詩歌古文詞俱未酬所志惟
方生詩集行世亦其一斑

沈少司馬家孫復曾字大復諸生工詩

朱成恕字惟一幼孤且貧事母盡孝長應童子試
不售輒棄去慕同鄉心齋先生因號如齋闡明理

秦州志

卷之六

五

學遊於四方從學日衆東林前輩爭聘以爲上客
晚年遯跡荒村易簣日猶講學不輟著有就正臆
記十卷行世配享心齋祠

陳王度字二式少補諸生食餼試輒高等與王鞠
劬共學癸酉當歲薦應賓興試仍第一高才博學
磊落無僞卒後公議入祀鄉賢王度質有其文比
肩先哲祀之宜矣子數人長凝祉選貢辛卯舉人
司理晉中歷官戶部郎中湖南糧務驛鹽道僉事
孫志紀丁亥進士館選庶吉士

王烈本州守禦正千戶嘉靖三十三年倭寇通川

巡撫鄭曉檄往援之至黃茅港遇倭寇戰死之撫
按題奏以陣亡功加級世襲指揮僉事

孝子

劉自成別駕劉時雍子父病顛天請代嘗糞以驗
院道累獎

蔡耀以府庠入國學甫十三齡父病篤割股以進
病遂痊郡大司馬張伯鯨傳其事

崔之秀富安場崔士雲子出嗣其叔士電事嗣父
母至孝生養死哀內外無間

尚義

周沂字

安豐場人性慷慨直諒洪武初方弱

冠爲儒生時海邊凶餓朝命賑濟有司未卽舉行
沿海愁歎欲上訴而無其人沂聞之毅然請往抵
金陵值上微行以流民狀行歌於市上詢得其概
疏入卽逮所司置重典乃賜沂深衣大帽賚以肱
股二字任九江府刺史時江西積有逋賦命往徵
之積逋盡清一時多所修舉以抗直犯當道中傷
之謫戍遼北士論惜之有遺集藏於家

馬士權字

泰州人徐有正旣降廣東叅政右

亨輩猶慮其復起也必欲殺之令人僞作奏疏毀

謗朝廷假養病給事中李秉彝名以貌類者持上之命逮秉彝拷訊至死不承緝捕匿名甚急亨等因譖有正怨望使所親馬士權爲此而滅其跡遣官校捕有貞於途收士權等俱下錦衣衛獄時掌衛都指揮門達陳諸惡刑於庭拷掠瀕死數四士權終無所言乃摘武功伯誥券纘禹神功語出有正自撰士權大呼曰有正忠臣豈有自撰誥券露其逆謀之理耶門達不能折會復風雨霹靂破承天門聲徹後宮上大恐勅赦之編發金齒爲民士權博極羣書善談論有氣節寓京師教授多與學

秦州志

卷之六

其

士先生游與有正尤厚故亨輩擠之使士權稍怵於威則有正不免矣有正出獄感其義以女許婚其子焉

何金聲字元卿萬曆癸酉舉人尹新昌愛民如子陞粵中別駕掛冠歸養以腴產讓其弟里人稱友于焉

以上宮志以下新增

名賢

國朝俞鐸字天木性孝友弱冠遊庠序偕兄鈺並擯
文名鐸爲文宗八家尤於老泉有深嗜壬午舉於
鄉出當塗令吳八韓起門韓起文宗八家徐公蓼
義所得士也鐸墨義出競傳誦壬辰進士選庶常
吳陵與館選者自鐸始逾年授御史特當秋讞上
疏停刑幾中危法巡宣大疏罷監司之不職者丁
內艱服闋補原職念淮揚數苦水時疏請修河隄
兼以勘災官多飭厨傳盛輿隸爲百姓病有單騎
輕行之請疏入著爲令己酉陞口北道適有獨石

泰州志

卷之六

五

之役獨石爲長城要害連峯障天綿亘百里扶病
往關估計欽工時盛夏寒氣凜冽病卒子演澄讀
父書兄鈺亦以戊子舉於鄉官廣西太平府司李
張幼學字訶臣泰之海安鎮人海安自徐鄒憲後
未有以利第著聞者學少穎異性耿介善書才行
詩文皆矯矯風塵外物志趣不凡能自拔於流俗
不屑屑於勢利鬚歲與陸吳州同學所謂雙虹堂
者也以丙戌舉於鄉爲鄞縣令有幹才多善政時
山嵐海浪交訂軍旅四集一切供億應之裕如每
晨起視事耳聽日覽口答手裁迄無倦色且交驩

戎帥克懼卒伍民得不擾需餉孔亟緩催科力樂輸聽民得齎鏹自投侵漁頓絕著爲令稱永利焉值造戰艦工役極煩一以貞心敏幹處之閭閻如不知有役治邑八載務爲寧靜遷大興及去攀留盈道以不能俯仰隨時疾卒於京訃聞於鄞合邑爲位而哭崇祀名宦論者謂學能吏使天假之年盡其所長表豎必大而限於時命士大夫悼之李嘉蔭字爾孚曲江存文公曾孫敦篤倫誼品行高卓戊子己丑聯捷初宰安定時大兵西討軍需不以累民擢河南歸德丞振興文學識拔皆知

名士而李公天馥遇尤奇陞黎平太守轉順德多著政績如保甲寨丁水利皆地方永久之利居家惟棋枰茗椀靜居如未遇時尤工書子善樹清高閒遠書法酷肖鄉黨以蔭家世美祀之鄉賢祠

董大用號仰山遼東籍秦州人歷任贛州中軍官值金聲桓反困城帥兵固守三月援絕石米五十金大用有先見預備倉米數千石盡餉卒賑民時乘閒出兵奮擊圍解事聞擢粵東總鎮轉福建左路調守海澄身先士卒屢奏捷復宣布

朝廷威德海中將士競歸附事卒以定用之力也康

熙三年奉

旨籍泰州值大水逃亡者衆自四年至八年頻歲賑
饑糜費不貲獨九年災甚賑飢米共三千餘石銀
共三千二百七十餘兩在賑饑民共一百萬二千
餘口自州之民及高寶諸郡縣賴以全活者無算
十一年大水賑濟如前建大隱觀爲泰城東南之
勝修建學宮堂廡門牆一新海陽樓尤學宮文運
關係又獨任剏復如初孝母母病號泣禱天願以
身代母母年九十六旣卒大用哀慟如孺子時子
二人三元襲世職三重明經亦稱善人云

秦州志

卷之六

六

鄧漢儀字孝臧少工詩諸名家詩皆賴選輯以行
應博學鴻辭科授中書舍人所著有詩觀全集
吳嘉紀字野人安豐場人樂道安貧介然有守嗜
古工詩著有陋軒集同時諸詩家如孫豹人郝羽
吉輩爭相推重謂竟陵無以過之

孝子

袁懋良郡諸生父繩先忠厚醇謹親黨愛敬屢舉
賓筵父病割股郡守廉其行請旌表給粟帛
楊江性孝友母喬氏病盡鬻田園以供藥餌三日
割股兩次母愈父世泰歿全弟楊洛哀毀茹素終

身部院旌獎所生閨女因江妻有疾亦割股獲痊
鄉人謂孝出一門云

王相抃年十三父三祿病割股

蔣乘龍母張氏病危割股母愈父沒廬墓奉養庶
母愛敬有加院道旌獎

朱雲龍妹淑德因父謙病兄妹割股不約而同謙
愈本州旌獎

陳秉憲字弘章父綬早逝嗜學工文年十六卽首
拔入學祖志襄病醵天割股以療得愈後以校讐
史書積勞卒年僅二十一聞者悼之

泰州志

卷之六

三

楊日藻號君闇幼穎異弱冠卽食餼父病割肝子
元文入泮孫廷佐廷佑皆有文譽

增補人物傳

忠烈

皇清王相呂字望子前進士給諫紀之元孫進士侍御相說之從弟也師事說治春秋以忠孝自任早遊庠序試南闈屢躋不挫其志學日益勤年五十四登順治丙戌賢書丁亥壬辰兩中副車授睢寧教諭課士文行交勉委攝縣篆吏民畏懷順治九年九月二十二日叛賊海時行攻犯縣城呂率兵民拒守寢食堞間燃巨礮擊賊賊忿甚由別門攻破呂方巡城爲賊所執罵不絕口

秦州志

卷之六

三

賊斫之握印而死子驍奪刀救父亦被賊斫旣死復蘇沐血懷印奔訴淮安知府李庭梅梅驗明請卹督撫奏

聞于順治十一年十月二十日奉

旨贈國子監助教

特恩諭祭一壇崇祀睢寧名宦秦州鄉賢雍正二年勅建忠烈祠春秋祭祀

諭祭文一道

維

順治十一年 月 日

皇帝遣江南布政司堂上官 諭睢寧縣儒學教諭
 今贈國子監助教王相呂之靈曰維爾德足儀
 型百里漸薰陶之化身肩名教臨難堅激烈之
 心大節克全斯文攸賴賜祭一壇其欽承之
 祭品 猪一口 羊一隻 寶粧一座 蘇花
 二盤 托鑪二盤 饅首五盤 每盤重
十三觔 松子
 一盤 蓮肉一盤 紅棗一盤 栗子一盤
 核桃一盤 飯三碗 湯三碗 酒三鐘 降
 香一炷 燭一對 重一
觔 焚祝紙一百張 止

國朝宦蹟

秦州志

卷之六

宮偉鏐字紫陽憲副繼蘭子天才穎敏千言立
 就明崇正壬午亞魁癸未會魁館試副卷翰林
 院檢討克王講官我

朝定鼎兩以薦舉起用援獨子終養例乞歸隱居著
 書放浪山水親友罕見其面築春雨草堂于小
 西湖之遺址嘯傲其中康熙癸丑州志係其手
 定壽七十著春雨草堂集五十卷行世以子夢
 仁貴累贈光祿大夫通政使司通政使加三級
 陳忠靖字爾位號曉堂至性純篤忠孝自許博
 學能文弱冠補弟子員年二十六領順治丙戌

鄉薦丁亥成進士授中書科中書舍人辛卯順
天分校所得皆一時英俊遷刑科右給事中在
諫垣三年章凡三十餘上如早舉
經筵速差恤刑及臣鄉饑饉請速蠲賑諸疏悉奉
溫旨議行後以糾叅忤

旨改調外任未幾疾歸時年三十有八日侍父側操
几捧杖先意承志恂恂如孺子時構室以居額
曰二宜精舍閉門掃軌益肆力於學著述極富
奏疏詩文膾炙人口年古稀乃卒生平以精白
事

秦州志

卷之六

五

君夙夜不懈雖養疴家居而感

恩報効時切于衷居鄉敬宗收族惠周里黨不妄取
一介亦不濫交一人教子孫以禮義後人服習
彝訓多稱象賢

俞鈺字天水順治戊子舉人任陝西延安府推
官未幾丁內艱補廣西太平府推官甫下車平
反數大獄安輯苗民全活者千人誅鋤強暴政
績具載郡志崇祀粵西名宦康熙己巳年奉
旨崇祀本州鄉賢

陳凝祉字懋吉號茶菴生姿穎異垂髫通經史

弱冠補弟子員試必冠軍旋食廩餼研精舉業
治春秋抄錄經傳皆蠅頭小楷一字不苟湛深
經術處疑難事迎刃而解順治戊子選拔
廷試高等註名銓部辛卯順天鄉薦適前除日屆期
授山西汾州府推官剖斷疑獄持法平允判語
多引春秋蓋經濟之學諸生時所蘊蓄也甲午
晉闈分校遴拔皆宿儒晉都察院經歷陞戶部
正郎歷掌關權以廉著聞大司農正定梁公每
就訪政務會因長子志紀居史館建言忤
旨從寬謫戍愈懷感激思報

秦州志

卷之六

五

聖恩而是時適從部郎外轉湖廣驛糧道吳逆之亂
轉餉軍前著有勞績會上書總制歷陳戰守機
宜皆倣春秋兵法聯絡形勢立可施行後
天兵收復雲南蕩平黔楚軍機分合悉如所言未幾
咨部解補有疾未赴閉門却掃不與外事所著
有敬由錄詩文全集行世卒年七十有七遺命
後人仕宦矢報

國恩今其三子遠臻由新興州牧內陞刑部副郎
朱淑熹字艾人先世自姑蘇遷泰代有令德淑
承先業髫年補博士弟子員潛心力學於墳典

邱索靡不研究工制舉業順治辛卯舉於鄉康熙庚戌揀選知縣年八秩生平品行端方孝友素著事孀嫂如母里中有貧乏不能給者解衣推食遇歲荒賑賑穀數千石仁聲載道生子四光岱候選中書光岳候選知縣光岳候選訓導俱相繼而歿光巒由廩貢中翰援陞府佐循例晉秩加封後世繁衍

陳志紀字雁羣賦才卓犖言笑異常見善記誦聞父師訓誡語輒佩服不忘年十六陳公昌言視學政拔其文深加器重許爲廊廟才時其父

秦州志

卷之六

李前

已在宦途紀謂官署非讀書地不隨行自構五藉樓於城西讀書其上屏謝俗務會萃儒先四書精語纂輯成編又選大蘇文之警策者細加評註名曰拔尤二書付梓學者多宗之順治丁酉舉於鄉覆試文皆稱

旨己亥成二甲進士改清書庶常館課多魁選辛丑會試分校得士二十三人皆一時名雋是年晉編修壬寅

聖祖改元禮數有加會以京畿旱應

詔上疏遂被逮按問減死謫戍寧古塔至戍所乏資

給乃習醫多所拯治人皆稱爲陳大夫竟卒於
戊所先是父子同列縉紳旋里焚黃鄉黨以爲
榮素行喜利濟親友有緩急必傾囊相贈歲飢
多糴米麥穀粟賑給鄉鄰嚴冬風雪中粥糜草
薦無弗周也至今人猶追憶之

王孫馭字率軒軀體瓌偉睂目聳秀鬚髯飄動
望之如神仙世業春秋然五經皆臻其闡粵諸
子百氏含英茹華制藝烹鍊融液絕去筆墨谿
徑詩宗淵明尤喜大蘇酒酣笑語皆文章也順
治庚子賢書十九名七上公車己未掄元以三

書蕪煞字相同落之遂不復與計偕謁選北流
令北流古勾漏邑葛洪請服丹砂地也赴任經
遇山水悉如舊遊邑人望見顏色驚相謂曰新
令彷彿葛仙翁塑像何也抵任浹旬無病而絕
吏民間署中香氣氤氳掛楮錢視殮益信爲仙
翁化去云

匡顯吉原名毓蕙天姿超穎髻齡就外傳受句
讀卽異常兒十歲屬文州試冠軍年三十領崇
正己卯鄉薦七上公車志不少挫嘗選嘉善縣
尹不肯就晚年成進士仕山東嶧縣在官多異

績如斂胥吏寬徭役緩征稅減刑杖革陋規禁
苞苴種種善政邑人德之督撫交薦內擢會以
疾卒百姓有歎息泣下者年六十三

單恩封文林郎崇祀鄉賢

張琴字桐峰一字耐軒節婦杜氏之曾孫也事
繼母以孝聞十七遭父喪適輪克河所里長時
差徭煩重河所尤甚蓋花戶以船爲家漂泊無
定惟責成里長又徵麻膠皮羽茭蒲本色里長
自解部寺奏銷是以一克里長卽破家蕩產琴
由此家道中落四壁蕭然晝則趨辦徭役夜則

坐誦經史寒暑不輟庚寅冬李學使大收十屬
於冰雪中立奏五藝拔置超等遂冠一軍明年
再輪里長極陳河所偏累之苦上控撫軍獲邀
咨題准改麻膠折色入人丁正欵其額徵鞭
餉與通都一例官解河所六里始有起色丁酉
中副車癸卯登賢書丁未又中副車癸丑成進
士授內閣中書舍人需次里門精研理學力闢
異端其與俞楷論西洋天教諸書反覆辨析開
示後學衛道之功大矣又著淮黃交會開濬海
口諸議及曆法兵刑樂律漕運鹽法馬政備荒

屯田諸篇間蒙當事採擇用之輒效惜其未及用世而歿也僅有桐峰制藝及涉園一集耐軒集詩行世

陸舜字元升號吳州甲辰進士任刑曹多所全活曾有以枉論死者案已定舜力陳其事當從輕比以廣

聖朝好生之德兩大司寇反覆按驗果入矜疑視學兩浙執法秉憲端士習正文體弊絕風清所拔前茅多寒畯知名之士往往聯翩飛舉每試士命題必自制一藝以爲諸生楷式雖同場三四

學經書論題無不周編諸生仰瞻絳帳中濡墨揮毫文不加點以爲神筆及讀其文則皆精湛雅馴字無虛下益相與歎服競傳誦之兩浙文風爲之振起會閩中寇逼與浙唇齒浙督興師援勦以溫處之備屬舜舜親蒞行伍訓練指麾刻期並進浙人又歎服謂神於文者復神於兵也適以疾歸處林下者二十年詩文益道勁鄉之後輩得其隻字如拱璧然康熙戊午舉博學鴻辭科疾未愈不果行所著詩文有雙虹堂全集行世

宮夢仁字宗衮號定山太史偉鏐長子誕時祖
夢自鄭太史家肩一畫棟至故小字曰鄭志兆
也生而穎異十歲善屬文長益博極羣書爲文
一宗先輩始爲泰諸生後貫祖籍靜海登直隸
己酉賢書時文體波靡魏公裔介慨然以復古
爲已任及主庚戌試拔仁爲榜首元墨出天下
始翕然知文章正宗矣先是忌者揭爲冒籍故
總裁具疏檢舉行查南北遂遲大對以癸丑殿
試二甲五名選庶吉士散館授御史生平留心
經濟初入臺章十數上皆切中利弊直聲振天

泰州志

卷之六

充

下其尤著者莫如奏止開礦一疏時奉
嚴旨後開礦不實

上追念其言前疏所叅者皆被譴問黃淮泛濫淮揚
被禍尤劇仁熟諳河道繪圖入告請急疏理海
口至今稱上策出爲河南督糧叅議中州漕儲
本折靡定仁綜核錢穀節省浮費以裕軍需未
嘗毫髮厲民連丁內外艱服除補湖廣驛鹽叅
議值雲南蕩平禁旅凱旋供帳繹騷仁必先事
躬親秩然有法故兵弁斂戢民得安堵旋陞山
東提學副使正文體端士習所識拔盡一時名

宿如閻愉蘇敬生張篤慶張令璜黃鴻中皆出其門得人於斯爲盛內擢通政使司右叅議累遷通政使丁丑授右副都御史巡撫福建蒞任後查臺灣之勒派盤通省之盈虛禁人命之株連嚴兵餉之扣剋閩中地連山海粟資上遊本色折色兵民交累乃題爲兵糧刻期難緩積穀久貯堪虞陳兩便之法爲永遠之計一疏卒格於部議未幾罷歸旋

召赴京師分修南河高粱澗龍門壩高家堰諸險露宿河干者六閱月工成淮揚得無水患

上南巡閱視嘉其勞績復原官自是閉戶掃軌日事著述絕跡公府而事關民瘼必侃侃言之他若捐穀平糴賑粥施綿等事皆以身率先民嘉賴焉歲癸巳祝釐京師與宴後

上召仁五人命內侍扶至

御榻前垂問良久親賜御酒一卮并上方衣帽端硯等物殊恩異數一時傳爲盛事歸未一月而卒年八十有二仁性剛方不少委蛇行已居官惟以不欺此心爲本故生平無不可告人之事及身處大僚而食蔬衣布無改寒素其清望尤爲

朝野所矜式焉有自訂文集一百卷所編輯者則翰林文苑英華選英華粹語廿一史名臣言行錄餘年選述續南宮舊德錄諸書其讀書紀數略五十四卷奉

旨刊布行世

王孫驥字受軒入學時年始十三試輒高等餽於庠讀書天慶觀乃其父侍御相說舊墅也規模先業抗志功名已酉舉于鄉屬上春官不第猶研精制菘如諸生時謁選授宜黃令癸酉江西鄉試外簾丙子分校書四房得佳士最多撤

秦州志

卷之六

七二

棘來謁有命以已之旌蓋迎之者曰賢異日不止此也後果如所料政平多暇輒與僚佐爲黃山之遊尋老僧談禪威惠盛行尤嚴屠牛之禁有違禁私屠者牛奮起奔縣治若赴愬然因爲杖屠子而放牛於山寺之中

王孫驥字雲孫世爲海陵右族祖三正以明經廷試列高選分教上元學者楷模之稱夏侯先生驥承父相宜庭訓品致端雅言笑不苟爲文清正蘊藉不矜才氣而百家騰躍終莫之及辛酉舉於鄉冠本房墨藝出卽膾炙人口韓宗伯

選本尤稱賞不置五與計偕乙丑公車抵淮聞
母病卽返家侍湯藥服闋赴春官試終不遇謁
選得鹽城司鐸鹽城固多能文之士驥論文以
理法爲主雖藻艷如班馬氣骨如賈董而理不
洛閩法不荆川震川非所尚也一時文士皆服
膺其說設帳旣久人人自以爲得師猶上元之
楷模夏侯先生也修鹽邑學宮聚多士勤月課
遊其門者往往掇元魁又不特鹽邑之士而已
歿於鹽邑喪歸士子不忍舍送其柩抵家然後
去兩子楚楠皆象賢孫鍾岳弱冠餽於庠克全

世美

杜光先字海樹號岸修仕浙之湯溪愛其山多
楓樹亦號楓山天性孝友髫年母疾呼天願以
身代晝夜侍奉目不交睫者半載一夕母夢神
授以藥乃瘳其純孝感格如此力學好古弱冠
首拔入膠庠自是試必冠軍學純品端人爭師
之館穀悉以奉親弟妹婚嫁皆力任之母歿念
父獨處卧足畔三十年癸酉庚辰俱以第九人
魁鄉會前牧柯榮庚朔望講鄉約列光先行事
焉謁選入都以守部進士克禮闈簾官少宗伯

見其敬慎嘗亟稱之及作吏清惠有聲越二載
瑞粟產于青陽士民歌頌載湯邑志中湯人久
益感德建九峰書院爲生祠額曰德峙九峰戊
子分校浙闈所得皆知名士引告歸里手錄程
朱及各名儒書朝夕研究閱十五年康熙壬寅
冬卧病已久聞

祖升遐頌

詔至州必力疾起令子凌徽扶掖就班哭臨如禮未
數月卒易篋時語其子曰我此時自檢曾無惡
事至爲可喜又謂百行孝爲先無一語及俗事

秦州志

卷之六

七三

所著詩文行世已久子遵彝訓綽有父風

張洙字泗水鳳樓公五世孫也父豸歲貢生考
授司馬傳家忠厚惟積善課子洙克遵庭訓髫
年入泮康熙癸酉舉於鄉以中書改授雲陽令
兼攝學政歷任三年約已奉公維野店荒村皆
多方撫訓特加紀錄三次士民愛戴兩立德政
碑及告疾歸里攀轅卧轍又立去思碑洙平日
居鄉自諸生以迄宦遊從不干外務正直和平
里中咸稱爲長厚長子植敬少列明經仲子植
讓叔子植禮皆肄業能世其家

俞梅字師巖一字太羹生而警敏十歲試童子
日成十藝稱神童明年入郡學勵志下帷學有
根柢丙子癸未聯魁本房入木天旋丁內艱

仁廟南巡趨迎

龍舟

召見其父中書俞澂

溫綸嘉獎

賜御書耆年詒穀扁額又

特命梅克維揚詩局纂修官陞編修分校康熙字典

一統志分韻唐詩政治典訓諸書癸巳山西典

秦州志

卷之六

七

試不避嫌怨從棘闈飛章奏減官卷正額三名
取額外五經民卷補之晉闈稱得士侍御李公
徽祭酒孫公嘉淦皆出其門故人子雲間張忠
震困長安甫十餘歲育而教之及冠爲擇配退
林下日張猶挈眷來依後登進士吳門李生軾
軻與張等亦招致與張同學後入翰林臯邑鄭
君官部曹時托轉貸千金未幾鄭故梅哭於其
次出金贖券焚之生平寬和恬澹不與人接晚
年杜門著書卒年五十著有俞太羹制義雲斤
詩集治河方畧孔子家語訂正歷朝詩雅白陸

詩選諸書皆藏於家子燾能世其業

楊淮字桐山性端謹醇慤博學善屬文少時與兄濬齊名試必前茅食餼有年壬午舉於鄉計偕不第文行日益純粹丙戌卒於京邸弟進士濂奉其柩歸葬里人傷之子士標入州學

宮鴻曆字友鹿一字樵麓學者稱恕堂先生詩古文詞爲一代宗工而連蹇數十年未離蓆帽康熙乙酉領順天鄉薦丙戌授南宮爲仁和湯院長右曾所得士

聖祖覽公名姓顧謂侍直諸臣曰此老學也蓋公之名

秦州志

卷之六

七五

徹

宸聽者久矣由庶常授編修恪勤奉職十三年壬辰會試一克同考試官公抱經濟才格於翰林建言之例鬱不得展著瀛海策畧以見志戊戌春仁和院長乃中公考功法歸里卒年六十有三顧瀛誌其墓載藝文志中

陳厚耀字泗源號曙峰先世自吉水遷秦科第聯綿康熙乙酉科耀以禮記舉於鄉丙戌成進士初耀爲諸生沉酣經史涉獵淹博讀性理慕九章算法與郭太史曆數更旁參西學大學士

李光地耳其名薦請上試之輒稱
旨因念母春秋高南歸省親旋

召見隨從熱河詢問無虛口賞賚極厚及還京遵新
例就蘇州府學教授未踰年復奉

旨入京授中書科中書舍人開局監修算法更授翰
林院編修甲午丁內艱

賜帑

命織造曹寅送歸治喪畢趣入館辦事丙申服闋陞
國子監司業再陞左春坊左諭德兼翰林院修
撰戊戌禮闈同考官己亥以老病乞歸壬寅春

秦州志

卷之六

七六

卒於家年七十有五耀爲人樸誠自信落落寡
交天性孝友不事雕飾讀書刻苦扃戶三十年
丹黃纂述手披口哦爲老諸生如幼學雖試輒
冠軍然虛衷集益不敢以問學先人迨晚年方
受知

聖天子龍恩寵錫爲從來人臣未有之奇其手著有
孔子家語左傳分類禮記分類戰國異詞十七
史正訛及天文算法諸編藏於家

宮懋諒字翊元貢生康熙四十四年乙酉蒙

聖祖仁皇帝御試高等

召對乾清宮

賜御書孝經砥石松花硯天馬裘派直

武英殿纂修佩文韻府丁亥任鉅鹿教諭戊子中順

天鄉試榜後接

駕古北口奉

旨仍入內廷辦事辛卯書成以敏從中翰加一等議

敘應補主政疾假歸里卒年四十有五

田廣運字右君號謹齋康熙乙酉恭遇

聖祖皇帝南巡奏獻詩賦

御試高等

秦州志

卷之六

七

召入武英殿纂修辛卯順天鄉試中式以修書議敘

註選知縣壬辰會試

欽賜進士除福建泉州府惠安令惠安爲海疆巖邑

廣運蒞任多異政士民畏懷遠人悅服督撫會

疏屢薦奉

上諭田廣運盡心公務勤勞可嘉乃

特恩也將次擢用入京需次卒於邸中子雲鶴迎喪

歸里其友人顧瀛爲之作傳至爲觀縷今載藝

文志中

仲蜀巖字天池祖伯墳監生父玕邑庠生仲氏

自振華後以詩書世其家巖幼穎異日誦千言
稍長從叔鼎龍讀書鄙時文卑靡力追先正作
文獨出機杼能發儒先義蘊每試前茅甫冠人
鄉校宮中丞見其文擊節稱賞曰此廊廟才也
飛鳴在卽矣辛卯入闈榜前自信必售旣而果
然一試得雋棘闈未嘗再蹈壬辰父攜入都會
試落第候選內閣中書歸鍵戶南山寺博極羣
書著餘力集詩文尚未行世性最孝下榻書齋
晨夕必歸省其親風雨無間生平無疾言遠色
口不臧否人物器量深沈人皆以大器目之賡

志早歿殊足惜也配孫氏茹苦守節依翁姑爲
父母孝敬兼至教二子讀書以母代父鄉人聞
而敬焉

張符驥字良御號海房幼時能爲驚人語長博
極羣書二十補郡博士弟子食餼屏時藝篤信
程朱爲文法震川遇

聖祖南巡獻竹西曲張文正公第其詩一等年五十貢
入成均甲午登賢書辛丑成進士改庶常在館
三年以祖宗邱墓爲念遂上書乞休歸里四載
編輯宗譜獎勵後輩遊其門者益衆少時焚券

二箱宦遊後貧約如故不私謁當事然勸濟河
道懇修范堤有益鄉里之事嘗刀言之黃山閔
賓連卒廣陵驥葬之於蜀岡爲其子續娶以延
宗祀表章節烈必使其人有傳生平於是非二
字不肯含糊力闢姚江之說與所師李樛公辨
之後鄉會及 廷對諸策皆指陳精鑿其寃貢
理學如此

秦定遠號以御家居天目山少學書及長好詩
歌歷遊齊楚燕趙癸卯舉於鄉名公鉅卿多引
重之天性至孝以母黃氏春秋高歸養母有疾

泣血割肉沉疴立起年登九十有七合肥李文
定公額曰百歲人仙

繆肇封字山州家貧力學舌耕養親昆季相友
愛中乙卯鄉試下第留京異得微祿以供甘旨
嘗寄詩慰父有壯心不肯消遲暮猶戀長安借
一枝之句筮仕興武備守備歷運不欠加叅將
銜管江西袁臨都司下車清還營中逐年借支
縣倉之米兵得按月支給在任多惠政恤兵愛
民三年以老乞休宦橐蕭然袁臨兩郡兵民感
之建生祠立德政碑歸林下五年偕二三老友

尋花閒步隨侍者子儀及孫曾也臨終猶援筆
作詩謂心境無查滓性地有光明字畫端楷
孫雲鵬字上扶戊午科舉人力行善事於鄉居
近濟川橋時橋久圯壞行者登高履險鵬爲倡
首歛資重修輦石鳩工親董其役浹歲竣工後
有宮自禮張仁定修路造橋州城內外道路平
治鵬倡之也鵬孝親敬長輕財好義率多類此
惜其未邀一命經濟莫施耳

繆肇祺字介茲乙丑進士敦行孝友敬宗睦族
詩文淵洽經濟優長任浙江掌印都司首除漕

蠹方上奇軍民畏服浙省地狹人稠棺多暴露
祺捐俸置義塚掩埋創建義學勸課子弟巡察
棘闈關防嚴密河堤潰決捐資修築恭逢

聖祖南巡接

駕三次屢沐

恩寵歸里後兩袖清風琴書自怡年八十有一其子
若孫皆能以耕讀自安云

劉卜師字子和號容齋篤於孝友不避艱險父
訟事在郡值歲殘風雪還取資斧一夜行雪中
比曉抵家他事率多類此卯辰聯捷授廣東肇

慶守備制府石見其忠誠勤敏每以疑難事委之從征徭排屢立戰功凱旋受上賞未幾移駐德慶州汛地爲兩粵咽喉客舟來往之路向苦梗澁抵任後巡緝嚴明向之畏途今之坦途矣遠近軍民交頌其德忽以疾乞休憩留不得遂以原品回籍粵人至今懷之

宮夢熊字宗熹才華豐瞻文武兼資康熙癸未科進士出身克

御前侍值日近

天顏辦事勤敏詩文稱

泰州志

卷之六

八

旨特授刑部福建司郎中通曉律例剖斷如流老吏束手

御賜詩扇寶藏於家其所著詩古文辭不假思索援筆立就莊雅彪炳自成臺閣體裁純孝性成母太恭人病刲肱和藥及丁內艱三年啜粥茹蔬不近酒炙不與燕席一依古人喪禮誠足奉爲鄉里矜式云

以上甲乙科

明

曹文魁字鳳樓績學砥行素履端嚴食餼有年人皆奉爲師表萬曆年以明經薦廷試高等授長洲學訓導長洲爲人文淵藪魁至論文得

體兼崇實行王文清公錫爵緱山先生衡父子
皆推尊之諸士益相敬服陞碭山教諭姑蘇諸
大老賦詩贈別者甚衆

王相益字懋虞一字耀明承清白吏之後家貧
幼孤事寡母以孝聞力學嗜古湛深經術屢困
場屋崇正戊辰恩拔貢生授福建臬職招撫海
寇有功撫軍熊文燦題補福州府海防同知督
造封船從使臣杜三策航海冊封琉球國王禮
成復命中間冒觸風濤往返凡九月思親之念
時切於懷及還閩任又當覲期入京陛見賜勅

獎諭旋以母年八十告歸終養及母終益年近
七旬矣鬚鬢皓然猶作孺子啼寢苦茹蔬不以
老病廢禮士林重之服闋舉順治二年鄉飲大
賓

崔之四字季公富安場人家素饒崇正初年兄
之一之二以家難死讐人手讐人又同祖兄弟
也將并謀之四以杜患時之四年十三耳乃陽
爲憨騃使敵人弗疑而陰實圖之然無從脫虎
穴匿祖母所兩匝旬一日得間逸去號控諸當
路起大獄累年卒抵讐於法時擬大辟八人城

且春十三人徒流數十獄既定始折節讀書拾
青衿以例貢試中書舍人從征滇南有功補安
普兵巡道首查擄繫婦女萬餘人資以路費令
其夫男給領又宣諭崗苗俾率王化一載之內
邊境廓清旋卒於官滇撫林公題請馳驛歸葬
祖章皇帝論曰萬里從征不勝勞勩令署孤魂殊堪
心惻着該部廕其後時扶櫬者止九歲孤孫石
麟麟亦豪俠有祖風生守仁等五人仁國學生
嶽巖俱邑庠生有文譽

宮昌宗字武承號毅菴幼工詩古文詞書畫琴

棋音律醫卜旁及二氏無不通曉十八歲由附
學生拔順治辛卯第六名貢生

廷試得縣令復考授內弘文院中書舍人

欽賜九成宮字帖每下筆中堂僚友及館閣諸公咸
羨之有九雲書院集行世其天性豪邁不受羈
束會新令辦事中書不得與鄉試抗疏力爭
上獨可其奏後奉

詔差往楚地所住公館常時作崇昌知其事是夜秉
燭以俟果有服明季冠冕哭而至者昌以大義
曉之隨拜謝而去遂絕影響宅主人由此安居

其爲人之正直如此

吳崇先字式武號鶴山事父家驥母鮑至孝服勤就養事事必躬親不以宦學小倦治家嚴整上下肅然順治十八年由郡庠歲貢生應試欽定第六名授內弘文院試中書舍人丁內艱服闋補內秘書院撰文中書舍人

欽點史館纂修明史收掌官雖官清禁然班列中悉稱其勁直居鄉清謹一切謝絕如雪戴姓寃獄謝當事餽遺尤爲人所不及康熙九年秦邑大水告災例免條鞭而不免漕崇先暨沈喬生等

捐貲爲道里費叩巡撫慕公疏題微臣目覩遂得並免徵漕士民皆尸祝至今諸邑遇災請蠲者率援此案爲例並免漕米數十年來全活無算生平正直嚴肅遇士夫則侃侃而談人人憚其風采遇鄉族則溫然雖小民必與抗禮志存經濟兼精陰陽兵略水利官東南者鳳撫林公張公河院于公孫公皆雅重之惜未伸其抱負著經濟鴻書志遠堂新編桂籍軒詩集正覺等編行於世

沈喬生字國望鄉賢理學名儒養冲之孫也父

庠生元美早卒喬生甫髫髻母孫氏守節撫之
口授經書未就外傳四子書及專經皆已成誦
及長才情煥發善屬文工書法見知于學使李
公嵩陽順治甲午

恩拔貢生考授內閣中書辦事直房

世祖臨幸奏對稱

旨賜九成宮法帖一部隨點纂修

聖訓康熙元年克頒

詔官至漕院處屏除一切規禮從勦闖賊餘孽有功

補浙江處州府同知除虎患捕劇盜往往得神

秦州志

卷之六

八五

助民稱慈父陞直隸保定府知府綏輯旗民畏

威懷德勸民樹桑棗講求水利旋奉

簡命撫治番回兼理屯田馬政以副使道駐劄肅州

軍馬錢糧晝夜營辦宣布

朝廷德意遠人悅服百姓按堵烽燧皆銷以積勞成

疾懇請休致居林下者三十四年布袍蔬食排

難解紛若諸生時鄉人欲延致賓筵固辭不就

壽九十有四

田敬錫字公燮號左拾由增廣生授歲貢考中

書舍人公賦性醇篤事封翁明符先生孝養備

柩在堂拮据殯葬教三子皆成立州牧褚獎曰筠節松青

翟氏許奉瑩妻夫亡氏年廿五撫五男一女家貧歲旱取給十指苦辛百端壽七十孫六曾孫十二人三子君楨婦李氏亦年二十矢節孝事孀姑撫孤子熊兆成立州牧褚獎曰歐柳遺徽

許氏單玉妻年廿九夫亡撫二子啓登啓元勤儉持家八十一歲時蒙恩賜粟帛啓登妻周氏年三十夫亡撫子永芳奉姑矢志今有三孫州牧褚獎曰一門雙節

秦州志

卷之六

五

汪氏徐龍夫亡氏年廿八撫八歲孤守節五十餘年州改柯獎曰皓首完貞

華氏儒童王令望聘妻至沒訃聞氏親哭其屍執杖成禮自是不歸母家矢志不改立嗣叔子承苦食貧紡績閱三十餘年內外無一間言聞者欽之

朱氏卞玉質妻夫亡氏年廿五奉翁姑撫週歲子孝慈兼盡子長生孫子又亡氏復撫孫守節四十年學憲張獎以貞節州牧武額曰慈節可風

翟氏智有經妻夫亡矢節孝姑撫子壽八十四前牧柯獎曰白璧清操

至家學淵源經史淹貫里中稱爲文壇祭酒以
數奇不售循資補刑部主事歷陞員外郎中時
浙省一朝貴窩盜事覺有行數千金求寬解者
却不受卒按治如律秦蜀起大獄誅連至千百
人力持不可說堂力爭卒從其議所活無數已
已監修

太和殿告成蒙上賞辛未考選試卷娓娓千言稱
旨賜蟒緞旋歸里治別業名半園日與高人野衲啜
茗賦詩絕口不談時事深得古人知止之義錫
秉性方嚴好面折人之過不少假借至於輕財

好施拯人之危救人之急傾囊倒篋畧無德色
人有受其恩而負之者亦不言也會歲澇詳災
上憲委員踏勘窘於部資慷慨肩之災遂感民
食其德晚年尤留心桑梓捐腴產一庄價值千
餘金爲吾鄉義學囚糧之費至今賴之錫爲人
外嚴內寬言慙心直計畫精詳規模濶大無世
俗齷齪吝吝之習故身沒而人猶侈談其事焉
長子廣運壬辰成進士出宰惠安大有政聲于
公之後必大信不誣也康熙五十六年邑中紳
士思其遺德公額各憲蒙允置主崇祀鄉賢

沈嘉植字桓雙壬子拔貢生父傳曾工書法備
鍾王虞褚之美植又神而明之變化於太傅宣
示永興破邪之間髯仙研山不足云也簡謙居
學使謂字如其文神骨秀勁特拔之晚年任清
河教諭水潦之後振興風雅爲力居多其母李
氏文定公會孫女也年九十餘矣植沒於官署
以親養未終爲憾子賜裏餼於庠文字並傳家
學又齋志而卒良可悼也

俞楷字陳芳號正林以邑庠生入成均

廷試第一異才博學淮南領袖有俞子書三刻行世

泰州志

卷之六

七

聖祖南巡試取大江南北名士克 內廷供奉楷得首

選特進經學劄子力陳時文科舉之弊分析五
經源流次第

聖祖詳閱稱其有學隨發閣議施行旋以部選訓導天
長涖任未幾以纂修議敘擢華亭教諭在任設
立規條仿前賢經義治事尤嚴切一時士習丕
變撫憲儀封張公稱爲江左大儒

朱元夢字呂占一字北渚鄉賢志熹公中子也
生而穎異器識超羣十齡失怙卽能哀毀成禮

其太君張係海陵名族綜理家政教育諸孤亦巾幗丈夫也元夢得肄業有成由諸生舉明經筮仕豐縣司訓竭忠奉職力追蘇湖遺範崇實行勤課試門下如方君文炳獲冠南闈開豐邑文運良非偶然且捐俸以葺學宮置祭器嚴飭威儀遴選佾舞二三年間剛勁之風化爲禮讓之俗矣分巡劉公悉其勤敏委以城垣工築不避風雨月餘竣事又委監修漢高皇廟亦刻期告成時值旱蝗公與豐令設法捕瘞赤日行村野中不以爲瘁其年豐邑有秋頌聲載道尋陞

國子監學正卒年四十有八豐人思之請祀名宦且作詩歌以紀其盛子三長東啟任貴州貴陽府同知貴贈公奉政大夫

朱士楨字峙青天性孝友慷慨有大志讀書無間寒暑年三十秉鐸荆溪甫蒞任卽捐貲修學宮課士精勤且諄諄以立品爲誠更捐俸以賑民飢邑人咸稱頌焉

封贈

俞灝字錦泉號音隱以邑廩生膺歲薦需次內閣中書居家敦孝友重然諾航志林泉構漁壯

園以處四方賓客日與名士飲酒賦詩不減玉
山草堂之勝以經學教子孫扶掖孤寒成科甲
者甚衆好善樂與至老不倦著流香閣詩詞行
世乙酉春

聖祖南巡訪淮南逸獻澥長子楷以進經學劄子受

上知次子編修梅奉

命纂詩於揚共扶澥迎

駕瓜步道中

上顧侍臣曰俞澥有壽又善教子

欽定耆年詔毅四字

泰州志

卷之六

允

親灑宸翰賜額於堂間里仰瞻傳爲盛事

宮偉銓字紫銘智達公之後樸誠渾厚與物無
忤敬重典籍言行求遵點畫微文寶如拱璧片
楮遺棄必拂拭而焚之窯磁之碎者有偏旁字
體輒以小鐵錐敲取聚而沉之於江蓋自王沂
公父之後敬字者僅一人耳三子皆貴以子夢
熊部司遇

覃恩封中憲大夫

繆欽字珍所今工部侍郎沅之曾祖也得天最
厚常以利濟爲心篤於事親守身養志推其仁

愛鄉里之被澤者甚多先是泰州代鳳陽輸米
歲以爲常百姓苦之無所控愬加以明季旱暵
民勤於食而鳳米之追呼與邑漕並急崇正十
一年欵以布衣伏闕上疏指陳鳳米之害兼言
歲歉萬民待哺請蠲請賑疏入下部議時邑紳
徐耀方爲御史中丞力言於大司農謂所奏得
實關係民命大司農具如所言覆奏允行泰州
所代鳳米全與豁免而高寶興江諸隣邑之所
代者亦得援此例次第蠲除又以災年破格發
倉遣官分賑欵一言之利溥及淮南千億生靈
積善開祥餘慶久遠象賢濟美世世有人皆嶽
之仁厚所留詒也以孫肇祺貴贈懷遠將軍浙
江掌印都司康熙己丑曾孫沆探花及第列位
於

朝遇

覃恩累贈資政大夫

繆夢爵字天修幼穎秀善讀書十歲工詩文人
以神童目之年十六補博士弟子員淵通經史
留心時務承其父盛德之後積功行善有加無
已順親恭兄視九族同一體睦嫻任卹隨便行

恩處朋友間信義相先文字訂交不論金石文
宗先正大家時下靡靡之習弗屑爲也屢試歷
元白然終困於棘闈嘗蹇驢席帽客遊京師名
動公卿間方

聖祖皇帝初年文運蔚興以爵之蘊蓄弘深不難驟致

通顯且其父盛德及人宜食豐美之報顧艱於
一第天將遲其報而益之光耶孫沅捷南宮

廷對第三人振秦州七百年之文運九卿崇列四世
榮封報施善人豈曰誣乎自爵以上兩世皆祀

鄉賢

秦州志

卷之六

九一

繆肇甲字墨書生賦異才寡言笑嗜讀書慕古
聖賢步趨惟謹早年失恃擗踊苦出如成人事
繼母極孝母病籲天請代密封臂肉和藥以進
滿室異香母病旋愈無兄弟遇同堂諸昆恂恂
友愛無間言爲文規倣左史俯視唐宋大家若
衙廡然居城北近小羅浮周遭煙水卜築其間
顏曰清響園雜植松筠蔭翳窻闥引流種藕夏
秋花放露香遠聞溪上葺芳苞亭日集名流校
藝論文兼講明體達用之學周程張邵語錄手
披口誦洞達本原然皆折衷於朱子而於近代

名賢中尤與松陽陸子相印合詩歌古文風流
自賞一時耆儒名宿聞聲訂交千里命駕履滿
戶外投轄欵留動經旬月自入學後試輒屈其
曹久資餼粟以明經

廷試高等薦登仕籍素飽經術有先憂後樂之志適
下河隄潰

上命少司空孫屺瞻在豐經理河務按行泰州聞有
善策乃就其家訪之則出繪圖於袖備陳源流
疏濬先後所宜瞭如指掌司空深然其議資爲
贊畫自是左右効力率先趨事蒙犯霜露寢食

雲濤葭葦間自以家財佐工不糜帑課久勞議
敘扁舟謝歸曰吾非爲仕宦計也特以

宸衷南顧微効涓埃耳抵家葺舊墅延師課子類皆
四方名碩不吝脯資購求古今異書鄴架桓山
幾擁百城恣其探討世俗猥瑣屏不令見諸子
學業大進顧而樂之俯仰自得一好施濟歲饑
粥溢疾疫醫藥隨便周給偶親友缺乏微窺其
意解囊密與之秒歲風雪中往往袖銀錢步委
巷遇急一輒相贈戒勿言亦不問其姓名也生
平隱德類如此卒年四十九甲志在經世年不

酬其德位不稱其才士林惜之以子沅進士及第仕大卿遇

覃恩累贈資政大夫諸孫象賢掇巍科方永艾云宮壽平字貽安中丞夢仁長子也年十歲學爲文大父太史偉鏐奇之曰大吾家者必此兒也長益嗜學溢爲歌詩旁及六書醫卜諸術七試鎖闈幾得復夫會軍興募餉入貲爲郎不屑就矢以科名顯益淬礪不恤勞瘁竟以嘔血卒年裁三十八耳性篤孝侍中丞公遊宦中外片意所未形皆先幾區畫母病籲天請以身代及沒

哀毀幾傷生扶柩渡洪澤湖風濤幾覆舟抱柩哀號與共存沒誠感風霽旣塋廬於墓側撫季父之遺孤如同胞事父之諸妾猶母其至孝根心類如此以子翼宸雖貴累贈奉直大夫候補主事加一級著有靜敬堂詩文行世

張世爵字從修號荆石學者稱敬修先生少有異稟不事他師凡經史古文以及制舉之學皆奉父爾弼先生指授比長盡通百氏下筆萬言蹕厲風發含英咀華闈中得爵試卷咸歎服爲古文手擬冠一軍因策語過激遂置副乘其後

絕意塲屋竟以明經終雅以振興斯文爲已任
後起之秀經其提命卒皆得名宿遠近識者
謂有起衰之功云性耿介不喜與貴人往來長
洲韓宗伯同年友也見其文最傾嚮屢書通問
而終不造謁平生與桑梓憂戚相關時值歲祲
爲捐米賑粥彌月饑民賴以全活者衆明習掌
故倡修學宮除三十六家保正鄉人德之後以
于符驤貴贈庶常

理學

羅汝芳字惟德少慕周程理學師事王心齋與

秦州志

卷之六

九四

王陽明王龍溪共相發明登嘉靖癸丑進士任
太和令官至雲南叅政爲理學名臣崇正間諡
文恭所著有羅子全集仁孝仕學訓語錄二卷
行世學者稱近溪先生其後有名光秀字毓明
者年九十八號百歲翁究心理學亦以心齋爲
宗曾有還舟中遺金拒旅邸奔女二事學者至
今稱之學院石批准子孫奉祀

田毓芝字明符有至性喜聞修少習制藝鍵戶
却軌者數年補博士弟子員益嗜學十困棘闈
不遇後有志性命之學以同邑心齋先生爲的

言物行恒見者以爲先民復出所纂有樂天堂
稿十卷晚節習淡泊務恬退六舉鄉飲大賓不
就其他家廟以崇先義田以合族微行尤多父
母卽世皆近百歲猶爲孺子泣居嘗私語曰吾
生平慕心齋獲置木主於其側竊附門下士足
矣嚮往理學雖垂死不忘焉其膺封典而祀於
瞽宗宜哉子敬錫以明經官郎中磊落好義州
有大事關闔邑舒慘者毅然任之雖重費無所
惜里黨以爲有父風云

王礪品字子隅性冲和淡泊讀書求實踐不事

詞章雖應制舉然恬于進取不汲汲求名厭華
侈棄先世大宅居東園茅舍數椽前竹後松日
與門弟子論研性命之奧洞達根柢措諸日用
褐衣蔬食嘯歌自怡懸琴壁間以寓其意辛丑
除夕所居被焚令婦女掩面抱先人神主立樹
下他無所取其篤孝型家多此類也爲詩不拘
聲韻舒寫性情而已研精宋儒斷以心得語必
透宗多前人所未發以明經薦未幾夢兩楹季
子譽處類次其語成書顏曰澄觀錄談理者宗
之祀礪品于鄉譽處克肖其父尤長于制藝丙

子頌鄉薦

陳志襄字陶思號南邨孝友天成文行兼著幼失怙恃每賦蓼莪必歔歔悲咽及長讀書南野堂終夜不寢宗族咸稱大器五試南闈兩戰北棘以攻苦獲喘症遂優遊泉石博覽群書猶精太素脉間闔以神明稱歲荒溢粥賑饑全活不啻千人親友困乏隨便周給更追思源本首建陳氏遷泰十餘世未創之宗祠雅琴操喜詩歌手著詩最三篇倪永清集多載之後厭聲韻沉浸諸史纂成涑水之遺書仰宗考亭之心法積

泰州志

卷之六

上

九

辛勤二十餘年輯評綱鑑一百一十五卷前撫儀封張公見而契之製序行世

朱賡南號元韶秉性聰穎樂善好施遂寧張公首拔入學施藥餌以救病苦著善書以省愚頑鄉黨頌之子式玉有文譽

陳綬字儀藻一字省齋八歲能文十二歲就童子試輒首拔入學未幾食廩餼學使者期以廊廟才屢困闈棘兩薦主司手著五朝詩選行世後以朋經補授中翰因父病劇告歸終養廢寢食者逾年積勞成疾鄉里咸稱其純孝焉卒年

三十六歲

朱志熹字望鹿一字德亭前漢陽郡丞宗周公孫也天性孝友積學力行舉業而外精研理學凡濂洛關閩之書無不究心旁通諸子百家期於明體達用屢躋棘闈僅以明經入貢待次銓曹未獲以經濟顯擢廷試後家居十餘載尤加意桑梓康熙庚戌值河隄潰決田禾盡沒丙辰尤甚已未復苦旱蝗飢民載道毅然捐貲糴穀爲里中樂善者倡設局賑卹全活甚衆又置義塚於孔家莊爲貧民瘞埋之所建育嬰堂於安

家橋給乳哺衣食鄉人義之他如修復大通橋重建覺正寺皆慷慨無難色誠可謂樂善不倦者矣其歿而祀於鄉也宜哉子兆乾歲貢生元夢徐州豐縣司訓陞國子監學正咸亨候選同知孝友雍和克肖其父孫東啟等十有五人啟任貴陽郡丞餘多列膠庠太學

韓敏字遜之天性渾然胸無城府究心程朱之學如語類精義易通訂頑正蒙近思諸書悉手自抄錄重複披閱朱墨陸離每有心得必與學者反覆辨論闡繹無餘問字者接踵于門指示

不倦隨才啟發高下皆有成就不蓄長物無田
舍累心地明徹晚年學益精到尤嚴于朱陸之
辨儀封張中丞乘越三吳聞其賢偕朱芳萊緒
戚文仲夢舒孫汝益健相召至署中講繹累日
以擔當世道爲囑敏長子鯤次子鰥皆能讀父
書而季子 先穎異其父歲薦醵亦升辟雍與
流內銓

鮑鎔字純夫幼穎悟會心語言之外往往洞幽
達微師事王子隅先生問性命之學切已體察
明道最早補弟子員隨給餼牽制藝發舒心得

學使者雖相推重時關中季子二曲與邢江維
子大士遙相唱和關明理學反覆問難常以鎔
之言爲折衷鎔尚實行勇于爲義教人奉藍田
呂氏鄉約謂其可以正人心厚風俗也故凡遊
其門者皆溫恭和惠如胡公弟子之不負師傳
也年五十二疾終遠近傷之置主附崇儒祠
朱緒字芳萊好善不倦聞一嘉言謦行必汲汲
行之得東臯劉子靈瑩集奉爲拱壁曰此道脉
之所寄也有黃村腴產鬻之以濟貧友嘗與韓
子遜之孫子汝翼戚子又仲同應儀封張大中

府知府陳策公孫閉戶潛修善文章工吟咏名滿大江南北九試棘闈二中副榜四方從遊極盛陳黃門忠靖最蚤發其首座也堯壬子正貢長子一經以是年登賢言課徒亦衆如左春坊陳厚耀湯溪令杜光先皆門下士仲子鼎叔子一鏐季子漢俱有聲庠序

沈晉陽字康侯別號彞提道人生於萬曆末年天性孝友少孤先業聽其飄蕩廢絕不問赤貧讀書舌耕三十餘年娶武德將軍陳爾思公妹勤言搯作始克成家爲郡庠生苦志鑽研慕成

弘正嘉之業屢踏省門不一售遂棄去肆志古籍雲亭問字之迹絡繹恒滿課子訓孫而外與諸老友策杖尋山分題遣興龐眉皓首望者無一指爲人瑞學博包俟賡齋長王大樹屢議舉鄉飲賓皆遜辭謝之退語其後人曰鄉飲者鄉賢之媒也近世爲此多不可問吾固不敢居其實亦不屑冒其名也汝曹識之其嚴謹方正類如此享年八十有五歲至康熙丙子無疾而終生平所著時文甚夥藏於家塾晚年有采山堂詩集十卷在白蘇之間其孫龍翔將謀付梓以

傳焉

王孫驃字季超一字驚園父相益母孫氏明經福清縣令世蕃之女驃寤生幾不育祖母陶以米哺之長極孝友博通經史見幾明決酬答如流年二十七始入州庠屢試棘闈篤於交誼密友崔之四任雲南安普道歿於軍中驃哭其喪於漢水之南又護其幼孤不墮仇人手從兄孫驄被逮媵母黃恭人以金珠屬驃令爲營挾踰年奉兄歸覲母子相見大喜過望須臾出金珠還之又大喜平居閉戶著書不與外事偶聞友人談馬蠹之害輒奮然起決計除之事平絕口不復言及開東園雜藝梅竹課子其中雒誦墨香與花氣鳥聲相亂嘗自攜鴉嘴扇莎逕於土中得古石鼎愛玩不置易簣時命其子晉原以鼎奉

秦州志

卷之六

一百

文廟卽今在殿中朔望升香者

繆肇敏字虎公文學生年八十五歲生平孝友品行端方順治二年督學陳昌言特舉行優創典自茲始也甲午丁酉南闈副卷州伯濟南徐日升尤加器重手書孝義之家匾額旌之闔邑

稱爲確論子五人長尊季冕俱列明經餘子及孫並曾孫在州庠者十有二人

易東字田授廩貢生父維時明季曾以博學宏辭薦未就遂終身隱居東承其父高隱之後砥行立品不詭隨世俗腹笥淹洽問字者衆順治五年以優行舉辛卯戊子兩中副榜雖數奇未遇而聲望益隆子之炯之炯先後領鄉薦成進士孫曾入學者多人

程瑄字孺房一字華峯先世休寧人幼而穎異補江都邑諸生踰年食餼受知漢陽胡公許以

遠到嗣是而數十試俱有空群之目梓文試錄江南北翕然稱之丁丑貢入成均時習尚奔競有諷以就試北闈者瑄慨然曰得失命也曩庚午丙子予幾廁淡墨尋以額滿見遺庸詎知北之獨愈於南乎卒不往戊子年七十精神矍鑠中丞西河于公復有國士之知餘勇一戰而無意塲屋矣平生學問純粹獨見根柢閩洛之書經史之蘊深造自得手不停披明儒獨契姚江謂其節義事功古今彪炳卽講致良知亦不與程朱相逕庭傳習錄中有發前人所未發而實

不悖乎前人者他如左國莊騷唐宋各文評纂
精嚴藏諸篋衍簡易溫和人無賢愚皆樂就之
門弟子成就極衆有掇高科登顯仕者孫盛修
幼遵庭訓刻厲攻苦弱冠舉於鄉館辛甫二年
盛修每追維提命摩娑簡編輒流涕嗚咽云
仲國能字振華一字健夫先賢仲由六十二世
孫因四十九世祖白庵公以秘書正從宋高宗
南渡扈蹕維揚其子孫遂家於秦焉能以上皆
力田至能父少渠始教子讀書名進上舍生平
尚節義重然諾多借羣兒戲于村里忽茫然自

失曰此輩烏足伍哉遂岸然山立由是衆異之
後遷城北有徽人鬻木於秦素與能善聞其鄉
被兵踉蹌而歸持貲若干金囑曰吾聞人多矣
惟子足信密寄子所秋秒我當復來後不至能
皇然無何同歸者復來問其人則曰斃于塗矣
乃持金往徽廉得其子以金還之封緘宛然其
家人感泣欲分半酬笑曰分其半何如據其全
乎吾蓋不忍欺死友也有田鄰勢家欲奪之能
秋毫無讓後因其長者乃指謝曰君之勇無不
能校君之德吾不敢校也遂相與訂終身之交

且素多隱德人莫之窺謂吾留餘地予後人耳
能狀貌魁梧氣概英偉年四十二卒今子孫皆
以詩書世其家焉

吳之雋字吉人承節母張氏之教捧其父應芳
遺經苦志誦習早遊庠序持身恭謹與物無忤
母卒哀痛如孺子里人賢之屢試棘闈不遇晚
年生子亮士亮揆以亮揆後其弟皆教以義方
臨終語其婿王孝廉驂謂生平不爲惡五更睡
醒心無疾病一息尚存此志不怠皆自信語也
雋歿亮始入學能繼父志文行象賢亮揆早卒

秦州志

卷之六

三

其妻楊氏守節不二說者以爲一門節孝其家
教然也

黃雲字仙裳號舊樵世居姜堰鎮慷慨正直尚
節義早孤事母極至孝母病嘗糞及沒哀毀骨
立慟父未見成名當事屢聘不應幼受知太守
陳素陳乏嗣被枉破家雲偕遊汝寧太守饋以
千金雲分贈貧友抵家囊罄康熙癸亥制府于
公聘修省志詩宗盛唐文擬左史書摹二王所
著有桐引樓集七律分韻五言詩抄行世其餘
稿盈笥力不能刊家雖貧晏如也惟閉戶嚴課

子孫賦詩飲酒自娛署其門云教兒孫識廉恥
字居城市有山林心年八十二無病而終子二
長陽生字岷懷以詩名次泰來字交三工詩文
能繼箕裘南北知名士無不納交諸孫鸞和等
足紹家學人以爲長厚之報焉

周恭先字榮梓家世業儒父咸寧文行高一鄉
屢試不遇恭先爲獨子志紹前緒下帷苦讀研
精制藝學使者曾首拔其文復易去之顧能不
怨尤益自淬礪來試復首選拔食餼學者奉爲
指南人品日高卓絕去俗務惟古人是師居北

郭蓬門莎逕奉老親養志率諸子承歡膝下天
倫之樂和氣致祥子姓蕃多一庭四世閭里艷
稱之垂白居外艱哀痛如孺子服闋與明經選
以祿不及養辭不就官子順民孫高翔皆列膠
序蔚有文名

朱士模字庭三別號蓉樵至性孝友純篤立品
礪行終身無玷士林重之弱冠補弟子員食餼
三十年試輒冠軍學使者皆以名元相期海陵
七子言志編模文尤爲膾炙人口南闈十一試
幾得復失者再壬午以明經薦應北闈試公卿

爭致之傲居蕭寺恬如也司成奇其文尤歎其澹泊古處爲不可及生平理學自命博極羣書究其底蘊爲文浩博精深羽翼經傳晚年善病猶嗜學不輟每與後生論文必以正學相規期於實踐易簣之日大書萬緣俱謝一正自如八字洒然而逝里人謂鹿洞瓣香於是焉在著有朱蓉樵時文行世其未梓者尚有解經評史若干卷藏於家子八人掄奇國學生秉奇郡增生品奇邑庠生雲奇國學生鑑奇郡庠生蘊奇業儒樹奇邑庠生建奇業儒

宮龍宗字掌雷太史偉鏐第六子性至孝友事親先意承志銳好讀書完室次日卽端坐肄業以附學生援 恩例爲貢士懷抱經濟深沉簡默處兄弟無間言居父喪每一慟卽聲氣不續及丁母艱弟兄羈宦喪祭獨力支持日泣血暈仆者再葬後廬墓二載竟以哀毀成疾卒年三十八舉二子長懋敬次懋敷皆孝友兼至恪守前型人咸稱爲孝友之報

宮鴻營字東表號易菴太史偉鏐第七子少穎異十三補弟子員十七食餼已酉省試不售益

淬礪於學經史百家靡不研窮兄大中丞夢仁
校士山左與校門事因病目還里不能作蠅頭
小楷遂絕意仕進肆力於詩漢魏以下靡不該
覽而古詩以韋柳爲宗五七近體得力於杜時
出入元白間所居齋亭幽邃疊石開徑四時之
花俱備顏曰涉園興會所至輒爲詩皆口授長
子懋信著有涉園集閒好軒口吟六卷行世妻
郭氏先卒卽不復娶事親最孝奉色承顏惟恐
不及親歿三年未嘗露齒待人極和易而涇渭
自分擇而後交往往皆訂久要鄉里中號長者
其家學焉

宮世洪字長源號澹菴太史紫陽第九子孝友
謙恭言規行矩性穎敏志高遠讀書一日十行
閱通博雅詩古文詞多所著述旁及書畫技藝
靡不精贍其兄大中丞定山每語人曰此吾家
白眉也課業成均冀酌大志見之施爲殆未可
量而攻苦成疾又疊遭大故竟哀毀而卒才品
兼茂論者惜之子懋道嗣其家業讀書自愛瀟
灑出塵諸孫皆能克承家學

袁爾職字肩山生而穎異每誦讀過目不忘六
齡卽擅神童之號少孤祖母戚氏撫循教養弱
冠以詩文名大江南北性純孝事祖母養志服
勞先意承志及祖病職醵天哀禱到左股肉和
藥以進沉痾立起由是同里敦孝友志端方者
皆趨仰之乙酉春恭逢

聖祖南巡職赴行在獻冊指授河工頌并紀 恩
詩八章

聖祖命登龍舟親加獎賞因疾未與纂修之列會宋
撫軍聘選詩集數載歸來恬淡自安寄情山水

秦州志

卷之六

五

生平著作甚富如招雲閣等集時人皆奉爲模
模壽近古稀子荀鶴讀書砥行能以書香忠厚
世其家云

沈之恂字子迪號退庵文學彞提道人獨子也
出就外傳不好嬉遊凡經書諸本先儒精義皆
手抄纂輯今古名人之文細字繕寫冊子盈箱
累篋手披口哦無間寒暑持古人繩尺不斤斤
揣合以故連不得志同學無聊者多易名就策
論試偶拉之闌入更名壯猷則已冠其曹然非
尙意也爰手諸抄本泣授其子曰吾休矣在兒

曹矣毋忘乃父志自後雖試輒冠軍益慝然不
安竟棄之專意課其子闢茆屋所謂芝圃者鍵
戶不許出於是長龍翔癸巳舉順天經魁季遴
丁酉亦舉順天辛丑成進士卒成其父之志焉
當恂棄諸生後課子外卽力田晚年家用是饒
不似彘提翁舌耕時然愛施予好周人急撫再
從兄弟之孤如巳子終使成立其賦性剛直鄉
里多推服之卽面折人過無怨者有不平且就
決焉壽六十五歲

王家望字小着居西園古松老梅藤蘿蔓絡草

深逕僻絕遠塵囂曾有昏夜叩門寄囊金者堅
拒弗納曰我寒士也家忽有此物恐爲禍妖卒
麾之去其清高之節率多類此以明經薦竟不
仕

王樹字大樹家世業儒積累深厚樹研精制舉
藝博物洽聞四方從遊者衆一經指授多成知
名士然厄於氣數久困棘闈屬望後人日夕口
授長子令上次子傳任先後入膠庠三子傳顏
早受餼粟諸孫皆濟美而傳顏之子家相尤爲
穎異齟齬能文弱冠入學卽補餼缺歷試冠軍

丁酉經元丁未會試引

見授建平縣學教諭

繆尊字黃日十七歲補博士弟子員試輒冠軍
食餼膠庠性孝友耿介事祖父母極愛敬奉甘
旨問安視膳不離左右友愛諸弟幼讀書覺正
寺文章講貫外卽勗以正心志立人品處已接
物非禮義者不履也生平不謀資產惟陶情詩
酒琴書而已文章純粹以理法爲宗辛酉科領
批闈卷已薦呈矣額滿復置所著近體詩孝威
鄧先生詩觀中多採之時文之粹以行世者尤

秦州志

卷之六

一頁

衆年垂暮手不釋卷終日課子孫戊寅以明經
薦子四人長鐘次呂廩生次賓次宮俱入學諸
孫之入學者已三四人

陳志球字念琬一字鳴韶太學生甫八歲失父
母孤苦自立性亮直言必由衷持身清謹不履
邪徑耿介寡合未嘗妄取一文處天倫孝友多
所推讓資用時匱然心無愧怍俯仰泰然逆來
順受晨夕古書一編啜茗焚香優游自適遇世
俗可駭異之事付之一笑而已晚年諸子續書
紳緞各成立讀書愛品次子纘舉于鄉猶及見

之

張彪號間嘯座生中丁卯副榜工詩古文詞達
百家諸子性最孝友母病曾割股以救待友人
慷慨直諒遠近聞者樂與之遊

楊瑚璉字古存恩貢生精制藝兼精於詩居西
村倡爲詩會以竹箋分題古風近體同人各賦
彙集成帙次第而評隲之海陵詩學振起爲力
居多

張欽字石樓鄞邑仕名宦張幼學子賦性慷慨
廣結納書法備古人繪事具化工手遨遊 京

師得片紙者寶若拱璧以西征辦馬授州牧將
選有以州佐謁選者持里中故交扎求代保結
同事疑之欽獨曰故人數千里相托寧有欺誑
哉遂慨然具結果以被累落職欽絕不介意河
督于重其才疏請經營河上一十餘載過門未
入及大司農遂寧張公保用而欽已沒旅次凡
沒王事者棺許入城欽櫬歸人皆墮泪今以重
金購其書畫已不可多得矣

陳仍字紹裘丁亥進士給諫忠靖之長子也博
學工詩文銳意承先七試棘闈數奇未遇由廩

生膺明經薦康熙己未

廷試高等授司訓方給諫官 京師時母沈孺人病

篤仍年甫十歲割股煮藥以進長益篤於孝友
子閭聞閱皆繼先志有文名

徐授璽字石章邑庠生性高曠閒遠不諧時俗
事親竭力養志恭兄友弟鄰里有緩急隨力相
仗助遇人明白坦率胸中無邱壑愛佳山水就
居之東偏疊石爲假山雜植松筠梅柳日與方
外雅客觴咏其間中年不治舉子業以家事付
二子昇鉉昇錄教之耕讀年五十八置酒別親

秦州志

卷之六

三

友寢疾數日而歿

王孫驥字白舫生平無他嗜好惟好作詩脫化
于李杜浸淫于玉川金荃然體格高古曹唐羅
隱而下視之蔑如也五十外始博青衫恢諧自
娛不屑屑于制舉之業晚年居近蔡蕙宅因自
號曰孝女巷詩人其子澎媳劉氏竭力供春酒
以佐笑傲嘗病肺媳剪臂肉以療之

徐瑞璽字輯章孝友性成十三歲入泮胸富經
史制藝發擗心得南闈十一試數奇未遇品行
日高卓與兄弟處相規以義一姊適縉門少寡

無子扶持守節五十年嘗過正州于旅舍床下
獲金一橐有人踰跟跡至察其情實卽還之又
嘗爲人勸聚棄妻驅逐邪鬼末年葺一樓顏曰
靜觀朝夕與杜子唐應冒子天庚講論其中壽
七十有七子孫多遊庠序

王鴻藻字彤鵬號目山心齋先生六世姪孫也
早歲食餼文名藉甚丙寅入都以廩貢 廷試
第一丁卯考授教習大總裁鄴園李公有裴楷
清通王戎簡要之目時有言官建短喪之論者
奉

旨下其議於成均命諸生於 午門各抒所見以對
同人或唯唯逶迤公獨抗聲直言謂三年之制
訂自武周斷自孔孟萬世莫易諸公卿皆以爲
然而此疏遂寢一時莫不重公之膽識以爲他
日立朝蹇諤必能不負所學也旋以父七十奉
養歸里遂丁外艱哀毀骨立寢疾而終生平慷
慨仗義任事有肝膽宗族親朋皆倚任之所著
有鷗吟集六卷行世妻吳氏苦節四十年上奉
菴姑下撫幼子篝燈課讀教之成立長 斗國
學生次麗斗邑庠生皆能讀父書云

王鳳藻字玉衮號立山弱冠入學試

餽風神秀徹常自淬厲穿穴百家下筆如懸河
倒峽發程朱之奧旨棘闈數薦困于數奇砥行
端方廉隅是飭孝友慈愛誠信不欺性純篤不
逐時趨海陵豪俊多出門下借朱蓉樵陳曙峯
諸前輩共著七子言志篇行世中年失偶終身
不續年逾古稀好學不倦應辛丑年歲進士教
子山斗紹延訓遊庠序繼起者多人

高琰字榦侯廩膳生祖文玉字藍田明季任兵
道部下哨官時值寇氛分汛宜陵鎮同官欲

橋阻寇玉不允挺身禦患民得渡橋全活者無
算父日起字鈞輔篤行早沒攻承世德之後仁
孝性生幼時曾割股救父事孀母劉氏竭力老
養割股以療者屢矣事長恭_恭遇物以信扶危
濟困不吝嘗有應得之金讓於貧友或親友構
難輒揮金暗爲消釋事過友尚不知早年工舉
業名噪一時閉戶潛修多所著述力行功過格
衆推爲純篤君子中年卽世里人咸悼之子簪
纓字偉謨繩武字仲承俱登仕籍孫列宮牆
曹振彬字叔繡天性誠恪舉止端方承先人

文鳳樓之後五世家教學有淵源父遴名噪庠序中年卽世彬常有風木之悲敬養孀親友愛諸妹遂寧張文瑞公敦行錄中有勸孝一則日爲佩服兼梓以勸人蓋不欲獨盡孝道也平居澹泊寧靜自砥廉隅絕不問戶外事人亦不以他事干之爲文深沉細密理正法正不爲詭遇試輒高等食餼三十年已領齋席猶晨夕好學楷錄書文值功令新行舉優哀然首薦學使鄧殿元拔其文尤獎其行明年成歲進士例得司鐸之秩紹祖武矣

徐六璽字紫章性喜讀書未冠卽補博士弟子員生平廉介自持杯水勺漿不苟且一夕友人招飲歸問僕曰今夕之設何來僕曰某爲作訟牒以此相酬邀主共飲耳六璽悔之以箸椿其喉哇出乃快其狷潔如此捐貲建育嬰堂躬董其役全活嬰兒甚衆事繼母至孝有孀姑貧而無子乃收養四十年老死歛葬皆從厚與人處言笑不苟靜則閉目端坐里人稱其方正

朱兆乾字健菴號御乘鄉賢望鹿公之長子也幼失怙事母以孝聞性敏好學甫弱冠登膠序

有文名屢試棘闈數奇不偶繼以明經選祿職銓曹因母老不忍輕離卒泉石以終其身懷才未展論者惜之居恒慷慨好施樂善不倦葺安定公祠創建察院考棚撫育遺嬰不獨毅然捐貲以襄盛舉且晨興任勞毋少怠他如修學宮設賑濟以及廟宇州橋亦并捐金樂助遇親族中喪娶事有力不給者悉周之生子七人入庠序列成均膺歲薦蔚起者甚衆

戴皇恩字浩如邑增廣生性厭浮華讀書窮聖賢理楮歌雅誦戶外聞金石聲詩賦皆出性情

飄飄有凌雲御風之意左國廿一史離騷諸書手加丹黃困棘闈十六次廣陵薦紳名士多出其門問字者戶外屢滿年八十三隻鑠如故臨終沐浴整冠端坐歿著有禮記正詮詩經指南樊川草堂詩集行世

韓鍊字似鯉明經敏之少子也生而穎異髫年遊泮潛心經史制義之外兼工詩古文詞魏太守以國士許之文名籍甚學使鄭公拔置首名貢入太學鄭公及三韓法公俱邀聘衡文其識力雖老學未之過以新例授直隸州判惜赴玉

樓不永其年歿時年三十有二

篤行

陳王猷字贊字簪纓舊族性孝友樂善好施戚友困乏者稱貸不倦遇物謙和教子孫以義壽至百歲州大夫禮請鄉飲大賓康寧好德子姓繁多其第五孫開第今八十五歲既壽且昌鄉里模範世德所由來也

田士龍字春臺太學生孝友性成品行端肅學問純粹康熙四年舉鄉飲大賓旌以熙朝憲老之額生子毓莢字卜朔人品學問推重一時慷

秦州志

卷之六

五十六

慨好義處鄉里間排難解紛至今嘖嘖人口亦由太學生候補州司馬

陳夢兆字隆隱明鴻臚寺序班性寬和樂易有長者風教子孫以禮法家人化之里黨之中薰其德而善良者甚衆遇有公事不吝捐貲見學宮圯廢毅然力爲修復兵燹之後遺骸暴露親行田野隨地瘞埋歲飢賑給悉傾囊爲之人或以非禮相犯惟修德相感化從不與校州牧陳素聞其賢于崇正十四年延致鄉飲介賓壽卜有五子孫奉其彝訓多遊庠序有文名

田毓葵字蘭玉鍾宇之長子孝友朴誠平心率
物次弟毓芝三弟顯吉父歿之後盡心輔導自
任家務俾二弟得專攻舉子業以祖居湖北恐
閱見淺狹乃送之入城讀書薪米時餽不絕後
毓芝有聲庠序顯吉登順治辛丑進士皆葵左
右之力也屢徵鄉飲大賓子五人鑑鉉錄錦欽
皆著名譽次子鉉康熙丙午舉於鄉

徐日明字南麓性純孝侍養父母年七十定省
無少間昆季五人明居三兄弟不事生業屢分
貲給之課諸子姪登膠庠者先後二十有七子

泰州志

卷之六

五七

孫冠裳不絕至若還遺金賑康粥鄰人貧不能
葬爲助瘞之友人窘甚焚券不責償其他厚德
不可枚舉故鄉先生交口稱羨公舉鄉飲盛典
學使諸大人皆允行焉

以上俱鄉
飲大賓

仲伯篋字斗聯號坦齋振華次子也幼孤事孀
母呂氏克孝五十年如一日他事憂恣見毋輒
怡然改容性端凝少宿村舍有鄰婦潛奔寢所
厲聲叱之明夕徙寢生平接物至誠行已有法
度從無一違心語無一欺人事見統袴之子則
避之靡鼻之音掩耳弗聞也居常訓子弟及他

人謂稼穡外無可取讀書外無可習文章外無可友也與子訂交者必省其言動有不可者命屏勿與通晚年杜門博極羣書尤嗜邵子詩文往復雜誦自顏齋曰師堯居鄉人服其清介恬淡年五十三卒配盧氏生子三長琰郡庠生次鼎龍雍正癸卯正科順天舉人三彭年廩膳生以優行薦于鄉

余維璿字玉衡先世歙人僑居安豐場太學生考授州佐天性純孝父病喘每一舉發輒不能卧璿日夜經營調攝皇皇如不欲生父没并奉

高曾祖六棺歸土嫁諸妹授諸弟室心力交瘁所手自創業分產時唯弟所擇尤人難能他如請疏運河浚竈河請賑五場爲育嬰堂遠計諸善行難悉書享年八十二子四人孫十四人曾孫六人爲善者昌信哉

吳應裕字涵卿先世自黃山遷揚分派至泰世多隱德裕孝本天性年十三母疾篤刲左臂肉療之母没逢忌日必泣下酌水不入口事繼母如親生誠敬備至父顧而色喜父捐館遺幼弟兩人皆爲婚娶裕手創千金產業盡讓兩弟鄉

里稱道順治九年渡江見有七尸漂泊買棺葬之壘墳以俟識者康熙七年有揚州友人許某負鹽課千金棄家逃去妻孥困囹圄裕不忍坐視出已力爲完納因得寬釋其他舍已從人焚券等事不可枚舉生子學禮蚤列成均例授儒林郎能光前業媳潘氏淑慎柔嘉克勤克儉遵先人孝行承先啟後孫四人志臯博士弟子員志夔癸巳舉於鄉志益志稷皆有文名一堂孝友能世其家

王孫驛字阜馬從其父相呂任淮寧教諭呂死

難時驛大呼奪刀救父亦被賊斫其頭髓死良久復甦有異僧以藥傅創口數日愈乃捧父印想于太守得邀 旌典耄年州守武聞其事命子而文扶掖入署坐而禮之手摩創痕深爲嘉歎賜額曰錫類

沈江號一水太學生天性純篤曾刲股救親一時稱孝子孫稟其教世德相承旣壽且昌年九十八前學憲張旌曰雙松並峙州牧魏亦旌曰商山一皓妻金氏壽今八十六幼事尊嫜亦以孝聞敬事夫子慈馭婢僕睦宗黨卹隣里聖洵

之稱尤義焉

周昇字定九庠生善畫梅生平鐵幹嶙峋經霜雪倍見精采亦宛然梅也王孫驃力除馬蠹始約同事者多人及見羣蠹猖獗又聞有奧援則稍稍散去生死不相背者獨昇一人王生却金暮夜四知外知之者昇也遇羣蠹於金陵克鏹甚銳非鼎奮袂前勢且不免事平對酌梅花下言及前事聞者毛豎王生臨終命其子晉原以赤藤杖贈鼎爲別曰我兩人擔荷大事扶持桑梓如此杖云

崔士偉字樹駿邑庠生性高曠閒遠樂天自得胸無城府不喜爭競愛佳山水嘗偕其妻吳氏率子孫扁舟遠涉爲西湖之遊歸築別墅于南村爲落木山莊引流種樹四時之花皆備迴廊曲徑綠蔭朱閣春秋花時招致名流賦詩飲酒其中遊者如入輞水桃源壽八十有五鄉人欲舉飲賓笑而謝之

王相吉字爲憲太學生早年艱苦倍嘗然信實端亮不以窮改節姻親事舉相倚仗中年家道稍裕曾有故人歿多所負欠吉往撫柩痛哭聚

券焚之其子泣謝吉曰我自安我心也何以謝
爲哉其他隱德亦多如此

童希聖字仰之天性耿直篤於孝友父母早逝
待兩幼弟事事竭力尤關心桑梓不避艱險曾
因康熙二十三年秦邑水災人民逃竄微賦維
艱恭聞

聖祖南巡率衆往省十一月初一日在雨花臺喊奏
侍衛鞭之

聖祖諭止侍衛取本章親閱 命部堂大人傳秦州
百姓跪聽

秦州志

卷之六

重二

上諭

皇上已經親過知道桃源宿遷山陽高寶興秦七邑
水災困苦俱已知道自有區處爾等回去

旨下謝 恩欽遵隨即入 京繪圖陳請投揭閣下
幸邀全蠲將災糧盡作板荒地至二十九年
方報涸開徵前後共免銀米五年約蠲免四十
萬金此皆

皇恩浩蕩俯採芻蕘一而希聖冒死陳奏其爲功于秦
邑不小希聖有弟希堯精岐黃亦爲邑人所恃
賴今兩人之子孫讀書遊庠序不愧義門云

曹寅孝樸誠忠厚年八十有八其先人號順卿者壽九十有七積累非一世宜其德壽之遐昌也

朱朝覲字寧國質朴仁厚遇凶歲嘗出貲以周困乏鄉人賴之生全居常義方教子後以子士楨贈登仕郎

陳家振字超宗天性孝友醇謹無疵七歲少孤育于伯氏裴仙事仙如父長入成均考授州同知康熙丙子水荒出粟賑粥活飢民甚衆里有貧乏及婚葬不克舉者出貲助之絕無德色輕財好義排難息紛鄉里多重之子道庸國學生孫起潛起渭俱以忠厚世其家

陳芄字繼郇太學生世居黃單庄祖省吾生二子長璧田娶周氏早卒次廷璧娶戴氏生芄芄最孝凡事陰順親志事寡伯母周如母外王父戴浩如名人也再傳而絕芄曰戴吾所自出忍令暮年無依乎迎養三十年殮葬從厚芄性淳樸敦古處族親中婚喪者助之或惠藥贈棺下河罹水患盡散儲蓄村遠近待以舉火嘗在天長道中遇有婦携女富家買爲婢女別母哀甚

芄問之泣曰父繫獄甘賣身以贖惻然歸女不
取其直夜過樊汭盜至見芄端坐詢姓氏曰此
長者不可害妻戈氏生二子長丹書太學生次
嘉書歲貢生

許以誠字

朴實純靜素爲鄉黨所推重前
牧田作澤從民之望舉延鄉飲大賓

周篤慶字心友秉心仁孝弱冠遊泮書無所不
窺尤究心岐黃恒施樂濟人雅尚節義人有緩
急必傾囊以贈或罹禍患至破家相助不悔其
姪爲人侮慶挺身直之不言所費祖塋前有地

數弓悉地主之別售也以已百金產易之曾以
治河策謁于靳兩中丞皆見施行又曾謁儀封
張撫軍極承褒獎問歲豐歉人民疾苦慶深佩
服之後撫軍解任慶獨揮淚隨侍及撫軍奉
旨復任慶不一往見也晚年卜築湖村栽花煮茗自
娛子四各守父教雍正癸卯恩科子之松聯捷
成進士人以爲長厚之報云

俞允瑄字宣人博士員俞朝鑿第三子也純粹
孝友恭和忠信讀書明聖道闡性理闢良知親
賢遠奸避喧好靜常奉文昌大士像步趨必告

於神明娶朱氏內助賢淑無煩瑣著明德篇致知論二章子維植恭謹如其父瑄易簣時囑朱氏曰吾身後當加意延師課子將予所撰文求師講明令子熟讀開其正路萬勿負吾志也又命其子曰用心讀聖人經書講習理學功夫不可作時文章句儒卒年四十四子維植入太學屢試南闈登仕籍文行爲鄉邦推重不愧父訓林元鼎字鉉吉壬辰會元林春後裔也天性純謹舉止端方童子時具老成器識父師咸嘉異之長厭繁華敦崇實行孝友謙冲研心理學鄉

黨親族皆無間言待人率真好周濟教子親賢賑食施糶年逾七十猶孜孜不倦舉三子長著登丁酉科賢書仲芝季夔皆守義方勤誦讀能以忠厚世其家焉

吳銓字公衡性孝友篤實感庶母王氏守節撫已養志承歡事如生身有二弟窘以私創業益之必與已埒始快倡建育嬰堂於南門生全者衆水荒罄蓄以調里黨晚齡焚逋券千四百餘金且誠子孫曰倘有焚餘之券勿復取也督憲于獎以額曰好是懿德

吳湘字岳生儒童附監候選州同濤皆吳銓子
至性敦篤且幼稟父訓父患血淋陰塞痛楚號
呼湘以氣吸之得通如是半年病痊體父志敬
事庶祖母王氏業師某貧老迎歸養殯之父命
回籍掃墓兼收租麥時值大旱湘以麥易石各
置一碑於歷代祖墓餘數百石皆散之親族徒
手歸父嘉之年廿二早死濤值父病泣禱於天
願減壽益父父愈數年果同時死長兄湘弟淞
皆先濤沒敬寡嫂沈氏如母愛湘子邦柱淞子
邦極等如子教以讀書制行前牧施獎日一門

純孝

吳邦柱字石臣州庠生吳湘子生四月而湘沒
母沈氏年二十矢節母子姊弟相依爲命姊適
卞氏早亡遺一子一女家中落母隱憂之柱因
迎育於家立標書請官鈐識俾甥卞夢元同子
一體給以家產毋大慰越四載齒落重生柱爲
庶曾祖母王氏母沈氏從媡池氏請旌往返江
南先後六年風雨盜賊水火皆遇卒成其志中
年妻死不再娶舊塋歲久被侵占力陳郡太守
復之養殯母弟及業師爲表弟婚娶倡買庵廬

爲舊籍人養病地并置塚地葬舊籍客死者曾
買一婢詢之其先人爲本衛所官立返之而不
取其直其僕人朱李者父病剗股柱病又剗股
亦其義所觀法與恩結也纂有闕異彙抄行世
沈自明字開之篤於教子好善樂施不存餘蓄
育遺嬰施樵襖重修元武殿佑聖觀三元殿濟
物之事力行不倦歲大水海溢濱海之民露處
野岸不能炊煮人多飢餓自明每晨買燒餅數
石煮茶數石親往散結凡兩月餘賴以存活者
甚衆制府于公賜匾曰好是懿德子士望弱冠

遊庠能繼父志

陳晉吉字錫蕃郡庠生祖應旌山東布政都事
父王業恩貢生甫補推官未任卒時吉彌月閱
四年生母王氏又卒嫡盧氏無出教養兼至後
盧病篤晉禱神剗股得痊鄰人以女賣某氏爲
婢數年音問不通其母病日夜望號思一見女
吉慨然代贖携貲諷以情歸其女吉嗜靜日坐
小閣詩茗高寄生三子長喬岱次朝言剗股療
母病季朝策年十一即知嘗藥滌穢云
陳忠讜字敢言邑庠生性至孝順治戊戌年

甫十八歲父母俱遭危疾先後割股肉以療之而皆愈父母皆登^上壽學院獎之曰孝秀可升海道旌之曰髫年篤孝次子鑑郡庠生於康熙乙丑年亦割股以愈祖母其長子堯銓邑庠生有義僕青霞於康熙己卯年見主病篤涕泣割股救主而主亦愈可謂孝義盡出一門矣

周尚文字聖從六歲怙恃雙失賴堂叔父母撫養及其長也報本生父母廬墓三年事叔父母生事奉養竭力葬祭盡誠服叔父母喪三年兩弟甚幼甚如同胞立身制行端方正直與物無

侮終身無罅隙可議術擅岐黃從不計利專以濟人爲心凡遇貧者濟以藥餌又助以調養親族中貧乏者冠婚喪祭無不^不助助表親中有馬氏遺子八歲女六歲無所依歸提携撫養以至成人男婚女嫁尤人之所難者

戴露字仙盤號拙叟居鄉以孝友樂施聞父歿有庶弟數歲撫之如父在時遺產盡予之不取一椽從弟三人父死母嫁收於家親舊待以舉火者數十家家世精於保嬰藥無不愈至今有髮種種而行持鳩杖者猶自言曰非公莫至此

也

施一儒字

母翟氏守節撫之儒亦純孝事

節母承歡養志終身儒慕母苦節四十餘年見
儒能成立教子孫晚年稍自慰籍母歿儒哀毀
通常可稱是母是子

劉九臯字鶴亭父元慧字定生宿儒設教從遊
濟濟生臯性抗爽灑然塵俗外重義輕財明末
州人避寇欲徙者衆臯稽於神謂寇不至州衆
恃以安鄰人吳氏擁巨貲將有遠行恐爲人掠
揮淚叩首托之臯爲晝夜防護寇退歸還封識

如故康熙戊申於鎮江旅榻拾棗金遲行以待
之遺者果至驗確悉還其行誼多類此生平好
交遊耽吟咏所存有林餘草晚年著書教子子
靖字阮仙邑廩膳生善詩文有太乙閣詩槐陰
堂草譜集孫承堯字一中邑庠生試藝曾爲宗
工特賞

嚴士良天性純孝自童稚至父年八十三而孝
思益篤疾病願捐軀以代仰體父志親族中不
足者勉力周全羣以孝友稱之壯而學業愈富
兼及岐黃神乎其技功能濟世不吝參珠重寶

合藥以救貧苦頌揚載道貽父母以令名可謂
孝子矣享年七十有三子濟寬入學勵品擅文
譽

唐繼靖字聲遠十三歲喪父奉母居孀備歷艱
辛竭力盡孝遺產淡薄親課耕獲以供甘旨妻
韓氏拚績以助之母病湯藥必夫婦親奉不假
手于婢侍同母一妹之變鴿原抱痛不吝貲財
枕上淚痕席間投箸猶恐傷母心也大中丞雖
州湯公鑒其孝友哀而許之生平排解紛爭隱
爲傾橐不令人知查復學田修葺文廟効力居

多以州庠屢試南闈子愷太學生亦經四試僥
得復失有孫八人長嘉璉次嘉琇俱善讀書遊
膠序餘方蔚起

楊錦字雯若太學生性沉靜寡言笑輕財好施
樂善不倦居富安場街道長三里許杙捏崎嶇
捐金輦石獨力甃治思振闔場文運獨創魁神
閣又清釐市租以供香火建家廟奉神主前爲
塾館延師課子其中風木衙悲捐請封典以
伸報親之志

吳宗光字亦裕原藉新安其父遷秦州遂家焉

性孝友因葬親于泰念先世之喪多未葬者還新安葬之兄歿撫姪如已子姻戚有孤幼亦撫之至成立與人交開心見誠無絲毫浮偽教子義方子邦材讀書勵行入太學屢試南闈登仕籍

朱銘球字函一邑庠州同母病篤對神割股療疾母卽愈持已方正志在有爲丙寅年揚屬考棚移駐真州球倡首呈請復駐泰邑鳩重貲重建試院樂善好施修橋平路里中咸稱長厚生七子長弘次淳三治四浩五澍六湘七湄蜚聲

州志

卷之六

五

庠序其三子治拔貢任當塗教諭有詩文行世孫枝繁衍

徐錦字九章邑庠生事親極孝有兄弟然大事自竭已力不相推諉兄乏嗣養于錦之家其弟早歿代急徵輸蓋友愛出于天性也襟懷寬坦不較曲直尤爲人所難

韓穉字公魏事親至孝母歿猶養表弟之不能自食者二十餘年弟敏力學成名儒其培植之力最多忠厚樸誠直言無隱得財每分濟貧乏終身行善不求人德鄉黨稱爲長者子鶴邑庠

生

施震鐸字千里邑庠生少負才名能文兼能詩其妻周氏亦才女安貧樂志倡和成帙詩最選中所載其片羽也鐸嘗賦平山堂詩有五更風雨隔江來之句見賞于商邱宋大中丞由此詩名噪南北試棘闈十一次晚年詩酒自娛有古人樂道之意子輔衮姪惠列州庠文名甚著萬士正字瑞生候選縣丞振遠之父一生茹素壽高財裕好行善事茶湯賑給樁架施恩遠近賴之嘗捐資倡首修理城外大街葺承前修諸志

卷之六

五

善士中之杰出者也

戴笠字雲笠一字剽夫冲和閒遠雅人深致先世業曲臺言必稱古禮行事亦遵之家積縹緗併先民手蹟庭前雜種花卉笑傲其中詩字俱蒼古如虬松瘦石意趣瀟灑隨筆作蘭竹得坡仙遺意二三老友鬚髮皓然追叙往事佻佻時輩稀得近之家傳保赤之書亦數十世矣精明慈惠隨手生春襁負而至有趾相接也年近九旬不輿不杖步履安舒望之者以爲老人星瑞

云

徐九章其父母止一子母病臨危參木無資會
皇莫措乃以雕刀挂牆上刺開肋骨血自流出
割指許煎湯奉母母有起色不能納粥糜媳翟
氏輟其七月兒乳以乳姑竟獲痊愈雖閭巷愚
民昧于盡孝之道然時方危急止知有母不知
有身亦可謂誠十孝者矣潯江施公極尊禮之
蓋以勸孝云

劉亮字申生邑庠生勤舊之後管工創建試院
瓦棚實心辦事晝夜勤勞經畫周詳工程堅固
竹頭木屑皆有簿籍無絲毫滲漏刻期成功永

秦州志

卷之六

三

久賴之

黃喬年字晃仙太學生讀書自愛綽有文名屢
試不遇尤工詩賦遠近爭傳後字畫稱為雙絕
年八十子植女楣亦工字畫清苦安貧不愧為
高士之後

江河容字爾大徽州婺源縣歲貢生為木商於
秦遂隸籍秦州老成信實輕財樂施凡友朋隣
近有無相通不權子母每多陰行積善子光樸
弱冠工制藝學使者拔入秦庠閭里咸器重之
潘大成字葆光以字行邑庠優行鳴鳳之長子

也生有異才負奇氣善屬文博通經史千言立
就性孝友雍和其母秦氏病劇曾割股以救篤
學善屬文太守魏公一見目爲俊才期以遠大
攻苦致疾而卒魏太守哀之爲作斷句四章曰
傳得名花種洛陽誰知花發妬風狂憐他心嘔
如長吉不得留名古錦囊 識得咿唔怕淺膚
少年偏下死工夫慧根豈爲來生結羊祜枝環
認解無 不見魂歸華表月可憐人去茂陵秋
療親割股今還憶痛煞高堂悲白頭 俄傳哀
訃慘留題筆亦參差韻不齊莫使安仁月下讀
一聲聲是斷腸啼觀此詩則葆光之才與太守
憐才之意皆可見矣

袁平江字六占孝親甚篤常懸遺像于中堂事
之如生晚年極講理學于性天之旨多所發明
錢允萬字 生平儉朴布衣做履力行善事
不吝數千金常獨修河墾塲新橋易木以石與
秦州迎壽橋高廣相埒又修本塲街道蓋亦一
鄉之善士云

范常字君恒心直好善潯江施太守因公罍誤
焚香禱天痛哭不休未幾制府傅靖端公果爲

題奏太守復任談者謂常之誠感所致云

徐文炳字明臺邑廩生天性孝友事親竭力奉
甘旨兩弟欲析居卽相抱而泣嗜學不倦涉獵
經史著有洞酌集天啟四年署州事翁延壽署
學事張希哲纂修州志聘入編摩佐劉大叅作
傳云 此後二條應入儒林因到遲附入篤行

徐宗毅字建章邑庠生天性仁孝舌耕力學妻
楊氏紡績內助艱苦四十餘年許文宗首拔入
學遊其門者無不功成名就教人文行兼勵所
著有爲師勸懲錄以端師範一生正直一字不

入公門遠近親疎欽爲正儒壽七十有八 儒林

紀友義號天彝國學生孝友性成慷慨素著好
善樂施捐修街道鄉黨賴之長子文鼎入庠次
子崙入太學諸孫英異皆有文譽

單嘉謨字 邑庠生孝友篤行因父學道有

疾割肱和藥瘳之事母純孝母歿事繼母馮氏
與親母同撫愛其弟五人_不間於乳之同異也
曾捐資建 關帝廟廣施藥材陶成後學壽七
十四歲子元卿元豐孫廻明經邁遲遴及曾孫
雲壽露等俱列膠庠有食餼者

王家楚字檉羽邑庠生鹽城司鐸孝廉孫驥之
長子也事親事長待兄弟俱極純篤謹承家學
文尚清正爲遂寧張文瑞公所識拔生平不與
物忤雖遇村翁隣叟亦間間笑言和氣可掬生
一子鍾嶽髫年以第一人入學旋即食餼名亦
冠軍

徐驄字天駟鶚字丹儀濯字劍成三代嫡系膠
序相承皆前庠生文炳之後嗣也文炳協修州
志有功桑梓驄等四世同居遵先訓孝友讀書
世德清芬賴以不替今其子孫之繼起者方興
未艾亦和氣致祥之驗也

周露字季友弱冠遊庠旋升大學樸誠不與人
校往往代人還子錢以是屢空人有爭較竭力
排解不吝傾囊又曾還遺金隱善甚多年六十
二邁疾就醫邗水夢神人騶呼至曰夫尚代我
明日又夢答拜神以舊政告旣出多跪迎此中
有故人陳介眉云作冥吏請赴任期以八月二
十五日旣覺卽歸治後事屆期命家人寓車馬
盛供饌談笑而終後隣人繆九璵死復甦云見
生以巳陰德增壽一歲又卞德臣于江中夜見

生乘大船鼓吹張燈而過呼之卽應事與石曼卿主芙蓉城相類里中多傳之蓋亦濶生之朴誠而念之不置也子之柏失怙時方八歲令業儒善讀書

王志寬字振凡前鎮撫禮之後也居心正直遇人應事常存厚道宗族閭黨以孝友稱之與孫開緒等倡修濟川橋寶帶橋力行善事至老不倦壽八十九妻蔣氏賢淑善持家壽八十八子天兆天章天德能承父志捐修大街天章入太學其子謨入邑庠餘皆英偉

蔣一麟字仁趾性至孝明季兵亂居民遠竄仁趾父慎吾卧病在床不能行走仁趾侍父疾親奉湯藥兵至麾之不去哀告以實兵曰此孝子也遂相戒勿犯家獨全焉

黃宸字御九州庠生天性孝友親旣歿歲時必哭於墓終身不易兄庠生虎公早沒訓其子爲州佐訓姪孫新入州庠康熙五十三年蝗災捐資賑粥施棉襖百件次年水賑米百廿石其他賑棺櫬清義塚修十橋梁善行不一前牧武獎曰品高德厚魏獎曰品行可風

張伯鯨字繩海江都籍泰州人萬曆丙辰進士
任歸安令抑強暴勵善良三載卓異調鄞縣漕
潮敗田禾爲郵積害公捐築堰埭民利永興復
調盧氏令多礦盜聞風悉遁由是政聲上達拜
兵曹督延寧糧儲通商賈用駝運以省民輸晉
階廵撫延綏立功授金吾世襲會病乞歸尋起
督餉擢兵部侍郎攝尚書事足疾求罷章七上
乃許順治乙酉揚州城破自刎死

黃鑄字本凝戊子科舉人湖廣寧遠縣知縣居
官清廉惠愛百姓歸里後放懷詩酒後學成師

事焉

許光震字電青乙未進士居家孝友繼母胡氏
卒遺乳子光騰震命其妻李氏分已子之乳以
乳之長成婚娶析居與同懷無異筮仕鳳翔適
會水災民艱於賦遣人回籍鬻產代輸銀數千
餘兩以親老告歸鳳邑人追思之歸里斑彩娛
親與兩弟一庭聚順送終大事竭力盡誠足爲
鄉黨取法所著有經書文稿行世

唐口宣字爾浚號兼湄邑廩生篤志嗜學里中
稱爲長者房薦三次未遇以子麟翔貴

勅贈文林郎雍正二年

誥贈奉直大夫

唐麟翔字石郊號竺巢癸未會試第三名

賜進士出身初任射洪縣令時縣志久闕捐俸重修
製文廟祭器建陳子昂讀書臺士民感之建
坊於學宮康熙丙申內擢吏曹雍正癸卯改
牧晉之霍州革除市肆差徭邑人立碑垂後甲
辰調蔚州恭爲

聖諭廣訓註疏博採羣書遂字詮釋朔望則聚城市
村鎮士民再三講解每月會課生童彙成蔚蘿

泰州志

卷之六

頁

課藝一帙致仕後有去思碑所著有四書五經
文于篇并詩古文中聲集行世

陳大俊字乾生邑庠生天性孝友壬午秋誠浚
江舟懷同溺者皆死乾觸行舟得救歿之前一
日與妻子訣別自知死期死之三日將大殮有鶴二
三百爲羣向棺長唳而去人以爲三異云



秦州志卷之六下

列女

唐徐氏廩府妻夫沒教四子義方經明行修

宋姜氏張儀妻年二十而嫁越二歲夫亡孀居守義

壽六十五終延祐六年州倅衛中順申聞旌表

元張氏名貞盛爨網妻至正癸巳賊寇秦州氏爲賊

所得犯之弗從賊露刃懼之罵聲愈勵賊割其左

肱筋骨盡露罵不輟卒見殺時年三十一編修蘇

大年爲撰墓誌

卞氏年二十三以良家子爲江浙行省左丞潘元紹

秦州志

卷之六

妾元紹將敗趨入室以帨自經同死者七人號七

姬墓潯陽張羽作權厝志記之

明陳氏年十八嫁士民李巖越十有一年而夫亡守

志弗奪壽八十州守張遇林具奏御史呂俊嚴實

洪武三年旌表

劉氏朱斌妻也年十九而斌卒遺孤懸童僅一歲劉

氏能執婦道奉舅姑及歿葬之如禮雖子幼家貧

終無二志永樂二十二年旌表

竇氏陳貴妻夫早卒遺孤方四個月竇氏業紡績養

舅姑備歷艱辛栢帛之風凜然宣德元年州同何



珣具奏旌表

何永明妻沈氏二十三而寡弟永昭妻楊氏亦二十
三而寡沈子謙楊子誠皆在襁褓相與死守惟勤
女紅終養其姑二子各獲有成蓋天培完節也郡
守匾其堂曰雙節

趙氏王本妻夫歿年二十四堅心自守誓不再適非
歸寧及謁墓祭祀中門未嘗出其侄教諭王定在
太學時於景泰六年上其事命下而節婦歿矣

顧氏年十九嫁胡鎧踰年夫亡遺腹四月誓不再醮
生孤鴻時家貧姑老紡績以養比歿鬻衣殯葬亦

秦州志

卷之六下

二

畧成禮孀居五十載水霜比操有司請旌表其門
周貞卿者周沂之女通書史問知大義年二十三歸
庠生許鏊值門祚衰落躬親紡紝資其力學僅二
年鏊卒無所出日夜哭不絕因自縊翁媪覺而救
之得不死遂絕黛墨跡不踰閫日上堂奉姑惟勤
不以貧窶養少衰及終哀毀甚至與其侄相依爲
命嘉靖改元奉詔書恩例郡守金廷瑞具絹綿米
肉勞之

韓氏叅政斐女百戶熊綱妻也年四十未有子側室
陳氏生子政韓字之如巳子以襲父職鄉人賢之

有王氏者北京驍騎王世英女綱督戍抵京媒妁
詭言失偶求婚於王比歸始知列在小星乃自安
義命無恙容綱卒內外咸謂王少而無子當別適
會有同知王某喪其配同亦燕人女媒議及之王
怒詈其子政曰焉有以母事人而忍以醮人者耶
卽自髡其髮坐臥一室守志終身人以爲賢節萃
於一門云

儲氏太學生劉啓賢妻庠生光裕母也舅臥癱病夫
患贅瘡朝夕虔侍者十餘年甫三十舅與夫相繼
捐館事姑育子備歷劬勤姑患大腸燥結如廁必

秦州志

卷之六下

三

得人徐導之儲氏朝夕同起居以身任之者二十
餘年或欲代之必曰姑年老汝輩不審輕重不可
曰此予分內事何與他人姑竟以八十壽終教子
義方早年入泮亡何暴卒於外悲號辛楚惟撫子
婦張氏坐以待斃年七十餘日夕勤女紅無懈郡
中語孝節者必首稱焉

沈氏少司馬沈良才女十八歲歸諸生陸應昌半載
而寡撫遺腹子必大亦爲諸生守志至七十三而
卒遭家道旁落含冰茹荼人所不堪而無秋毫見
顏色臨革語侄道隆曰好送我至海安海安乃應

昌之穴所在也其始終不渝之節彰矣撫院屢賜粟帛至萬曆丙午按院黃題請建坊旌表
王氏富安場崔邦仁妻夫亡無嗣王年二十七撫猶子希旦守節六十餘年鹽運司副使楚孔生題其門曰倡導九州風化擔當萬古綱常具呈撫院奏聞匾其門曰貞節壽八十五乃終

王氏適生員顧廷問未三十夫歿哀毀絕粒誓不欲生舅姑百端勸慰乃茹慟撫訓遺孤夢圭夢麟并遊庠序季叔廷策無後遺產千金族議仲子麟爲嗣氏峻辭不許曰未亡人何以見夫君地下也發

秦州志

卷之六

四

居五十餘年壽逾八十各院屢經旌表

李氏杭週側室夫卒年二十七無子止育一女人有議其再適者則峻辭誓絕之杭氏一敗塗地宗中一無可托依女夫郡庠生潘體元矢節彌厲五十餘年乃卒

孫氏楊氏安豐吳湏妻妾楊氏生子守斌五歲湏亡孫年二十九楊年二十七同心守節後孫早卒楊年七十餘離院屢旌表之里中稱一門雙節

徐氏繆廷梓妻桂卒無子徐年僅二十五撫猶子好義爲嗣好義卒更撫從孫師文爲好義子惓惓爲

夫一念五十年如一日也

繆氏年十九適鹵丁張鶴三年鶴亡誓不再醮年六十州守轉聞當路署門獎之高陵呂公爲序以彰其懿

徐氏茅家莊翟賢妻年逾二十夫亡無嗣守志奉孀姑柳氏有族人利其產以子爲之後且諷其姑迫嫁之遂引刀自誓姑歿殯葬如禮盜夜劫其莊率相戒毋驚翟寡婦其節操卽強暴稔知之

阮氏諸生李國柱之妻夫卒阮年十八撫遺腹子天培相依爲命守節至四十餘年卒

泰州志

卷之六下

五

李氏戶部王事李彬女適生員沈行可沈早卒無嗣僅一女李年甫十七守節自誓無二志萬曆十三年代巡李棟郡守李裕旌獎優以粟帛之典

葛氏工部主事陳應詔室夫卒甫二十自矢從一金石比操撫子于蕃入庠蚤世遺媳章氏年二十三侍奉嫠姑同處一室時廩先元鼎尚在襁褓也雖粟帛已沐恩而建坊則尚有待焉

顧氏名淑賢封御史顧雲鳳之女年十七適夫王日昇本駸懵不通人道顧委心事之無怨尤未幾昇故依母爲生母病刲股調愈孝聞當路守節歷五

十餘年壽七十有七猶是處子比歿遺言令葬昇墓各院疏請欽賜建坊旌表其門

盧氏適海安鎮民徐冕年二十五夫卒時子燿甫數齡盧許以身殉勺水不入口者五日忽假寐若有告之者曰死矣柰孤何乃強起食貧撫孤幾四十年載撫按鹽院屢經旌獎燿舉戊辰進士上疏建坊章氏適把總張鎧隆慶五年鎧卒章時二十七生子選甫二齡家貧無倚矢志撫孤辟纊資贍苦操歷五十餘年壽八十六各院交獎建有貞節坊

杜氏河泊所張子致妻年念八生子雲翼彌月而夫

秦州志

卷之六下

六

卒卽茹素自誓撫孤緇線中蓋寡言笑絕跡歸寧如是苦節者歷五十九年壽八十八無祿子先氏卒氏一慟幾絕聞者傷之屢經各院旌獎

袁氏仇科側室也二旬夫死無子終身守節年九十三年而終院道屢旌歲給緡帛今建有貞節坊

沈甫妻錢氏徐述妻丁氏海安鎮陳湘妻徐氏生員沈試可妻徐氏生員張梯妻陳氏皆早歲夫亡家貧守節歷四五十年而舊志所載可卜完節者也

以上為婦節
以下為女貞

顧氏名善金顧文昱女許聘軍貫鄒寶未歸寶往戍

西粵卒於伍父母舅姑勸之改適女曰我身雖未歸卽婦也可再執他人箕帚乎遂斷髮自誓以女終其身年逾六十而卒家爲立紙靈以祀之隣有回祿延焚其家惟紙靈如故衆驚異爲貞烈所感云

向氏名隆海安鎮向穗之女三歲許聘回鎮朱舜年十六舜死訃聞哀甚將死之父母察其意爲防守越三日穗往奠女欲從行穗不可女指釜中汁給母曰我餒甚安得菜爲之羹母出攜菜歸已縊死矣時暑月家貧數日始殮面色如生事聞旌表

泰州志

卷之六下

七

李二女年十九許聘繆時雍未于歸雍卒女聞訃卽欲往死父母力勸諭之涕泣不食越六日乘間縊死事聞旌表

錢滿兒錢碧女年二十三許聘梁梁塲徐恩未迎婚恩暴卒聞之悲噎廢食潛自縊死事聞樹坊表墓以上舊志以下宮志

泰州志卷之六

列女傳

明

張氏存簡公文女生時有二蛇蟠互名盤龍不輕許人從童館識徐公蕃許焉母夫人不憚有簡公自備儀物令徐羅致其門比于歸方數日蕃盟面夫人以輓投之失敬慎意蕃拂袖出家人再四問不言夫人喻意隨翁姑親詣陳請乃自書齋歸冢子嵩官順天巡撫父子繼貴爲雙蛇夾生之應嵩配錢氏繼高氏高爲少保文義公長孫女前輩稱其孝敬視庶孽若已出嵩撫順天時以儉人胡守

泰州志

卷之六下

八

中事註誤留京高夫人寢苦飯餽數年嵩歸乃已陶氏諸生王三極繼妻也極前配田氏賢早卒陶氏生子相益極中道下世陶率相益與孤姪相說孝養九旬太翁太翁足癢且有結下疾陶輒時跪翁側伺其意指每飯必親引匕箸或便則令兒姪扶掖起卧雖夜分未或離令兒輩誦讀榻前已經緝督之越數年翁歿母子伯姪哀毀異常喪葬如禮以相益攝福州海防同知奉使有功封太安人相說官侍御陶年九十餘子與賓筵而母猶康壽陳氏贈侍御王三重妻也重幼時氏佻父太僕陳

蘭臺爲諸生見而異之以氏許字焉厚其奩具于歸不數日重有所負出金帨償之無吝色重入學遲攻苦甚氏黽勉同心有疾躬自煮藥以進重愈而氏病遂不起獨子相說年十有九矣重誼敦結髮誓不再娶亦其賢德有不可忘者相說登第贈母太孺人

韓氏中憲劉萬春元配里中叙述賢婦必藉稱氏蓋當家世全盛之時食報詩書享受至厚子懋賢懋贊韓氏出而湯孺人生懋勛葉孺人生懋寬賢勛先後得雋宜鄉曲以此多之當劉公少時苦讀

達旦母亦擁衾不寢比曉親焚羹以進以是相夫子有成尊嫜微不懌立戶外不敢歸劉公遠宦必留侍卒時出一篋付諸子則爲尊嫜執爨時敝衣裙各一曰謹藏之師吾儉且勤也

黃氏侍御王相說元配自說爲諸生相夫子讀書有成持家政嚴而有體樛屈逮下副室施氏朱氏皆賢淑和柔順氣所聚之子姪繁昌施氏所生孫駝舉庚子鄉試爲邑令有聲朱氏所生孫驂亦領己酉鄉薦筮仕邑宰並與嫡兄孫驄相友愛待季弟孫駟文章德行交勉無間固其父庭訓之嚴而

賢母之閩教亦足以裕後昆也

潘氏中憲宮繼蘭元配潘世書香氏能執婦道蘭
攻苦下帷日給蔬具必留已饌晚供夫子翁姑年
八旬浣濯躬親不令人代翁姑一日見所居三楹
皆結綺流蘇謂氏曰汝昌後之祥也蘭讀書付家
計不問賴氏操作得專心詣業年三旬外方舉偉
鏐氏欲爲置妾蘭曰待成名後未晚戊午丁丑間
爲置副室始終幾微無間待僕婢及細人尤有恩
宮氏三世單傳至偉鏐族始繁論者謂氏事上逮
下可垂閭範宜其後之昌也

泰州志

卷之六下

十

國朝陳氏明經元鼎姊次山公女孫也幼許聘李待先
會李成童雙瞽聞于陳毀姻約氏方七八歲號慟
投地後白首偕老待先旣以雙瞽強記課子嘉蔭
有成而母知書喜博覽多佔畢之助封安人同母
姊氏適諸生袁紹先錦軸牙籤時平鸞鏡自幼至
老手不釋卷堂上二親俱壽近百旬如賓如友從
無間言而紹先夫婦以艾年祇事子明經懋官有
文名亦賴母教居多紹先年八十母年九十有一
謝氏丁士毅妻事姑孝相夫敬御衆惠初毅艱于
嗣謝以爲憂脫簪珥爲聘妾陳氏生茂才資乾陳

卒謝撫之如已出謝年三十四始生孝廉日乾茂
才行乾及其弟法乾當其婚冠同居諸子媳或有
間言謝每直陳之子媳而且歲時伏臘長幼之序
不少紊也初行乾居中堂而資乾好逸居別業比
析居必引資乾付中堂故諸子媳之事謝生樂死
哀如一母焉

孫氏庠生沈元美妻保定太守喬生之母也元美
遊庠三年齋志沒舅養中方五十姑范久故繼姑
翟卧病氏廿有三歲茹苦撫孤事舅及繼姑竭力
凡三十七載教子官至太守歷奉撫道府州旌表

有云奉堂上之雙親承歡踰于孝子撫懷抱之幼
孤教養過于嚴父後其事上聞得旌表焉

李氏幼適張兆麒不苟言笑事姑仇氏以孝聞時
太姑杜氏守節老善病嗜梨棗食必備每夕必先
至姑卧內問寢旋至太姑卧內宿榻前伺其呻吟
反側藥必嘗之然後進若梨棗則口哺之繼以乳
忽遘疾卒兆麒繼馬氏復以善行稱聞麒前配李
氏奉翁姑嘗藥諸事心慕之撫前妻子琴如已子
琴事之亦與生母無異兆麒卒氏年未三十誓守
節課子琴成進士

王氏葉希貴妻其先絳州人居泰州富安場守節四十餘年篝燈夜績無間寒暑教三子甚嚴雖已婚娶稍違命猶必撻之或深夜遲歸屏息戶外不敢扣門老健目明燈下猶能刺繡諸子或饋粥膏火不繼出女工所積者助之季子蔭生登江南已酉賢書氏年八十以壽終有司旌其門

貞節

繆達妾萬氏繆好文妻陳氏青年寡居白首全節李氏孫世華妻華死氏二十以節誓或以二天勸之氏破面以示事孀姑育幼子姑病割股活之年七十五卒時以所餘破面割股血衣示子孫遠近聞有異香隨之

泰州志

卷之六下

三

張氏吳允執妻執山東蓬萊人從族子孝廉纘姬業泰州娶安豐場孝子張蘆女執死氏從容治殮事後三日縊于夫側

張氏庠生吳應芳妻芳少單寒事父母最孝氏潔饋烹膏悉經手治及姑卒典珥脫瑱以襄事夫病割股夫死遺藐孤嚴課四十年卒七十有二子之雋庠生年已艾號泣如孺子

李氏袁懋年妻年家四世登科年復早遊庠序能

文章旋病沒氏苦節踰四十年撫子爾萃業儒有
文名

于應鰲妻戚氏 許揚震妻周氏 儒士季千之
妻吳氏 王翼虞妻高氏 生員陳成祉妻黃氏
皆青年寡居白首全節

侯氏生員王好善妻善卒氏纔二十有九遺子三
正甫彌月家甚貧工紉績以給糜粥及三正六歲
授書氏拮据脩脯凡二十年三正補弟子員九試
棘闈以明經任上元學博氏壽七十有四孫相宜
邑諸生曾孫驥康熙辛酉經元

秦州志

卷之六下

三

張氏少穎悟父雲翼日以古史口授子兆麒氏觸
類引伸古人本末未嘗誤一字年十七適恩貢劉
際春春知名士夜讀必五鼓氏篝燈聽之及曉亦
成誦夫早世氏年未三十撫孤矢節備嘗諸艱逾
五十年至八十乃卒

吳氏安豐場王宗妻宗不男吳執婦道恩誼最篤
夫死全節而終

吉氏草偃場楊慶祿妻昭陽進士宗城女甥也夫
死不再適以姪爲子撫之成立有女適魏汝悌兵
部尚書魏應嘉之姪也

王氏泰庠顧天球妻顧中年無子置側室翟氏天球亡翟生遺腹子一珥兩人同矢志撫孤有窺竊家計者謂珥非天球子親族爲之不平王翟訟之于官請刺血以明正僞比刺兒血滴棺上縷縷入木及一珥稍長貌酷類天球今爲泰庠之彥天道之不可厚誣有如是哉後王氏壽九十九歲

顧氏理問潘昌後妻事繼姑高氏以孝聞姑疾割股氏年九十無病卒人以爲孝繼姑之報

蔣氏張鑛妻鑛卒撫孤日昇日明教養備至昇中丙子武鄉試日明入學亦領鄉薦

泰州志

卷之六下

十四

劉氏張應祥妻祥故氏年二十七撫孤子五人成立次子潔割股救親人稱其孝

劉氏進士大叅萬春之女嫁太學凌國禎大中丞儒孫也夫沒氏年二十九課子岫成立有聲庠序陳氏徐鼎鉉妻氏未三十鼎鉉逝遺藐孤弘姑病亡翁益孤苦氏能以婦代子翁自五十至八十歷三十年而氏孝養不衰家道賴以有成課子弘入庠序里人舉氏節孝請旌州牧嚴公勘云緣成破鏡志矢空幃菽水承堂上之歡熊丸教膝前之子人以爲實蹟云

大與氏相輝映見陸氏世多閨德云

郁氏黃巨卿妻生二子夫亡教子以義子雲受知前州守陳素後守罹難知交迸散無敢問氏趣雲就之脫簪珥佐裝雲得職納橐餽事白登堂謝君子以爲無愧賢母云

王氏王應麟女適唐氏生子踰月夫卒夫族勸改適氏曰若輩慮吾無養耳父母豈不能養我乎遂抱弱子歸母家清苦守節廿餘年父鰥居清修不娶氏撫諸幼妹營甘旨孝養其父氏後有疾適值夫忌日沐浴更衣率其子拜奠曰吾與而父同日

秦州志

卷之六 下

六

死矣從一而終吾復何恨旋卒閭里皆嘆異之

宋氏方爨妻夫業儒未售客死江西氏年二十七子山五歲氏茹貧守節未幾鄰人火家無以自給氏勵志益堅日夜鍼綫訓子讀書子山補弟子員高氏王三旌妻守節撫孤相光有聲庠序

李氏于戶兆熊胞姊年十六適劉和二年和死于盜氏矢志復讐訪知大盜仇六仇七控院道府州四緝正法遺腹生子文明巡方劉興秀州牧徐日升旌表氏年五旬餘文明生子濬受麟經應制科氏壽六十有五

徐氏泰州所鎮撫應襲王志正妻夫亡氏年廿一
生子帖甫十月矢志冰霜備歷諸艱以全大節閱
今五十二年

錢氏姜應舉妻夫亡氏年十九守節撫孤事姑曲
盡孝道學道張旌之

王氏港口鎮周行妻行卒于淮北氏年廿八截髮
毀容終身不二父母憐其苦節兼無兒女撫養之
四十七年壽七十五歷任州牧旌獎

王氏沈南迎妻年二十五迎病氏割股療之未幾
迎卒氏勤苦力家撫幼子士雄成立氏壽九十一

孫允文有聲國學里人舉氏節壽州牧嚴公勸云
綺歲菽水承姑中年柏舟矢節井臼克操家業詩
書垂訓子孫五十餘年如一日九十一歲無間言
皆實錄也

繆氏蕭建齋妻二十七歲早寡遺孤二家貧甚繆
以女工奉翁姑二子長授之室子婦又相繼沒又
撫其孤以成年逾八旬

葉氏太學生程應東妻東故時氏年廿八孀居茹
苦撫子時瑞成立閩三十二年督學簡旌之

朱氏鄉飲賓朱蘭亭女年十七適夫程國俊四載

國俊歿氏年二十堅守苦節上事翁姑下撫遺子克盡孝慈長子程棫業儒次子程楷俱成立

丁氏夫戚瑞徵夫早逝氏年二十一苦節奉舅姑撫孤雯炳無忝節孝

顧氏顧文昱女年十八字同郡鄒氏子寶寶卒於戍父母舅姑勸之改適女曰我雖未歸鄒卽其婦也豈可再執他人箕帚耶遂斷髮誓以女終其身年六十餘卒母家立紙靈以祀之比鄰火延及燒百餘家其家亦燼惟紙靈無恙如是者再人云貞烈之感時名公卿多題額以旌之

向氏海安鎮人年十六許字同鎮朱舜舜死訃聞父往奠女欲從行父不可因給其母他出卽自縊死時暑月家貧數日始殮面色如生事聞旌表李二女年十九許字繆時雍雍卒女聞訃卽欲從死父母力勸諭之涕泣不食越六日乘間縊死事聞旌表

周懺女梁梁場人年十六許字本場王興興病故女郎自縊死州學聞于鹽臺曹一鵬建坊表之

張女名明貞父日梓世居吳陵之溱潼明貞七歲曾許字周士英士英蒙懦饒于財方議婚而文達

夫婦相繼死文望者文達之弟也利其資謀斃上
英明貞時年十九矣自髡其髮毀容飾垢衣履日
持牘控諸當事而與母舅黃太和偕出入同謀議
當事咸感其節烈疏請于朝文望擬罪如律于是
舉祖舅祖姑及舅姑士英之柩悉祭以禮而窆之
加封植焉葺其廬祀周氏木主惟資其瘠薄之數
畝以給晨昏免凍餒而已

以上官志以下十場志

王氏盧坦妻年廿餘坦病瘵每吐淤血氏啜而飲之
既寡繼姑以其少恆欲嫁之誓死不從卒成其志
王氏張小田妻年二十六夫亡撫孤自守勤儉持家
業漸充拓門祚復興

崔氏適安豐吳守勤年廿七守勤死貧且無子族人
將嫁之崔以死誓曰吾雖貧決不和累移近母家
以葦蓆爲小厦僅足容身緝蠶以給晨昏有憐而
周之者嚴拒不受食雜糟糠衣懸百結年六十八
始卒

崔氏吳邦顯妻年十九夫亡遺腹子方數月翁姑憐

秦州志

卷之六下

三

其少將嫁之氏不從曰安忍爲不義以愧亡人自
甘貧苦撫孤有成年七十餘足不一履戶外

薛氏崔希雍妻薛琪之女雍娶二載卽逝遺孤汝善
方數月乃謝絕鉛華苦志自守至六十餘歲

梁氏崔廷諮妻廿餘歲而寡遺孤數月撫之五十餘
載粗糲自甘終身不厭

姚氏徐銘新妻初寡時里有強少欲娶之百計圖謀
矢死不二食貧撫孤年六十八而卒

李氏周繼元妻二十三歲元歿無子且貧家計蕭條
淒楚萬狀而含冰茹蘖始終不逾年八十七乃卒

薛聞瑄輓之以詩有操等栢舟心更苦節同蒲水
遇尤窮之句

呂氏庠生何璟妻年十九寡撫孤有成壽至八十四
歲撫院旌曰勁節流芳

崔氏楊燿妻燿卒時崔年廿九歲食貧撫孤懷寵壽
至六十五

吳氏朱增勝妻年二十三夫故遺子甫周歲茹苦自
守撫孤惟和成立宗祀賴之

盧氏徐冕妻年二十五夫故遺孤方二齡誓以身殉
勺水不入口者五日昏憤中若有告之者曰死矣

泰州志

卷之六下

三

奈孤何盧悟乃強起食飲堅操四十餘年竟教其
子成戊辰進士仕至都察院副都御史卽徐燿也
胡氏楊林妻年二十七夫歿遺孕方數月貧窶不堪
及生得男苦志自守時值倭變歲凶勞瘁萬狀孝
事舅姑卒喪祭如禮壽至八十八歲

章氏韓寧妻年二十四寧卒遺孤甫三齡力貧苦守
撫孤成立至老嚴峻猶若少時

劉氏韓鶴妻方廿齡夫歿家道式微舅姑衰老庶姑
生子方數月而庶姑又歿劉竭力撫育卒全劉宗
吳氏崔廷基妻年二十一夫故無子或勸令改適號

泣不食誓以死貧無依還母家然朔望必歸省其
姑時時緝繡以給其衣履及姑終葬祭以禮塋臺
王旌曰節凜冰霜年五十一竟終於母家

周氏郭志文妻廿九而孀撫孤有成壽七十七

王氏年二十七夫崔邦仁故井無子女王泣欲同死
父母舅姑憐其少且無嗣勸其改嫁誓死不從撫
猶子希旦勤紡績以養姑運副孔楚生題其門曰
倡導九州風化擔當萬古綱常

王氏郭真卿妻年二十二夫沒力貧撫孤郭華娶婦
申氏無何華又歿而無子乃取宗人子爲申氏嗣

秦州志

卷之六下

三

姑婦相依爲命申更嚴飭且能孝事孀姑

丁氏吳必妻年二十七矢節苦志三十餘年守身如
玉

劉氏王佳登妻事舅姑以孝聞姑病危劉爲割股以
進病因得愈

申氏郭煒妻事舅姑孝謹治家操切雖隆冬祁寒未
嘗晏起夫歿課子孫以孝弟年八十時嘗坐牆側
牆忽傾壓失申所在家人號泣遍覓見申乃端坐
牆中甃石壘壘毫髮不傷家人驚喜詢故曰吾夢
中也後又閱數年始卒

劉孟劉戶部郎劉弘宇女幼字侍御張承仁曾孫世
睦未嫁世睦方弱冠以下帷攻苦得癘疾不曉人
道其父孔怡憫劉閨淑密語女父令他適孟劉聞
之泣曰兩髦宛然河清可俟忍爲不淑以玷兩家
門第乎且禽獸行非人所爲也若必奪吾志惟死
耳自是謝鉛華衣編素至三十三歲忽膺疾不起
將訣語侍婢曰取篋中金簪來簪至乃自挿髻間
危坐而逝蓋簪乃張氏聘物也

周氏崔克臣妻年廿五喪夫翁姑父母令改適堅不
從指兩孤誓曰所以忍死者與全崔祀也不然豈
泰州志 卷之六下 三
願偷生哉卒撫之有成

朱氏丁思悟妻夫故時年二十九孤長存生始六日
無翁姑伯叔茹苦死守竟得成立迄今年八十孤
亦五十矣

崔氏丁可道妻可道死崔年僅十八遺七月之孤族
人將嫁之崔懼不免晝夜抱孤啼於室志不欲生
衆感悟而止至三十七歲以病歿臨瞑時欣謂家
人曰吾志得全矣遂偃卧向側而逝

崔氏丁可進妻年二十六始生子而可進亡有言及
改醮者崔斷髮毀容指天日泣誓今年六十三歲

持尚如初稱未亡人時二崔皆朱氏媳也亦可謂
婦姑繼志矣

吳氏周尚驥妻二十五歲喪所天撫遺孤汝齊於襁
裸煢煢孤嫠重以驥祖之喪塋緝績爲生一切仰
給於十指苦志二十餘年至四十八歲而卒

高氏崔汝震妻幼知書工女紅二十二歲稱未亡人
守身嚴峻三尺之童不使得入戶姑王性操切又
不甘澹泊高曲意承奉粧資衣飾盡易以供姑饋
饌又不足則佐以十指後姑歿粥產以襄葬祭務
從豐厚今年已五十復撫孤孫可謂遇厄而操貞

泰州志

卷之六下

四

者也

王氏吳自省妻年二十未有子而孀所居傾圮數椽
風雨不蔽糟糠充腹冬無完衣而矢志愈厲且能
孝事繼姑不失婦道迄今七十五歲秉節已五十
餘年無子無家沒齒不易其操較之尋常節烈難
之難矣

何應德妻王氏齋出心齋先生後素嫺閨訓應德歿
王年二十八遺一孤在孩赤家窶甚織紵紡績僅
以餬口一遇凶饑卽藜藿不飽王甘之無怨

吳氏崔希乾妻年二十八希乾卽世初撫孤子後撫

孤孫艱苦不可名狀壽至九十一歲

薛氏崔希雍妻年二十九時生子善數日而寡家人勸其易志堅不從饑寒貧乏百折不回至七十三歲而卒事載州志

鄧氏適盧 喆匝歲而喆下世鄧特年十七有妊一月後生子植矢志不二端莊嚴肅謝絕鉛華親族奉爲姆儀

漆氏于歸盧應徵年十八生子文先甫三月而嫠長能教以義方不務姑息以故文先爲鄉里端人前任兵憲劉旌之年七十四而終

秦州志

卷之六 下

三

魯氏盧鳳毛配于歸僅半載守三月之娠稱未亡人家極貧終歲惟績紡以供朝夕窮苦至老壽終八

十八歲

新增○已上富安

杭氏竈民傳本妻本故杭年三十生子寅方七歲守節撫孤至成立

錢氏傳寅妻杭氏子婦也歸寅未久寅病卒孀居矢志如其姑養族人子以續傳祀

王氏心齋先生女姪孫嫁爲黃燧妻夫死無子孤貞苦節歷五十餘年鹽院龍旌其門曰天植完節

房氏馬理妻年二十四夫死家貧守節最苦至七十

七歲堅貞如一日臺使者旌曰一門節孝

陳氏周天佑妻夫死時年二十二守節五十五年孝養舅姑極其誠敬有子維新訓以義方遂早列庠

序

林氏曹均妻年二十六守遺腹三月子應詔甘貧撫孤竟至成立後子孫甚多

胡氏姜儒妻年二十四苦節撫孤諸艱歷試堅貞如初壽至八十餘歲

翟氏李鑑妻年十九矢志家貧苦節撫子維楨教之以正壽七十七歲

秦州志

卷之六下

三

房氏庠生姜克駿妻年二十守節安貧茹苦沒齒甘之如飴

袁氏夏氏 袁氏曹朋妻夏氏沈瑜妻朋瑜皆業儒早夭二氏無子苦志自守士民交口稱之例得並

載

張氏葛天民妻事姑王最孝王壺範嚴肅張曲意承順毫無忤色姑疾篤禱以身代尤能勤儉相夫故天民得專心問學卒成醇儒

鄧氏陳七兒妻未嫁時陳犯大辟有勸之他適者女不欲聞卽日投繯而死分司徐公旌曰綠窗正氣

李氏房可昌妻年二十七可昌病故孤永奇時在襁褓立志死守繼姑陳計必欲奪其節李懼不免乃密懷利刀將以身殉家人畏而止因得全操孀居近六十載壽八十一兵憲李巖運楊俱有旌

沈氏適夏雲吉以業儒攻苦卒於羸沈年十九耳哀號絕粒將以身殉已而顧遺孕世長用孀姑慰勉而止自此事姑鞠子悉取贍絰績今年六十守節已四十年矣

劉氏曹珏繼室也年二十一珏卽世已無出則撫曹

秦州志

卷之六下

七

前妻之孤孤年僅九齡素善病爲多方調攝得無恙嘗慮曰此曹氏四門之一綫也脫不保吾何面日以相見地下乎後壽至八十九歲

房可文妻劉氏年未三旬堅貞矢節以撫孤家甚貧而志不易壽至八十二順治五年分運朱優獎之葛永芳妻楊氏永芳歿楊年廿五孤長者三齡次未替翁姑令他適楊斷髮以明志乃止饗殮悉出自女工先朝會膺獎卒年八十七

王氏翟光啟配年二十一光啟天事舅姑教孤子皆曲中禮法衣粗食糲甘之如飴今年五十五

戚氏丁鳳池妻未三旬而夫亡守兩歲襁褓之孤翁
姑俱耄家無四壁養生送死悉以婦代子職茹荼
藥五十餘年

丁氏張應登妻日嬪未幾應登以疾故丁年二十二
矢志靡他上奉耄姑下鞠孤子辛勤勞瘁皆以一
身當之前朝戶部張有媿美共姜之獎

房永吉永慶兄弟相繼夭吉妻蔣年二十慶妻陳年
二十八吉兩孤慶多其一娣姒共誓蔣守至五十
二歲陳今年五十一矣

孫氏楊氏吳滇之妻妾也楊生子守賦五歲而滇亡
秦州志
卷之六下
二
時孫年二十九楊年二十七同心守節後孫卒楊
年至七十餘齶院屢旌之

吳氏周文進妻年十八歸文進八閱月夫亡遺孕三
月生子堯夫撫孤苦守家至貧饑寒不免毫不易
念壽六十七

吳氏季柯妻年二十七柯卒遺孤季濟始三歲甘貧
守節御史徐公請於朝歲給米帛壽至九十

魯氏王一見妻年二十六歲見逝撫幼子襁褓以及
成立貧苦不堪依兄魯瀛就養終成完節

郭氏周鳳岐妻年二十餘岐故苦節以撫諸孤備歷

艱辛垂老所戴猶初嫁時笄也有被百結終其身不更製曰此亡人所共者壽七十九

郭氏王之漸妻心齋先生孫婦也年二十九夫之漸溺河死緝纊自給以撫其孤有司旌廬歲給米帛徐氏王顧副室也適顧一載年甫十人而夫沒生子汀僅七日苦守五十一年壽至七十

徐氏新竈王士好妻生子始歲許夫故時年二十甘貧撫孤壽年九十臺史旌之

王氏吳秉赤妻年二十三赤早喪無子止一女殯殮時剪其夫手足指瓜佩帶之誓不再適貧無立錫

秦州志

卷之六下

元

後依養於女夫丁崇孔苦守者六十三年

周氏王宗豫妻未字時母王氏疾篤刲肱肉療之而愈及嫁生子裁歲許夫疾復刲股進之莫能救竟卒時年二十七矢志撫孤壽至六十四

王氏施沛妻年二十餘沛卒生一子方七日矢志守之貧苦不怨

盧氏王之臣妻年二十餘稱未亡人苦撫一子闡範肅然

李氏周侃妻夫歿時年二十八生子二歲撫之成立家範嚴肅壽至八十餘

潘氏季模妻十八歲模故遺孤僅六月繼姑百端灌折欲嫁之潘誓以死守勤儉勞苦見子成立家業饒裕壽八十終官司旌廬

施氏王親臣妻生子三歲夫亡年廿歲耳母家與翁姑皆欲其改嫁而堅志不從歲凶時乃令之自食於外氏紡績貿易備歷艱辛卒撫其子以有成壽七十五官司旌之

周氏楊朝敬妻年二十四夫故生子才三歲適倭變攜孤及二姪避之襁負跋涉險阻備嘗能不以子姪異心得俱脫於難壽至七十三歲其子楊梓感

秦州志

卷之六下

三

母苦節克曲盡孝養焉

吳氏周藤妻年二十二生子二月而夫亡吳立志守節竭力撫孤屢罹災祲苦難備述年六十五撫按道府皆旌其廬歲給米帛

韓氏年二十五夫王禔卒而無子食貧苦節壽七十二

楊氏王嘉瓚妻瓚任俠好遊家貲盡蕩一日暴亡於外時楊年廿餘垢面敝衣撫孤苦守紡績自養遂振家業初貧時有叔祖王士奎側室嚴氏寄私匳百金於楊後嚴暴殞人無知其有寄物者楊檢出

悉與士奎奎分金酌之楊辭曰若苟絲毫有愧天地鬼神矣悉不受

吳氏王祠妻年二十七祠卒遺孤士擢才二齡苦撫成人諸艱備歷壽至六十一官司屢旌

紀節婦人莫知其姓幼嫁紀安無子止一女未幾安忽祝髮爲僧去婦力貧苦守安竟不歸婦亦剪髮以明志其女年長痛母無依誓不適人亦蓬垢以養母後母年逾七旬而卒女亦終老不嫁獨紀安不知所終

杜氏楊炯妻年二十七炯殞無子族人令之再適杜

秦州志

卷之六下

三

號泣不絕聲數日後服斬衰自縊死

吳氏玉汝存妻王生而天閹吳執婦道甚恭雖終身無燕婉之私而夫婦之誼最篤壽八十餘猶處子也

吳氏庠生鄒萬里妻也里同父應郡試姑偶暴疾吳倉皇失措請醫罔效乃潛祝天割股肉和藥以進姑一服卽起

紀氏周嘉惠妻惠初病癩屢醫弗效其時尚未舉子氏禱於天割左股肉爲羹療之無何生子正立及惠歿守節教正立有成官司旌表

季氏季宸之女年十六父亡勤紡績以養嫠母幼弟里人有聘之者輒辭曰家貧母老我適人母誰養時值窘歲自采草根充腹而以麥仁供母弟後母喪里中無賴有侮之者乃號哭徹夜自縊死親族哀憐鳴其事於官擒無賴正法旌其墓曰貞烈歲時致祭祀

王孝女百夫長王國祥女仲仁之妹也初父祥早卒於姜堰仲仁往戍止遺女與母韓氏獨居或有聘女者女曰父亡兄戍母女相依以爲命我去母安依遂紡績養母終身不字年七十餘乃卒

泰州志

卷之六下

三

吳二女生員吳從周女父邁篤疾女時才十二歲乃焚香祝天許以身代剗股肉以進而瘳

楊老女素性至孝生十五歲母病危剗股得愈無何父又病再剗股亦愈

吳允執妻張氏婚甫逾年允執任山海關遊擊暴亡張哀慟悲號志在身殉家人百方勸慰悉不聽閉戶雉經死

何氏已卯孝廉何一鬯女也適吳一洵洵歿何年十九而無子立志不再辱堅守十一年至三十歲得疾不進藥曰死吾分也無何卒

謝氏江西人黃士廉妻十八歲撫兩孤雛至昏娶抱
孫年七十有四康熙七年州牧王旌以額日節凜
栢舟并給帖優免以勵風俗

程聞遠及日休日孜孜徽人也商安豐相繼歿聞遠日
休妻均出於吳日孜妻蔣氏年俱未三旬三孀同
心並濟誓共撫一孤以衍程祀娣姒為師友甘苦
勞逸惟均蚤莫互相慰勉卒訓孤有成鄉鄰亟稱
之

吳孝女幼孤性至孝母周氏老且病孝女不忍母無
依因矢志不嫁以終養後母歿孝女號慟死母年

秦州志

卷之六

七十孝女年三十吳嘉紀紀之以詩孝女嘉紀六

世祖姑也

附詩雙飛畫堂燕春來又啣泥堂中紅
顏女歲歲惟孤栖孤栖何為爾有母年

齒衰今年復明年朝昏不暫違膝下辛苦多織作
致甘肥女身日以長母身日以羸桑榆戀斜景依
依能幾時淚下未及收里姥來門樹東家有賢郎
相煩求蛾眉深閨聞姥來倉皇愁生離懇懇託家
媪徐徐出謝之東家去諾諾西家又遣媒人生各
有志紛紛徒去來媒妁殷勤言祇以前煎人懷今年
復明年荏苒歲月徂母年既七十女亦三十餘霜
風吹林木落葉辭舊枝傷哉黃髮母一夕赴泉臺
骨與肉離別天傾地崩摧女也何所賴抱痛長號
呼浮雲為黯淡翔鳥為徘徊月落空房冷至哀毀
形骸母女相繼逝見者靡不悲家人出卜墓塋母
以女隨生死在親傷夙願已克諧迄今三百載斤
塋猶鬼鬼往事聞故老小子仰
前徽援筆傳孝女慚非絕妙辭

王氏沈守能妻為大儒心齋先生從孫女七齡失恃

能孝養繼祖母及笄于歸八年不乳至年二十二始連舉三男善事舅姑家務填委一切以身任絕不分勞於娣姒又五年守能以羸疾卒王號慟絕粒者數日將相從地下已而顧見諸孤乃易慮忍死以撫之自是家益落王晝則操作力苦夜篝燈紡績爲諸孤學俸及紙筆費莫不墜先人志事壽至八十一其季子卽今之詩人沈聃開也

吳氏歲貢傅應鸞副室也素閑貞靜年二十二矢節撫所生孤以沒世守身以禮至老不渝

開氏崔大經妻夫故時年十九甘貧苦節志炳日星

秦州志

卷之六

言

六十三歲而歿大經父子俱以孝旌

周氏徐應捷妻十八歲孀居孤甫旬月守志五十載壽六十六歲而終

周氏袁時憲妻今年六十四歲稱未亡人已四十五年操守潔白志節凜然其孤請於分司旌日光延寶婺

薛氏王嘉士妻年一十二生子自皆而婺自皆年今六十三歲感母氏苦節孝養不衰蓋薛壽已八十有四矣

周氏適梅一相一相下世周時年十九茹藥不辭至

七十一歲而終

周正賦妻王氏篤行嘉令女孫也父自評從幼日訓以婦德及歸周奉父訓不違正賦逝王年廿六有一子復天誓不背所天貧無居依弟言綸碾室以柄身形影相弔者四十七年至七十三而卒

劉氏泰庠生王言綸繼室也未嫁時嘗割股以救其母及歸王事孀姑吳曲盡其孝因痛父斌憲遠臣嶺南無歸日晝夜悲泣不輟遂感疾以殞其身

吳氏魯守仕妻廿六歲而孀遺腹大贊始兩月守節四十年壽至七十四康熙七年州牧旌額曰敬姜

秦州志

卷之六下

三五

遺範

吳氏女名長父嘉紳適同里魯志仁志仁居鄰紳甲辰冬紳病時女有娠四月矣步歸省中路躓而仆還墮胎越十日紳病劇俗忌產婦入人家女至門不得入哀號日相去咫尺不得一見父面耶乃憑檐而哭見者皆墮淚歸拜禱於竈既起寘瓢左股下將以剗肉貯血也刀未發於刃久之肉乃脫因糜以餉紳一啜而愈既視瓢中拭如也人皆謂神祐之其季父嘉紀有詩曰產婦不入門恨殺舊風俗淚眼空望望門檐分骨肉肉是吾親肉剗以作

羹糜女是愚婦人肅以奉神祇神降清風生麋香
老親豫鈍刀全父子人來看空瓠

杜氏王三祝妻年二十六守遺腹孤嘉英撫育教誨
五十年至七十七歲而歿

楊氏真州人其父宦祥符而生與江陰唐韻言爲兩
姨子兩家卽襁褓中許爲婚旣于歸篤於恩義順
治初韻言授經於三塘以病卒楊時年廿六有兩
雛立志不再辱堅貞粹白可以泣鬼神顧家無擔
石韻言兄文仙文思互爲供養以恤其孤婺依伯
氏苦守寓安豐後一孤歿存者名中立江西楊大

泰州志

卷之六下

三

經以兄子妻之氏年將五十卒卽葬於安豐

杜應旌妻丁氏二十七歲守節撫孤二十二年至四
十有九

劉氏梅承正妻二十八歲夫亡而無子不忍背所天
撫二孤女五十年壽今七十九

陸氏吳自明妻自二十五歲守節至七十九家奇窮
饑寒畢世二子一女皆撫自孩赤以及婚嫁人欽
其節惜未食其報云

盧氏吳一讓妻一讓故無子盧年二十八養舅姑以
代子職經營喪葬皆竭力盡禮壽至六十二歲

吳氏周正冕妻年二十七寡閱三月始舉遺腹子日昇家無斗升三滄皆借資於經績晝夜不少息遂積勞成病卧牀禡三載孀居十三年而卒其兄嘉紀著七歌其第五作指氏也

許氏朱仙側室也姑楊病篤同仙嚙股肉以療未幾仙病又烹臂肉和藥年二十六仙殞守至五十三而卒

奚氏陳寰妻年二十寡遺腹子自成生始三月矢志守之迄於成立

朱氏呂恩妻年二十四孀居無子清操畢世壽至八
十餘官司旌之曰栢舟餘範

朱氏年十九良人陳一科溺水死遺腹三月時盛夏未殮穢血噴流朱號痛悲啼啜之殆盡後產孤惟禮貧不能自給依科弟一元以度朝昏及惟禮方娶而旋夭乃偕媳金氏守節未幾金又歿復茹苦以撫孤孫陳氏三世皆賴一孀婦以存宗祀壽六十三官旌其閭

金氏孤子陳惟禮妻卽朱氏媳也年二十二夫死同姑矢志且能孝事孀姑有司特行旌表

張氏陳妻嫁一年而寡族人欲易其節斷髮毀

終身不變其初

羅氏程尚奎妻羅璟女也夫歿無子茹蘗終身而其志不移

陳氏呂照妻年二十而寡有一女而無子撫之及笄適人暮年依棲壻家苦志八十一歲乃卒

張氏楊燭側室守節撫所生孤年至六十初嫡子令甲遭誣張匍匐號訴當道情至迫切因得昭白刺史郭公之琮歎曰節婦慈母今僅見之

唐氏楊應常妻二十一歲撫孤至五十二歲

馬氏十九歲夫楊應庚歿未及生子指天誓心至年

秦州志

卷之六下

三

五十一歲

程氏吉應麟妻富安程悌女也十七歲寡遺孤未朞支貧死守依母家以撫子

夏氏徐語妻適語九載生子七歲語歿號哭三日夜不絕聲自雉經於語柩傍

楊善貞江右楊希賢女也年十五字洪士達未嫁而士達歿善貞毀容斷髮求死以相從時士達祖母老且病往諭曰能生而養我不猶愈於徒死乎女應曰吾志也遂偕往成服曲盡婦道後太姑以壽終乃歸依父母自緝糶以供餽粥勤勞艱苦百折

不同分運毛公郭公徐公前後交旌之

陳氏陳一儒女爲金希范妻素賢孝姑李病危夫妻奉侍湯藥晝夜不離卧側及疾益篤乃潛出剖左胸肉一瓣和藥進姑遂得痊

陳氏金日新妻年二十九矢志孝事翁姑姑鄒疾勢危糜股肉服之得愈前任分司旌以額

金氏呂大魁妻魁故金年二十六事孀姑能盡孝教幼孤以義方或憐其貧苦勸令改適者應曰但凍餒而死從亡人地下足矣今六十七歲

曹氏金一驥妻性至孝十五時曾割股以救母疾及

秦州志

卷之六

三

歸金姑陳病勢劇又割股進姑而痊先是陳嘗兩剖股以療姑李可謂孝德世著矣

顧氏孫彥才妻二十九而孀彥才父未葬顧竭力盡禮以襄事貧無以爲生惟賃女工以養孤子足迹不出戶人罕見其面年六十一歲

劉氏夏瑞明妻居恆孝姑姑久病不起醫弗治劉潛剗股肉一瓣食之而愈

顧氏楊曉龍妻二十五歲爲未亡人茹荼撫孤禮法自守清操凜然迄今六十八歲

唐氏仲學會妻嫁三年而夫亡舅姑憐其少欲嫁之

不從殉之則斷髮自矢時遺孤鶚薦生甫三月竟苦節五十年而終

韓氏曹士妻士死家貧無嗣乃擇姪文彪爲繼苦節至六十餘歲

吳氏周地妻夫亡年二十七事姑至孝撫二子艱苦百端持節四十八年壽七十五

關氏仲學顏妻夫亡無嗣依宗人紡績爲生至七十歲

向氏少配徐榮榮歿無子並無宗族堅貞獨守冰操聞於遠近

秦州志

卷之六

下

四

曹氏朱受兒妻夫亡家貧止生一子年二十三守節至五十八歲而終

孫氏張本誠妻年二十四夫故養姑撫子至六十歲歿

韓氏王可立妻二十五歲而寡守身嚴肅孝事繼姑至老不倦

王氏張應文妻年二十二婺居遺子張嘉正甫四歲苦撫孤子後王病篤嘉正乃割腠肉二片煮藥進之立愈

曹氏十八歲適仲煌煌瞽目越七載而卒生二子坡

三歲坂歲許歷盡艱瘁撫之成立守節四十餘年
壽六十九

周氏練成武妻年二十九夫沒苦志撫孤訓以義方
至於成立

曹氏韓 妻十九稱未亡人止一女才二歲力貧
守節壽至八十

苗氏苗子貴女適仲敦敦邁病謂苗曰我死汝少而
無子當擇佳偶嫁之以爲終身計苗泣曰果至是
惟有相隨地下耳未幾敦卒苗號泣仆地幾絕者
數四至夜潛出自縊於西園樹下結襦才九十四

泰州志

卷之六

下

四

日聞者盡悲之

曹氏名月兒少適徐時登生二女一子二十七歲時
登死甘心矢節其子早夭撫二女二女又連喪乃
浩然歎曰夫死而兒女皆相繼亡何用生爲痛切
久之閉戶投繯死

周懺女年十六許字王興未嫁興病卒女卽自縊死
鹽臺曹建坊旌表之

周氏未笄時母病女割左脇肉療之後爲郭焯妻

徐德女生員徐應舉女適薛應正年十四時父病割
股療之而愈

朱氏曹堂繼室前妻生一女朱撫之如已出嫁已女
二人粧資皆從薄於前女獨豐堂止之曰此女無
親母吾不忍效世俗繼母所爲也

林氏徐杻繼室已無子撫徐前妻二子恩勤備至不
啻已出

王氏曹燠妻年二十七撫孤守節 孫氏吳一清妻
年二十七夫故無子堅操四十餘年

曹貞女名祥父立豹幼字同里孫繼芳未嫁而芳卒
女遂矢志從一之志依母兄三十餘年今年逾五十
鄆郡徐麀賦詩曰已足傳千古生當五十春冠裳
誰苦節閨閣有斯人未覩夫君面終甘處女身異
哉卑弱質矯矯是松筠

曹氏韓希禹妻希禹下世韓年二十五遺孤六齡率
守以有成壽至七十五

曹氏適韓日永日永幼時嘗割股救母蒙旌異永歿
時曹年二十七志堅守而患無子乃立姪克已爲
嗣遂凜操終身

方氏徽人也幼適同鄉鮑夢斗事孀姑王最孝夢斗
客死廣陵時方年二十七三子一女皆孩幼誓不
獨生姑慰以撫孤存祀乃勉從後轉徙至南梁艱

瘁備歷貧無以備甘旨衣匳盡醫以養姑教其子
親名賢為正人有剪髮銚薦之聲今三子盡矯矯
卓立仲氏耀祖與東陶吳嘉紀交善嘉紀為賦南
梁鳥以贈 其一日南梁鳥為巢樹上生爾雛樹下
寡婦心惓然紡績日暮炊無烟市來餅
餌那足茹食却嬌兒遺却女冰堅雪厚日難過眼
前黃口何時大 其二日南梁鳥為老小鳥來反
哺巢高翅弱飛不起南梁孝子愛煞爾山松青青
谿水長母年六十身體康酒饌朝昏盈豆甌阿母
舉七淚如雨東林茶蓼西
蔗枝今日甘芳昨日苦

吳氏高儀妻儀卒而貧窶不支撫育遺孤應奎教之
有成官司旌門壽至八十

王氏潘宗妻年十七夫歿家無立錐依義女贅壻力

秦州志

卷之六下

四

貧以守壽至八十六

盛氏朱璣妻二十二歲矢志清貧自甘壽至八十二

官司屢旌

吳氏幼為良人妻節義凜然不得其死惜哉

據舊誌
所載如

此然不書夫家姓氏不詳本婦事
故遺漏耶忌諱耶莫得而知矣

張氏周鐸妻年二十七貧窶勤勞撫遺腹子士儒有

成壽七十八院道交旌

任氏庠生臧勸妻事姑能孝姑患蠱疾垂死勸偶他

出任禱於天剗股肉療之疾尋以瘳官司旌表

潘氏盛轂妻年二十孀居不以無子而易其節

徐氏適趙宗孔年三十宗孔亡遺孤一中才數月苦
撫成立娶婦繆氏甫匝歲而一中又殤於是姑婦
苦守人高其節

蔡氏周榮妻年二十三寡而無子繼姪邦達爲嗣茹
藥含冰清操沒世

張氏繆師和配年十九寡未有子父母翁姑皆欲其
嫁婦以死自誓因繼姪爲嗣堅守四十餘年足不
履戶外里中羣奉爲壺範

張氏適徐弘道二十四歲孀居雖育二孤貧無擔石
苦志堅守卒全其節

秦州志

卷之六下

四

徐氏年二十四夫繆廷桂歿無子撫姪爲嗣以守壽
七十七歲臺史旌之

繆氏適蔡本清年二十八生子三歲而本清亡勵志
撫孤馴至成立內外肅然

徐氏二十二歲其夫繆居讓卒生子三月家無長物
紡績腐豆以撫孤有司旌其閭壽七十六

繆氏適周濡甫十九歲稱未亡人遺孤希文生才及
兩月苦心勵節至老足不越戶外縞素終身言動
不苟其堅貞如此

繆氏蔡惟範妻十九歲孀居無子立志守節撫姪爲

嗣訓課以義用勤儉致裕壽八十餘卒

何氏徐宗賜繼室夫沒時年二十五已無子撫前
四歲孤以終其身

徐氏宮好仁妻年十八而寡無子嗣姪備歷艱苦甘
之沒世

徐氏歸繆四英不二歲而寡遺孤才六月時年僅二
十甘心貧苦誓不二天堅操四十餘年

周氏鄧詔妻二十一歲苦節撫其二子壽至六十一
歲

周氏王澤妻夫亡時年二十四苦節四十餘年孤賴
秦州志
卷之六
下
四
以立

孫氏十九歲夫張木身故遺腹子數月撫之成人壽
六十五歲

繆氏年二十其夫徐侃故家甚貧傭紡績以撫遺孤
壽至六十

繆氏夫徐仲亡時年二十四力貧撫孤宗風後繆病
宗風嘗割股以救母

陳氏繆好文妻素性賢孝好文嘗遠出姑蔡氏疾篤
繆悲泣號天引刀割股肉作羹奉姑食之而愈

蔡氏戴熙妻孝事舅姑時熙以事出姑病篤蔡驚愕

悲號密封股肉以進姑嘗之曰是何藥適飲此便覺氣爽從此遂愈壽至八十餘

繆氏徐世隆妻姑蔡氏嘗病危繆剗股肉一臠作羹以進姑病得愈

邵氏周松繼室前妻繆氏生三子邵復生四子撫愛不分彼此其後子孫遠前夫妻母子毫無間言

繆氏繆時熙女徐起元妻也未嫁時父有疾女哀禱百端潛入內室剖股肉一臠進父父病尋愈後事舅姑稱能孝可謂出於天性

張氏左丞張麒孫女也麒子禮明國初從征安南有

秦州志

卷之六下

四

功授廣西衛鎮撫禮子福赴京承襲道病卒於淮其妻亦故遺孤張輝才六歲福妹時年十五耳憐兄嫂偕亡誓撫孤姪以延宗嗣終身不適人事聞朝廷爲建祠祀之

陳氏王天文妻夫亡氏年十八子三月守節四十年談氏陳聖徵祖母年十七夫亡守節三十年

黃氏陳雲翼母夫亡矢節

繆氏蔡佈繼室也佈亡撫前妻遺孤無異已出守節五十餘年以義方教子諸孫滿前莫不以爲節義慈愛之報

劉永光繼配李氏及庶黃氏同心矢志李年二十七
黃年二十二撫育遺孤苦節五十年

楊代妻許氏廿二歲娶居教育遺孤嗣孝有義方今
年五十一

劉永泰妻許氏素嫻閨訓婦德爲里中模範廿三歲
夫故時孤奎聲甫二齡閱數月復舉遺腹孤韻聲
自矢從一貧苦不改其操堅節五十餘年至七十
歲而歿

繆氏張鶴妻適鶴逾年甫十九而寡茹苦撫孤歷五
十載壽七十卒

泰州志

卷之六下

四

徐氏蔡本立妻年二十四本立故止一女乃取宗人
子爲嗣苦節自守卒正同穴之義

繆氏蔡儀妻年二十儀殞而無子繆將以死殉翁姑
諭之繼嗣以衍後乃立嫡姪本盛爲嗣勤儉操作
卒至溫裕壽至七十二

徐氏年二十一良人繆好忠歿遺孤師昌襁褓中姑
趙羸病侍奉湯藥不少怠事太姑陳愛敬惟謹訓
師昌一稟義方國子司業傅新德旌曰節婦慈母
萬氏本鮑氏女育於萬爲繆達妾旣寡宗黨爲其少
而貧且卑勸其易志萬泣曰妾雖少賤念主亡乏

嗣而嫡徐又窮且病妾去當誰與存者不然者已
早從亡人地下矣衆憫而聽之自是事嫡如母腐
豆紡績供朝夕後壽至八十餘宗族哀其志而遞
供以贍之

楊氏于鑒妻年二十四鑒亡苦節堅守壽至八十四
而終

于氏季昕妻年二十六夫故子幼乃耕基地三畝以
自給菜羹麥飯僅充饑餒而清操勁節凜若冰霜
焉

叢氏蔡經後妻也歸經七年而寡時二十六歲父母

秦州志

卷之六

下

四

勸其改適辭以寧死不爲禽獸行况蔡先有子焉
忍棄之乎於是力貧以守雖門戶衰薄苦撫前子
目見其成年七十三卒

徐氏于駸繼室也年二十七夫故撫前妻遺孤森以
守無何森又沒媳孫氏年二十六姑媳相依矢不
二天人稱雙節云

繆氏適徐銀年二十六而寡遺孤二月家徒壁立父
母將嫁之則抱孤號哭於墓所三日不食期於必
殉聞者哀感相勸歸里人爭養之時稱百家母生
平不妄言笑教子以嚴壽至六十

方氏繆日進繼室父爲郡庠生方炳許字日進未嫁而繆暝女聞訃卽不食恐父不諒已將投繯父慰曰任行汝志不強也何至是女乃過繆氏服喪成禮誓不歸後竟卒於繆

繆氏適沈應旌同牢三載生子士道甫七月應旌辭世繆年廿四耳誓撫幼子以報沈奉舅姑勤家務極勞動不辭分運採風旌以櫬行年七十五而殞計孀居四十餘年

繆好曾妻蔡氏師周之母也二十歲而孀家甚貧以從一自矢謝鉛華屏膏沐或勸其易節爲斷髮以泰州志

卷之六

覓

明志茹苦力貧日教子課孫後家漸溫裕而刻苦不少懈齋素五十年壽終八十五于氏性端淑舉止恭慎離燕居言笑不妄發歸徐瑞甫夫婦相敬如嚴賓事翁媪能孝年二十二夫卽世有二女而未舉子貧窶無倚賴家人欲奪其志則號哭不欲生又自斷其髮始獲免飲冰蘂三十二年今年五十三操至老而彌堅云

范氏名家女年十七字國學生繆時良時良卒南雍櫬回范求死同穴已而自思幸有娠三月盍少忍以延繆祀乎及免果得男卽今名日華者也撫鞠

教誨卒振起宗緒壽逾七旬歿分運公獎之

氏庠生繆紹且妻事翁姑滫瀡畢具朝夕奉養必
謹紹且每夜讀錢必篝燈緝績以佐之晝日相敬
無嬉容媠語二十九歲爲未亡人束身嚴整舉動
一準於禮法專心課子不務姑息秉節四十餘年
壽終七十有四

任氏適繆四瀆三相長子也四瀆早天一志不變諸
娣姒盡饒樂美服飾任荆布與居無忤容無羨意
蚤夜縫紉緝績以課子讀子五玉竟得補郡庠任
喜曰汝能立吾今始無憂矣處空幃二十九年今

泰州志

卷之六下

辛

年五十一

沈氏繆好直繼室好直先娶顧遺子師且沈撫教與
所生師商無異庭闈之內愉愉懌懌且忘其爲繼
母商忘其爲前母之兄也及旦蚤逝沈復恩鞠其
遺孤臨終猶囑其子商以善視云

周氏 誥封宣武將軍繆夢熊配 贈恭人乙未武
進士河西務守備繆祚母也溫惠淑慎拮据以理
家務身先婢僕親鄰族黨以窘乏來告者隨厚薄
率有助未嘗使缺望里中稱爲賢母鄰婦有產女
而殞者爲攜歸鞠養長具粧貲擇嫁之至今猶嘖

嘖人口

徐氏繆懷沙妻賦性柔順而持身以禮閭範著於鄉閭沙蚤逝時年十八遺孤子師舜生始五十日宗祀不絕如綫辛勤備歷卒全繆祚壽至七十三歲徐氏繆蒙詔妻奉尊嫜相夫子皆足爲閭內式里人同聲稱之曰賢年二十二孀居束身有禮舉止無愆於儀嚴於課子每事教以端方分司張旌之袁氏錢載妻年未三十而寡撫育諸孤令不墮先人之業一切艱瘁無不備嘗

袁氏吉應和妻年二十七夫亡堅貞自守貧窶異常時其父病狂伴之者恆被齧傷惟氏侍湯藥則怡然相安人以爲節孝所感

陳氏吉華妻年十八華病故生子才數月志撫遺孤壽八十三而卒

王氏吉源妻十九歲寡遺孤方朞歲力貧守節時年大潦忽一日溺於水里人奔救輒故汨愈深及引以板木乃憑之而浮蓋不欲令人手援也上司屢旌表

馬氏顧應鳳妻廿齡夫歿誓以身殉家人守之不得間久而少懈忽自經於夫柩前遂與之同穴

朱氏適李應麒數載年二十餘麒以廢疾死晝夜號泣水漿不入口未幾投繯死

宗氏女小海宗部女幼年許字陳必堯明嘉靖三十年倭寇掠鹽場必堯走死女時年十七誓不再適斷髮毀容往陳門成服執婦道以事舅姑繼姪陳弘毅爲嗣壽至七十八官司請於朝建祠興化有司歲祭仍建坊旌表卽以嗣子弘毅守祀事

袁氏女袁應芳女宗烈女甥也幼字儒士陳一猷一猷年十八而夭女與同年生誓不二天謝鉛華衣布素家人有勸之嫁者輒以死拒之久之聞有委

禽者卽吞金求死又自經家人畏而止嘗冬月圍爐或有言及婚事者女卽投火中頭面俱焦灼自是無敢復言者至年二十八忽病父求醫女曰今得死所矣不然父母之累未已也遂不藥而死兩家議合葬未果時一猷塚有瓜大可二尺圍長尺許一帶兩瓜而實連理衆見之採歸曰此女貞心所凝結而成者也遂決意與合窆一時爭觀並蒂瓜者以千計無不悲歎相傳里中有瑞瓜圖并題詠文多不載

陳氏朱應旂妻十八矢志甘貧苦節壽八十三 朱

氏周祚妻十九歲祚沒堅操沒世年逾八旬鄉人稱二節

朱氏吳邦盛妻年十八稱未亡人遺孕甫四月將以身殉衆諭曰汝死奈腹中所遺何乃稍緩無何生一子遂力貧守子壽七十九

秦氏爲吳位側室年二十九位卒嫡子欲嫁之秦以死自誓淒苦百端紡績自給撫其所生之二子年七十乃卒

陳氏居伯子妻年十八伯亡孤炳才一歲食貧苦守與娣氏相勉以其濟年七十而終

秦州志

卷之六下

五三

冒氏居仲子妻年二十六仲逝子甫八歲與伯子妻陳氏同心秉節年六十餘

袁氏庠生唐治妻袁潤女年十七治夭毀貌瘁形時遺腹方數月後生子應元訓課嚴勤有聲庠序壽八十餘官司屢旌

夏氏單可教妻二十三歲撫孤官司旌之

馮氏呂才妻夫故時年二十五家無擔石甘貧苦守官司屢旌其門

錢氏唐應元側室年二十三寡未生子女時嫡已歿撫其所生諸子及孫慈愛篤摯終身無間壽八十

陳氏朱文鳳妻夫故時年十九有遺腹三月翁姑憐其幼勸令改適堅不從寧甘貧守孤官司旌表歲給米帛至七十餘始卒其子啟明娶妻二載妻歿遂不更續母病剜股節義慈孝萃於一門云

朱氏宗柱妻年二十一夫故遺一子甫三歲後又舉一遺腹氏堅志死守孝養舅姑卒葬以禮壽八十

一

顧氏單一鶴妻年二十七守節撫孤壽六十七

劉氏夏之象妻年二十二孀居教遺孤茂蓮爲名諸

泰州志

卷之六下

五

生壽至八十九

宗孝女父允恭得異疾醫莫能識經年餘將不起女時年十三夜禱於天剜股肉一臠烹以進父立愈後延廿五年壽七十五而終

宗氏女允恭孫女 正心繼母許病篤女剜股療愈而不自明後二載父母見瘡痕詰得故而隱痛焉

以上承入十場志以下新增

補列女節孝傳

宋李氏廣陵人逸其夫姓嫁期年喪舅姑相夫葬祭盡禮夫以質販為業晨出暮歸李必告以毋求不義之財夫感其言人以為長者淳化中夫亡服滿其家欲嫁之李礪刀截髮乃止

明劉氏韓鵠妻鵠死無子遺言父宣納妾生子輪未幾宣與妾皆死氏守節奉姑誓自鞠輪時年二十未有出試乳即得乳輪長稟嫂訓如母姑既以色養終為輪成室生五子氏年八十四

盧氏徐寬妻早寡撫教孤燿官都御史得旌如例

秦州志

卷之六

五五

賈氏吳其仁妻幼孝父母父病籲天割股得愈年十八歸吳事舅姑尤盡禮生一子三歲寇至謂夫曰宗祧為重君當携子速逃我暫歸家夫未行即閉戶自縊死至今鄉人猶稱吳烈婦家

俞氏新安人吳二妻僑居秦州歲暮迫於逋鳩死俞治喪具畢舉餘鳩一飲而盡隣人欲以藥解之俞拒曰吾夫已行我當同往也

李氏孫世華妻華死李年廿二或勸他適破面示無二志姑病割股救之年七十五臨歿出所藏破面割股血衣以示子孫既歿遠近皆有異香云

顧氏王日昇妻王愚駭娶甫月餘嬰奇疾歿顧猶處
子也貧無所依乃還母家日侍母側母病篤割股
進之愈節孝並著有司屢旌其門

夏氏張裔仁妻崇正六年夫亡氏年廿八食貧撫孤
備嘗艱苦閱二十七年

薛氏張裔緯妻年廿五值兵亂被掠不從殺氏八歲
女貫槩以恐之氏遽投河死

皇清二氏州庠生田大有妻性賢孝年未三十而寡撫
兩子成立訓以義方長士龍後舉鄉飲大賓苦節
六十餘年壽九十七順治十三年奉

泰州志

卷之六

五

白建坊于溱潼鎮湖北莊孫毓英侯補州同

孫氏庠生沈元美妻夫亡氏年廿三子喬生甫二歲
女週苦節奉翁姑教子女禦強暴喬生膺選拔仕
至肅州副使道氏五十九歲卒康熙十九年

題達奉

青建坊

詳載前
宮志

蔡氏名蕙父貢生孕琦性侃直不阿比人遂以仇陷
幾罹大法蕙痛父未嗣無辨其枉者日夕禱天誓
與父爲生死卧苦由者四年恭遇

聖祖南巡上書道傍

召對舟次孝動

宸衷勅下有司覆核得孕琦以迂直致誣情狀上

聞奉

旨釋還父女相攜歸里而琦以餘年習舊業復試南北
闈生子滋滋年七十八考終於家明父素行而又
全其宗祧蕙洵堪與古緹縈媲美矣

俞旨建坊專祠享祀也宜哉

王氏吳守信側室事吳未久無出嫡沈氏故三子俱
襁褓撫若親生及守信沒氏年廿二矢志不移待
三子恩勤倍昔三子長教誨諄切踰於已生故三

泰州志

卷之六下

五七

子俱醇謹孝友長子銓尤稟慈誨端潔有名譽孝
氏亦如親母銓子湘湘子邦柱於雍正四年請詳
具題建坊春秋祭祀

沈氏吳湘妻夫亡氏年二十遺四月孤邦柱氏欲以
死殉庶祖姑王氏止之曰吾本無所出而幸撫嫡
子成立况若有子死易事母爲也氏乃養親撫子
倍極荼苦晨夕惟王氏是依教子邦柱孫熾咸列
宮牆矢節四十九年州牧魏勸云撫四月之新雛
怙而兼恃奉二人于垂老婦以代兒剪髮供餐舅
姑之頤顏常解服髮盡禮死生之孝德無虧各憲

請

題建坊

春秋祭祀

池氏吳瀨妻年廿四夫亡繼姪邦楫敬事衰翁及繼姑五歲連凶氏紡績針工不缺肥甘老而貧乏衣食不完未嘗怨及嗣子從姪邦柱于雍正四年請詳具 題建坊 春秋祭祀

周氏徐篤生妻徐以嗜學致疾卒氏年二十六無子矢志奉翁姑與夫堂兄鳳生婦張氏約曰異日生男必嗣我夫張應曰倘更有子誓不違此言越五年張果產男立為嗣撫幼事衰竭誠盡瘁翁姑歿後喪葬如禮子長名漢感母五年前之誓輒痛切

秦州志

卷之六

五八

不禁孝養亦盡力及氏卒逢

恩例請旌奉

旨

建坊 春秋祭祀

韓氏張子熾妻順治乙酉三月鎮亂婦時在母家為卒所逼投廁死藁葬鎮之東原子圯投有詩名 翟氏施宗周妻庠生震鐸祖母夫沒食貧矢志撫十歲孤一儒成立閱四十八載後一儒以孝舉于鄉 氏係嘉社婦徐氏不以夫陞失敬慎禮夫亡矢節 三十五年兩節媲美輝映後先云

苗氏仲敦妻敦邁疾謂苗曰我死汝少無子當為終身計苗泣曰果若是惟相隨地下耳敦卒縊於西

園樹下結縞九十四日聞者悲之

吳氏桑暘谷妻桑死氏年廿六事孀姑盡孝順治三年寇亂子九級適他出倉卒聞變偕婦李氏抱幼孫匿草間賊搜得之強與俱行以刃加其頸吳厲聲罵賊賊怒殺之李見姑死大哭罵賊母子俱被害

黃氏太學生朱象乾妻夫卒氏年廿五守節教子長璣次玖次璐皆庠生苦節四十九年長璣娶亦黃氏名孟淑璣天淑年十八遺腹三月誓得男則生果得男名絃苦節三十六年絃娶亦黃氏名德懿

秦州志

卷之六下

五

絃又逝懿年廿六遺三子矢操勿懈長子開一郡增生次曾祚邑庠生次予一太學生孫頤年等皆有聲庠序氏苦節五十年前牧郭獎曰一門三節蔣氏朱南溪妻夫卒氏年二十無子家資分散苦節五十年族人卽舊地爲祠

孫氏袁天樞妻夫卒氏年廿三撫三歲子麟趾敬事邁姑養葬如禮閱數十年艱苦備嘗壽八十三曾孫發桂有聲州庠

甘氏父名君聘許字冷子未嫁而冷天氏閉戶以棉塞口自經死州牧段親設祭拜之獎以額并詩

見藝文

李氏國學生宮景耀之妻也性端嚴嫻內則鄉里肅
聞範耀逝氏年廿九撫獨子繼芳水霜矢志艱苦
倍嘗以母代師講論弗輟時訓其子曰爾父忠厚
承先家傳孝弟貽謀不墜望汝成人汝一身繫宗
祧絕續之重尚振拔毋自棄由是繼芳恪遵母訓
勤誦讀勵端方不昧蕭氏之遺金普造濟人之茶
舍賢母令子遠近稱之後宮氏日見昌榮歷傳孝
節皆氏義方啟後五十一年苦節丸熊之報也壽
至八十有二

常氏禮部儒士宮繼芳妻芳子立父亡母孀氏奉孀

秦州志

卷之六下

卒

姑李氏晨昏盡孝姑減食則坐卧不安偶疴則籲
天致禱相夫治內克敬克勤年二十六卽奪所天
氏痛不欲生願隨地下姑泣諭曰捐生易接嗣難
爾身孕四月儻天眷宮氏得延一縷不第吾衰有
寄實祖宗禮祀存亾之大機也氏泣遵姑命封髮
茹荼衣編卧薪六閱月生子偉銓兩代孤孀相依
爲命撫銓成立苦節三十五年壽至六旬後銓舉
三子皆科甲誥贈中憲大夫

郝氏誥贈中憲大夫宮偉銓妻賢孝性成敬事兩代
孀姑奉晨昏繼甘旨疾則湯藥親嘗憂則笑言仰

慰嘗言於夫曰祖姑既邁姑亦晚年峻節冰操後
先相映况祖功宗德積累彌君復仰前型惜遺
字養志承歡虛公樂善後嗣其昌乎銓立志砥行
內助之賢與有裨焉祖姑李氏疾氏割股以進沉
疴立起延十有四年姑常氏病疫焚香號泣復割
股進廻生三年有奇夫病劇泣血告天願以身代
更向癩痕交錯處肉隨刀落骨現筋崩幾絕復甦
仍親調奉夫回生六載宮氏孝節自李氏開其始
常氏繼其後郝氏又行人之所不能行長子夢樹
擢癸巳

秦州志

卷之六下

六

恩科仲子夢元成巳丑進士季子夢熊午未聯捷選侍
衛歷試詩文稱

上行康熙五十年奉

上特恩改授刑部郎中

欽賜御書詩筵龍袍御章歸奉慈帷氏載拜曰不次之
擢兒輩當潔已奉公上報

聖天子被格特簡之殊恩也

誥封太恭人壽七十

九

李氏州同知李植女生而端肅性至孝寡言辭嘗侍
父側聽講內則諸篇輒凜然無倦容長適沈允宜

孝翁姑嚴內外及允宜早逝氏年二十二剪髮勵節翁病劇氏告天割股延翁壽至七十有四苦志撫孤子世琇閱三十年

謝氏江都庠生謝子恭女性端純明大義事親尤孝適陳慶祚敬孝翁姑相夫成業凡御眾理物一秉禮法夫沒氏年二十九苦節盡孝俾八旬孀姑甘旨不缺操機課讀教子兆封兆元讀書成人閱三十年

李氏李明寰女性端嚴孝二親族人賢之長適王允修生子廷策修逝氏年二十九泣血撫孤以針工

秦州志

卷之六下

給膏火有孫宏勳襁褓中子又逝氏痛夫悼子偕孀媳莊氏節勵水霜撫孫宏勳成立今壽八十有四

周氏江都縣貢生周開先女善事父母親族稱之長適州人童青掄孝奉翁姑相夫成業掄逝氏年廿四苦節撫孤子長裕今三十八年子成立有文譽女亦賢淑諸孫林立

陳氏許效倫妻二十三歲而寡苦志守節今歷年五十五歲撫子宗莨候補州佐宗莨候補訓導四月孤宗萊亦成立

徐氏吳沂妻夫亡氏年廿四嗣姪那桐翁姑年六十餘矢節養志俱享年八十二喪葬如禮凡遇橫逆逼嫁者氏視之澹然惟潛依孀姆沈處今踰五十守節三十載

袁氏州廩生文名世繼室未育文歿時年廿一柏舟自誓苦節五十餘年不輕言笑撫前妻江氏二子治藻如親生茹荼訓課皆入庠序里人欽其賢節褚氏儒士蘭谷女易維精妻夫亡氏年十九遺孤念純家徒四壁氏截髮毀容紡績自給足不踰閭者六十餘載賢節之稱播於州序

秦州志

卷之六下

三

錢氏王世爵妻夫亡氏年十九無出誓節不易水操凜然今三十八年嗣叔世達子家相入太學

劉氏庠生吳邦柱妻感姑沈氏苦節孝敬逾常人姑有弟繫念劉曲意周全之小姑適卜步武中道喪姑隱爲外孫及外孫女憂劉請于祖翁迎歸恩撫之姑心由是泰然後齒落更生姑疾不離側者四十年每禱神求以身代姑卒哀勞成疾終年五十二氏女名三從亦能孝于父母因母疾禱神齋素三年茹蔬食苦里人並稱其孝

王氏父晉原教以禮義氏事親極孝因未有弟持齋

祈佛冀延父後適儒童徐沂沂無父母氏親操井
日勤苦備嘗生一女一男男名俊樸甫六月沂卒
氏誓死撫孤教養多方荒產賦重氏針績完公冬
月手指血裂見者哀之今子已就傅能文矣
朱氏王三仕側室仕公正明毅壽逾八袞子姓繁多
氏生幼子相茂二歲仕卒氏甫二十六歲守節撫
孤仕之嫡子潤公卒妻周氏亦守節撫四子成立
今並以全節終子皆繼志前任州牧俱經旌獎
錢氏田清之妻夫卒氏年廿九育子事孀姑茹荼勵
節今幾四十年子福衍等能竭力養母

泰州志

卷之六下

六

劉氏王宗汭妻事翁姑孝敬相夫成家夫卒撫兩孤
曲盡教養禮法自守勤儉有常子桓有聲庠序

阮氏劉濤妻年二十九夫亡守志備歷艱辛子潢遠
出繼氏教以成人卒年八十閭里敬之

袁女王覺山聘爲繼室未嫁覺山卒女請於父兄親
詣夫柩前哭奠遂縞素居夫家奉翁姑之殯極盡
孝敬撫前室兒女如已生教養曲至未幾以疾終
殯於翁姑之側見者皆揮淚云

張氏貢生俞之騷子煥妻相夫莊順善事翁姑夫疾
剗膚以療夫卒撫二幼女伶仃飲泣孝翁姑甚於

夫存養殯悉中禮今二女婚嫁矢節二十餘年
朱氏梅塋村王天閑妻年十八嫁天閑生一子甫週
天閑卒氏守志孝翁姑和妯娌遣子就傅企其成
立歷年四十以疾終

吳氏庠生曹亨妻亨積學能文氏相夫孝敬生子竑
綱子幼夫卒氏年廿七守志不渝教子讀父書弱
冠遊膠庠食餼有文名早年又沒氏與寡媳同守
備諸苦况卒年七十有九

陳氏廩生曹竑綱妻氏家本海陵大族于歸後能執
婦道勉夫進業竑綱屢試前茅青年早世無子繼

泰州志

卷之六下

五

姪爲嗣氏茹苦守志撫嗣子動循禮法承先啟後
事事勞心閨門之中整齊嚴肅嗣子又沒氏矜孀
孤立奉事孀姑生養死葬悉中禮今年七十有五
李氏張斯業妻夫死子符廷等皆不能自立氏賃舂
以活沒齒無怨苦節二十八年廷又早亡婦韓氏
亦守節撫孤

紀氏王晉錫妻夫死于嶺南氏迎喪歸葬撫六歲幼
子宗濬飢寒備歷誓不二志苦守三十六年年六

十四

沈氏王孫驥妻年廿四守子家爵至五十六歲卒

陳氏金日新妻夫故氏年廿三嗣姪矢節孝養翁姑
曾兩割股年八十三姪婦王氏亦於二十歲守節
撫孤綠萼入泮歷三十二載二氏奉前督憲邵飭
令建祠

文氏陳欽若妻秉性正淑嫁六年而孀事翁姑養葬
如禮撫子順年成立守節三十八載前牧魏獎曰
巾幗完人願年入太學

秦氏王金鑑妻夫歿氏年廿八矢節撫孤子沼成立
入國學鄉里公請前牧魏獎曰節孝可風學憲鄭
獎曰巾幗鬚眉

秦州志

卷之六下

六

范氏鮑忠國妻夫亡氏年廿五遺腹三月矢志不貳
孝奉垂白翁姑生子魯撫之成立教以義方翁姑
沒喪葬盡禮歷苦節四十二年前牧魏額曰冰節
流芳

劉氏王裕忠妻夫沒氏年廿九矢志撫數月孤子孝
七旬翁姑值歲飢遍歷艱辛翁姑歿喪祭如禮子
長教以義方入成均矢節三十四年

徐氏張起鳳母夫亡氏年廿六撫數月孤鳳矢節不
貳教鳳入州泮歷今三十五年學憲鄭獎曰節操
莊嚴

張氏庠生朱士豹妻夫亡氏年甫十九誓死不貳孝事孀姑撫姪樞爲嗣教以成立入太學考授州同知勵節四十年督學魏獎曰節孝可風

袁氏庠生袁仕續之女適太學生宮世洪夫卒氏年廿五誓守苦節毀容茹荼撫姪懋道爲嗣教以文行俾得承其家學矢志四十三年卒

劉氏沈氏前金吾黃位中二側室僑居金陵以詩文交海內名士後遊淮陰遂卒皆劉年廿二沈年廿五截髮投棺內共誓苦節劉子九清太學生亦早有名譽沈子右序浙江黃巖縣縣丞居官勤慎爲

泰州志

卷之六下

七

上憲所重開十九年劉沒沈獨守訓子兼訓劉子壽八十三九清養沈愛弟里人欽之中年疾篤子顯年十八呼天請代日夜勤侍憂痛哭泣致疾父存子死清每言及輒慟哭不止儒學訓導曹濬爲顯作傳

繆氏金子雲妻性貞淑事舅姑以孝夫沒遺孤承家甫十歲苦節教子竭盡心力閱廿餘年子成立名重成均學憲鄭褒曰節凜冰霜

楊氏庠生劉一澎妻夫沒氏年甫十九事八旬姑喪葬盡禮訓七歲孤青照讀書繼父志名著邵庠

陳氏高志韶母夫沒氏年廿八矢志冰霜養姑盡孝
教子有方孀居五十四年壽登八十有三州牧屢
獎以額

沈氏拔貢生陸眉妻眉早逝翁之績亦旋故氏凜節
持家上事八旬太翁下撫週歲弱子茹檠殮茶閱
三十餘載子獲成立入太學各上憲俱有額言郡
守左獎曰節勁柏筠前牧柯獎曰清操如玉

吳氏儒童王德卿妻夫亡氏年廿三孕甫數月氏矢
志不貳孝奉舅姑生子秉衡養教兼至翁姑沒殯
葬如禮子獲成立孫入成均孫復生孫一堂五世

苦節之報宜也

喬氏何起虹妻夫亡氏年廿四翁年七十子爾壽甫
三歲上事下育生養死葬竭力經營子獲成立入
太學守節六十餘年壽八十三歲

王氏劉允壯妻翁病刲股和藥獲愈前牧施獎曰孝
本天性允壯早沒矢節不貳撫子文進成立

陳氏太學高日起妾偕嫡劉氏孝事翁姑起病篤陳
刲股和藥與劉並持長齋起沒劉年三十六陳年
廿四相依守志劉子琰弱冠食餼優文行又早逝
劉亦沒陳撫孤女依琰妻唐氏苦節五十四年唐

事如嫡姑陳壽七十八里中稱一門三節

唐氏明經高琰妻事太翁姑暨孀姑劉氏盡婦職劉病侍藥衣不解帶輒數月劉病篤禮斗求代琰早逝唐年三十遺二孤甫數齡隣火及樓壁已赤氏泣守夫靈竟獲免訓子以義子簪纓繩武俱登仕籍孫鳳翥等亦遊庠凡事子若孫必請命至今守節四十年

錢氏王柳州妻夫早逝氏年節撫孤養殯翁姑如禮子獲成立鄉人稱之

張氏王琬王之妻夫早沒撫二子長六歲次三歲苦

秦州志

卷之六

志教之成立州牧魏獎曰壺教可宗

李氏易采母夫卒氏年廿四撫采及弟桐矢節訓課皆遊庠閱五十九年前州牧武獎曰節並松筠

戈氏陳省吾妻陳沒氏年廿五誓撫兩孤守節不貳省吾以族姪繼嗣家道稍治忌之者衆幸其死兼欲中傷其妻子氏悉力拒之雖百計不搖而茹荼集蓼其窘已甚長子璧田次子廷璧璧田娶婦周氏璧田又卒周年十九遺孕生男曰蔭復天周隨姑守節姑疾剖股以療獲愈戈壽六十六周壽六十二姑婦雙節里人欽之

紀氏貢生陳志敏妻敏父潛心理學家教嚴肅氏
敬素著敏沒氏年廿三無子矢勵苦志備嘗艱阨
閱三十二年前州牧施守揚日獎日節孝流徽沒
七年嫡姪庠生緹繼嗣里人舉其事學勘云早喪
所天青年勵柏舟之節生逢多難皓首完清白之
操待孤嗣而授陳編一線書香不絕對孤燈而泣
遺照百年大節無虧

朱氏金麗水妻夫死氏年廿一孝事翁姑養殯如禮
子獲成立娶婦顧氏子復天遺孫長保漁樵爲業
養殮不繼窮苦七十載無怨言

秦州志 卷之六 下

陳氏太學生芄女州同顏巳生妻夫卒氏年廿三遺
二子襁褓時家中落翁爾萬老疾氏典質曲供甘
旨沒亦盡禮有二叔不與較足不踰閫茹荼訓子
今年七十一子鎔次錦感母孝節亦克順顏色焉
張氏貢生朱紹齡妻齡早失怙兄弟四人十數年間
歿折者三獨齡夫婦養母未幾齡亦逝氏奉失意
之孀姑撫藐孤之宗子矢節四十年姑繆年登八
十有九子相玉年幾四十策名銓曹皆上事下育
之力焉

徐淑姜庠生穎銳第六女年十五父病割股以療卽

愈母黃氏割股四次每割二次母愈月餘後夢神諭曰爾母之壽已終因爾心誠多過半載後割無益及後再割刀果墜下母竟終里人爭爲五割詩
詩歌以美之

譚氏翁御六妻生而明敏熟內則諸書嫁數年夫以客死遺子女各一氏年甫廿六甘貧苦節以十指措薪米值年飢斗米三百餘錢或竟日飢有強委禽者氏剪髮者三刎頸者再夢至城隍廟見三井一極清一稍濁一最濁益堅其志子良駟能孝養女嫁頗脩婦道年六十二卒

泰州志

卷之六下

七

劉氏唐日燦妻氏篤孝舅姑夫婦相敬如賓燦卒氏年廿一子恕七齡次懋方孕氏矢志撫孤家苦貧舅姑耄鬻針工以養姑疾氏割股和藥卒不起號呼痛絕兩目頓瞽州人傳其事咸哀之二子長氏教以詩書恕食餼于庠有文譽

仲氏孫鴻書妻夫亡氏年廿二遺子二長洙三齡次泗三月氏立志撫孤念夫苦志未遇不忍書香中斷命二子肄業督課嚴切兩子應試工文今苦志三十五年

陸氏儒童陳祐妻事舅姑孝夫以力學致疾割股弗

效生子時夏五旬而夫歿舅姑復老病時氏年廿一矢志撫孤三年內舅姑繼歿殯葬如禮有計危孤子者悉力禦之前牧施憫其節給以示言獎以額曰純節可風歷五十年

陳氏庠生黃德溢妻夫亡氏年廿九苦節奉翁姑撫二子竭力以濟貞淑著聞長子國粹列膠庠諸孫羅立壽八十五

仲氏戴國士妻夫亡氏年廿七矢志守節撫三子賃春織衽以活茹苦者四十六年爲子娶婦生子壽七十二前牧柯旌其門曰節孝流徽子露後太學

秦州志

卷之六下

七

孫上德州增生

繆氏袁雲翽妻仁所女夙承家訓夫病氏割股療之後半年亦歿時氏子璐三歲有庶叔尤少氏均乳之不私已子皆成立後氏壽至九十

今庠生瀨濂黃皆其孫也

凌氏夏霖雨妻里稱節孝

王氏徐焄妻焄卒氏年廿一遺孤子家正家祥有利其資而欲嫁之者斷指不貳常携利刃於袖間者不敢犯五十一歲卒家祥子四今諸生朝鑣朝鏘乃其長子驂之後也

吳氏張舟妻薇音吳應裕女姑沒翁存遺兩幼叔待

如親弟生子應宿父幕河南載餘小叔亡翁悲成疾醫藥不起拮据殯殮夫歸又亡氏時年廿四或諷易節泣曰夫遺孤男一門絕續係焉忍萌他志惟願終身無疾紡績撫孤足矣子長率葬二棺娶婦汪氏生兩孫今年七十二每日吾苦辛四十八年幸獲強健子復順意蒼天不負生平之願也里黨皆欽之

魏氏徐九章妻姑病劇夫破脅割肺以救獲愈不能食氏斷七月嬰乳以乳姑得享餘年孫亦成人

李氏徐尚俊妻幼以孝稱夫亡年二十五守節不貳

秦州志

卷之六下

七三

學憲鄭獎曰松正雲質于雍正三年領黃絹享年八十有二卒子四人

王氏徐銘側室銘四十無子嫡丁氏盡脫簪珥潛納

王氏銘四十八始生子名朗子生丁卽撫鞠爲己

子里人稱其賢丁氏與夫先後卒王氏年廿五矢

志不貳觀朗成立至年六十卒

張氏文學潘弘謨妻孝廉洙妹夫死氏年廿七撫數

月孤光第孝事孀姑姑疾坐臥床側衣不解帶姑

年登八旬皆氏色養之力教子詩書今守志三十

八年

楊氏張氏郭氏周氏皆兵巡道崔之四妾四官滇南
眷屬家居及卒於官署四氏年二十餘仇族逼節
遂薙髮焚修卽所居爲淨室康熙己酉夏州牧張
過其地爲命名曰西蓮菴且旌以額曰苦節同正
周先卒三氏卒時皆八九十歲里人謂四在滇曾
查還行營孀婦萬餘人宜其雖小星亦知守義云
陳氏 贈奉直大夫忠純女幼事父母以純孝稱嫻
內儀長適儒童徐學曾卽中丞耀之曾孫也孝翁
姑相夫子夫沒氏年廿九家窘甚孤弘祖襁褓或
諷易節氏封髮誓志撫子以十指給膏火艱苦倍
秦州志

卷之六下

七四

嘗閱四十年子成立有名譽

卞氏宋忠臣壺後國學張雅道妻孝敬翁姑祖翁伯
鯨乙酉年以兵部侍郎捐軀殉節雅道驚哀致疾
閱五載而歿氏年廿七撫三歲子樹芳苦節五十
一三年教子成名壽七十九

徐氏附監生蔡尉繼妻進士我達女歸蔡撫前子衮
如已出夫卒氏年廿八子衷甫十有七日鞠育雛
孤飲水茹蘖前子又卒撫兩世孤兒持苦節四十
餘年壽七十一

鄭氏王宗華妻年廿一夫亡撫子慶高守節至今二

徐氏太學生蔡蔚妻夫亡氏年廿二生子甫十七日
氏立志堅貞撫子成立苦節四十餘載今年七一
朱氏生員黃灝妻灝亡氏年十九有遺腹三月終夜
焚香祝天祈男嗣後果生子名宮檀紡績以教姑
病告神願以身代及卒喪葬盡禮檀年十六入泮
補增廣生員學院許旌氏曰婦範母型勵節五十
年卒宮檀病肺婦田氏割股入藥而愈後田氏病
次子元煨亦割股不效苦節兩世里人稱之

李氏蔡士雄妻雄誠慤樂善不永其年氏撫兩孤於
襁褓輾轉延師課子卒致名譽前牧魏旌曰松柏

秦州志

卷之六下

六

同堅今年七十子二崧國學生嶺歲貢生

徐貞女割肝徐孝子女也幼許鄉民劉百雄子南京
保爲妻南京保痘死女長守貞不字閱四十七載
孝節一家里人傳爲美談

弘氏黃自修妻素以賢孝稱姑傳氏胃疾幾危氏籲
神割股以進立愈鄰人負翁債翁往索氏急止
曰已償矣隨質衣以呈或問之曰彼人素強悍翁
不甘必相傷也凡體翁姑意類如此儒學通報州
牧武獎曰賢孝堪風學憲張獎曰孝起萱幃

洪氏庫生程垣之妻垣本歙人居梁梁場早卒氏年

十二年

賈氏賈國江女幼孝父母嫻內則尤好讀班曹闕範諸書親族交口稱賢長適行人副司劉業孝奉翁姑敬相夫子夫歿氏年廿九苦節撫孤子植基在基針工夜課封髮茹荼閱三十餘年兩子業儒有文譽

汪氏洪飛龍妻夫沒氏年廿四一子襁褓矢志不貳家徒壁立艱苦備常采蕨灌園以給義方誨孤有成授室生孫子復死氏苦節四十餘載前牧魏獎曰勁節可風

泰州志

卷之六下

五

尤氏王裕還妻夫故氏年廿五遺孕六月家貧姑邁婉子德慶矢志不移養姑撫子疊遭水患艱苦倍嘗今閱三十一年

朱氏太學生卞玉質妻夫亡氏年廿五子菊友甫週矢志事翁姑撫孤子艱辛萬狀及子婚娶生孫慶山方六歲子又亡氏復與子側室高氏甘貧茹苦共撫孤守節至四十餘年學憲張州牧武皆褒以額年六十五卒孫亦成立

朱氏名蘭太學生朱人最女年十九姿稟純孝父病割股以救剝鉅及父痊而女病遂卒里人悲之

廿八矢節撫四子有成年七十

黃氏朱天開妻天開性昏騷氏不以夫病失齊眉禮夫亡剖面自誓四十年仍處子云

嚴氏劉允懋妻允懋業儒以攻苦早歿氏年廿一止一女家貧甚與孀媻許氏共誓守節紡績餬口足不踰閭女嫁而亡撫許子歷數十年嚴晚年以女工所餘購木爲棺許氏疫沒以棺讓之踰數日嚴繼歿其姪貧且病外甥周純熙斂之嚴苦節六十二年壽八十三里人哀其苦節後甥孫周本誠走京師乞邑紳唐麟翔爲之序闡幽表節輦下諸巨

泰州志

卷之六下

七

公輩各爲詩歌賦贊以表之裝潢成卷尤者載藝文志

田氏儒學教諭宮必端妻弘文院中書舍人昌宗子婦也幼端淑有舊家矩矱翁先逝事姑卞氏色養備至姑多病隨夫拜斗茹素者三年姑病劇禱神割左股以療得愈閱數年病復舉又割右股療之姑壽八十有二人稱孝感及姑終哀動閭里墓旁有田百畝爲富豪所奪脫金飾簪珥以復之永供祭祀守節二十餘年撫襁褓孤兆羣成立入國學王氏文學方開美妻夫亡氏年二十一子鳴鳳甫三

齡苦志守節教子讀書二十遊庠爲增廣生後以
入闈得病遂故遺三孫氏又撫孤成立年六十七
終前牧武旌曰行符女則

劉氏少保公孫女州同知俞棧妻夫亡年二十八矢
志不貳勤儉持家孝事孀姑不怠撫孤子耀成立
教以義方入太學有聲氏今壽七十有奇

朱氏朱世臣女秉性純孝父病刲股里人稱之長適
儒童葉天位甫二載夫亡氏年二十遺子霖矢節
撫教學憲法拔入郡庠歷今三十七載學勤有撫
九月之遺孩完百年之大節等語

泰州志

卷之六

七

陸氏陳壘成妻夫亡氏年二十矢志撫孤子縉白襁
裸迄於成立訓之以義娶媳徐氏生二子縉又亡
徐誓奉姑守節姑婦共茹荼蓼以撫雙雛又獲成
立閱四十餘年

方氏畢淳如妻夫亡氏年廿九上奉翁姑撫襁褓子
懽生食貧矢志翁姑壽終殮葬如禮子壯授室婦
又亡懽義不更娶方道撫孫閱四十餘年前牧魏
旌曰松筠清操

陳氏劉士虎妻虎隨父卜師任肇慶守備制府委授
封川千總僅轄二十人時海盜聯四巨舶乘風而

來虎曰宜速迎戰至岸則受其毒招一卒自隨躍
小舟手鐵鑊重百觔大呼創敵舟戰數十人盡披
靡後十九人始至凱還制府大喜加賞擢大用在
卽而竟以是役傷力死陳氏時年廿一數千里扶
櫬歸備歷險阻竭盡心力守節撫孤孝事孀姑王
氏閱廿餘年長子宗敬勵志下帷學憲鄧公拔入
郡學次宗敞業儒可謂忠節一門賢孝繼美矣

徐氏浙江提學陸舜子州庠與齡妻也夫亡氏年二
十三絕粒七日翁姑勉以撫幼時子 甫五歲氏
仰事俯育崎嶇聞越歸日養殯翁姥手植墳樹課

秦州志

卷之六

五

孤子成明經孫枝蕃茂以壽終

林氏嘉靖壬辰會元春曾孫女夏情宇妻夫沒氏年
十九遺孕產男撫養教訓迄於成立氏壽八十目
觀曾元里人欽之

鄒氏戈弘毅母夫早逝氏苦志撫孤操持水雪子獲
成立訓以義方歷節數十餘年里人欽服前牧焦
獎以柏操松齡額言

王氏庠生宮弘鉞妻夫亡氏年廿一畫已容與夫容
對坐以示同穴之意子女俱殤以姪懋勤爲子撫
之成立苦節四十一年

楊氏王世達妻夫沒氏年廿三茹藥撫孤矢志不二三十年如一日子家棟入太學皆氏苦節之報云
田氏增生蔡哀妻哀歿氏年二十賢孝性成事上馭下悉有禮撫四子愛而兼勞今苦節廿載前牧魏旌曰松筠勵節

俞氏吳秉鐸妻夫亡氏年二十九撫三月孤思源移居父側教思源成立入國學營葬夫及翁姑太翁姑凡五棺

顧氏金介祉妻夫亡氏年廿九遺孤魁六歲氏矢志守貞孝養翁姑食貧茹苦教子讀書早年入泮苦

秦州志

卷之六

下

八

節三十四年

顧氏冒明遠妻夫亡氏年廿七子躍龍未週矢節事翁西庚姑戴氏及繼姑吳氏最孝翁姑沒事必稟命叔翁天庾人稱有禮卒年七十九躍龍亦卒教孫與齡成立讀書自愛

朱氏太學生黃霖妻夫亡氏年廿二撫遺腹子矢節閱今廿一年子名永年魏牧獎曰潔比冰霜

袁氏庠生沈嘉木妻夫亡氏年廿七一子壽焜襁褓茹藥撫孤克勤克儉守節六十餘年州牧屢欲詳旌曰吾不爲名也壽八十六

玉寬嚴並至壽至七十七歲孫霖雲皆列名庠序
食餼有聲式玉事母以孝稱母沒哀毀號泣感動
路人

徐氏都察院左都御史徐耀孫女貢生朱允彝繼配
也生而純孝淑慧端恭寡言辭嫻閭範孝翁姑如
父母相夫成業克儉克勤凡制事御衆禮法秩然
夫歿氏年廿九撫孤子秀升璧升操機課讀歷盡
冰霜脫簪珥以憫婚嫁罄資財以活遺嬰給衣食
以贍親鄰肅內外以嚴家教苦節三十八年俾長
子列成均次子考授州同孫燦亦叨黌序克振家

秦州志

卷之六下

八

聲壽至六十有八

魯氏范子榮妻生子日耀三歲夫亡氏年廿九矢志
茹苦教子成立氏疾耀割股以療獲愈前牧魏獎
以節並松筠四字今壽七十一

孔氏邱奎妻夫亡氏年廿八有孀姑及襁褓子衣食
無措氏矢志不移日夜紡績養姑撫子姑以壽終
子亦婚娶

李氏楊江繼室夫亡氏年廿三子士楚甫六歲二女
尤幼誓節撫孤長齋終身倍歷艱苦子女皆成立
閱三十餘年沒時曰吾庶無愧遺囑矣

許氏項氏一以孝稱一以節稱學牒勘云刑部郎中
田敬錫元配許氏榮叨翟莠賢踰雞鳴甘旨晨昏
堂上椿萱交茂蘋蘩錡釜澗濱湘採躬親再查項
氏敬守前型義嫺婦節變遭鳳隱霜天獨雀棲清
志凜松堅雪夜寒筠晚翠崇孝思則許當首錄褒
霜節則項可同登云

解氏繆其襄妻夫亡氏年廿五子甫三歲氏食貧矢
節上事下育子長娶婦六年子又亡遺二孫以蕃
以宣氏又撫而教之今守節二十三年

蕭氏儒童潘鳳巢妻生子囁過而夫逝氏年廿二斷

秦州志

卷之六下

全

髮毀容奉上育下安貧矢志閱今三十二年

杜氏庠生朱賡南繼妻夫亡氏年廿二遺百日孤式

玉氏誓天截髮奉邁姑撫幼子食貧自勵閱今三十
十年

陳氏吳儒宗妻夫亡氏年二十僅遺腹一女嗣姪爲

治奉翁姑教嗣子守志四十八年今六十七歲

謝氏陳宜公妻夫亡氏年廿九遺二幼子氏孝奉孀

姑慈撫孤幼食貧不悔志節凜然閱今二十二載

任氏繆四瀆妻生男五玉甫週而夫亡氏年廿三矢
志不貳以十指給朝夕奉翁姑孝謹倍常教子式

顧氏易宗堪妻易以誦讀致疾卒氏年廿六節婦
孤純臣教以義方早入庠序文譽翕然閱今三十
餘年

朱氏太學生繆琮妻夫亡氏年廿九撫教五子勤儉
矢節今年六十五長子咸入太學餘皆成立

丁氏陸之槃妻夫亡氏年廿四守節 子祖贊成立
娶婦薛氏贊又亡嗣子大展姑婦共砥苦節教展
入泮丁年七十二薛年六十一前牧王獎曰 嚴
冰淨

楊氏江夢生妻生三子夫早卒長次子俱夭凶歲絕

秦州志

卷之六 下

三

食煮麥餉兒已則耽飢守節五十年壽八十長子
之瑞娶李氏子早亡遺腹子永益娶王氏永益又
卒遺子榮先王氏效祖姑節苦守三十五年

陳氏于德陪妻夫卒氏年廿九上有兩代翁姑下遺
四子一女氏事上極孝迨太翁姑棄世翁姑猶存
孝養更倍于昔撫教子女慈嚴並至日夜紡績以
供事育今婚娶已畢歷三十年冰雪備嘗遠近稱
焉

田氏增生命俞颺妻孝事翁姑敬相夫子颺早逝乏嗣
翁姑復相繼歿氏勵幾死一切棺殮祭葬悉中禮

撫育幼嗣不啻已出守節近三十載前牧魏旌曰
冰心玉節

楊氏羅 妻夫亡氏年廿六撫二子苦節閱五十
年長子繼文早卒婦葉氏年廿八矢志不易撫三
子成立長克純國學生今壽七十二

戚氏王盛甫妻夫亡氏年廿六孝奉翁姑矢節不易
艱苦倍嘗守志四十五年今七十一前牧魏獎曰
節孝齊芳

陸氏太學生蔣甸妻夫亡氏年廿一撫孤守節奉孀
姑極孝前牧魏額曰節孝可風無何子又亡氏撫

秦州志

卷之六下

四

子婦幼孫食貧茹淡子婦俞氏亦效姑苦志歷三
十年人謂一門雙節

周氏侍御俞鐸副室俞分廵口北嫡張氏早卒氏治
家嚴肅俞以王事卒於任氏年廿七子澄甫六歲
氏同嫡子演扶襯歸澄又殤遺孤二人氏教育之
皆補弟子員年七十九

陸氏江子雅妻年十七歸江夫癩疾不起飲食藥餌
氏必躬親簪珥盡鬻號泣極哀夫卒無子且貧有
諷其改嫁者謝曰我命孤苦不想過好日子也始
依邁翁翁卒依兩叔針指度日垂三十年

周氏名嬌細民女也年十六嫁薛麻子薛客死江湖無子外乏親戚氏不嫁曰婦人身體不可再靠人也賃屋以居織莞蓆餬口至今皤然白髮矣

韓氏徐尚秀妻徐故氏年廿七長子敏七歲次儀五歲季忠三歲衰姑周年七十五食貧矢志拮据女紅事姑十餘年如一日及沒喪葬成禮教三子成立守節四十二年卒州牧褚獎曰代子兼師

唐氏太學翟士仁妻孝事舅姑敬相夫子夫亡氏年廿五守節撫孤元泰成立今入國學壽六十五矢志四十年前牧魏旌曰筠節松齡學正徐旌曰松

秦州志

卷之六下

又

貞柏壽

唐氏附監易理妻夫亡氏年廿九上事孀姑以婦代子下課諸男以母兼師足不踰戶外孝節爲宗黨交稱今三十餘年

張氏邑廩生張廷瑞女事父母孝長適太學宮雲宗孝翁姑敬夫子夫以勤學成疾卒氏年廿九矢志守節撫教孤子慕琦文行卓然諸孫克承家學守節三十六年壽六十五

繆氏太學朱之揖妻夫沒矢志節撫二子辛勤茹苦教以讀父書支持門戶克承先業今三十餘年長子

綬入泮次子奕煥有文名

蔡氏貢生蔡觀女性貞淑內外皆以賢稱適庠生繆秉忠事翁姑誠敬夫逝氏年十九矢節撫孤子棟茹荼封髮足不踰閭三十餘年翕然稱之

蔣氏沈日正妻夫逝氏年廿一家落年齒荼苦備嘗紡績資生撫三子成立氏年九十前牧武旌日寒月機聲額言後三歲卒

陳氏太學曹守鄴妻庠生陳澤弘女夫亡氏年廿五子臺甫二週守節事孀姑疾籲天剖股獲愈撫孤課讀以母兼

泰州志

卷之六下

八五

顧氏年十三喪母值父漢珮危焚香告天剖股投藥密伺父服越日疴起長適周純熙親操井臼孝事翁姑相夫敬戒持身恭讓生二子教以中正壽七十七

王氏進士徐我達之配徐故氏年廿九子幼家貧氏撫養教訓皆入鄉國學苦節至九十二忽病第五子國學徐鴻磐妻柏氏剖臂死一門節孝至今過其墓者皆稱之

劉氏劉金秋女文士科妻夫亡遺三幼子氏年廿八水槩自矢屢值歲荒紡績以供衣食翁姑及夫二

楊氏中翰張道乾妻名文珮年廿七夫亡砥礪
五年雍正二年儒學睢州詳請旌獎勸詞松
性歷冰霜而柯秀枝榮金玉其相邁磨涅而
澤潤東海泣鮫人之泪萬苦竟伸其操北風
女之花百折不移其志堅貞既符乎年例輿
切於播揚等語氏妹文瑛因母病不嫁後母愈
戶部主事巴格夫亡與姊同節

賢淑

袁氏南康太守九深公女孫檢討宮偉鏐元配警敏過人德有其才遇事必先幾洞悉非里巷淺見所能及事姑潘恭人先意承旨以色養鏐優游林泉歷四十年氏黽勉有無不惟安之而有以成之知大義動以禮自處逮下之惠誠有如樛木所咏者教子若孫不嚴而肅以子夢仁貴封安人累贈一品夫人

李氏興化李文定公五世女孫大中丞夢仁元配性方嚴甘淡泊事舅姑善承意旨凡一言一行得于

秦州志

卷之六下

六

舅姑者雖纖悉必遵不敢忘方中丞應試京師往來廿載居行耗費悉氏拮据支持操家若食貧婦一切家政皆井井有條以母兼父教子若女有成下逮臧獲能容宥其小失雖遇中丞盛怒必曲爲之解中丞官御史聞啟

奏必進曰職掌固然萬勿損他人安自己且謂

天顏咫尺勿似居恒懃直不認錯也比巡城中丞秉燭起氏每強起丁寧刑毋深刻長存不忍之心爲後人積德後抱沉疴以聞姑袁太夫人訃一慟卒于署累贈一品夫人

仲氏俞太史梅之生母也性婉淑喜儉素課子最嚴
族黨皆稱其賢梅兩擢巍科出入禁苑鄉人榮之
氏獨誠諭諄切逾於未發時

仁皇南巡梅適充維揚詩局纂修官

天語詢家世

宸翰書畫永承恩四字令內侍傳

旨云編修俞梅之母賢孝可嘉特賜與匾額梅歸建

宸翰樓

萬壽覃恩封太安人今登八表

俞氏名稱文繆司空沅配也父楷博學篤行工詩文

秦州志

卷之六下

七

御試高等

內廷纂修出爲華亭教諭母劉孺人工

書法通經史引古賢女日夕訓誨氏遵家教事舅

資政公孝謹相夫理家和平恭儉植福深厚有柳

顏懿範司空宦京師諸子年俱幼氏以母兼教師

自學舍歸隅坐讀書一燈熒熒督課夜分弗倦年

未三十而歿諸子服懿訓先後成名雍正二年遇

覃恩贈夫人

王氏山東提學副使孟津王公鑑女奉直壽平公元

配事翁姑以孝相夫子以敬時翁夢仁貧宦氏一

切奩資悉以上翁姑氏早卒繼配張氏性有常度

無疾言遽色姑病湯藥嘗奉必親假寐不離側遭夫姑憂盡誠盡哀時三子年方總角嚴爲課督以至成名稱未亡人者三十二年每坐堂中必東向如對生存前母有弱息氏撫如已出中丞晚育幼子氏以嫂代母教養備至弱冠中丙午副榜自中丞歷宦以及家居皆以家政委氏悉綜理有條以其身爲子爲婦爲母爲師其德可謂女士矣皆以子翼宸雖貴累贈宜人

陸氏太史張符驥妻學憲舜孫女生三月父沒祖母向宜人及其母徐極珍愛之時氏祖歷官齊越家

秦州志

卷之六下

六

頗華廡而氏天性端靜絕無宦家習年十八于歸張世爲諸生無家人產氏黽勉孝養舅姑得其歡心姑嘗笑謂人曰古人云娶婦必須不若吾家者今吾反于勝吾家者而得此賢婦也氏盡廢奩具爲夫助劓劓貲張好結納四方賓客至者氏脫簪珮恐後御姬妾以恩禮有樛木逮下之風焉以覃恩誥封孺人

蔣氏雲貴總督常熟蔣公陳錫女舍人雖元配也性柔順事太翁中丞公姑張宜人皆得其歡心雖官京師氏以姑張宜人有夙疾不忍行獨居奉姑朝

夕不離側以逮姑沒者八年

單恩封孺人

王氏進士都閩劉卜師配幼事嫡母極孝逾于生母
父病足晝夜涕泣侍奉湯藥百日不倦于歸後相
夫成名叔姒有夫婦皆亡而遺幼女者氏撫之如
已女悉以宦橐爲奩資隨任粵東庶弟沒於道氏
殮之而歸其喪內外感之康熙五十二年恭遇

單恩誥封宜人晉階恭人今其子遴孫宗敬名列國
學郡庠

陳氏庠生田嶠生繼妻氏天性婉淑篤孝翁姑嶠生

秦州志

卷之六下

允

苦志下帷博覽羣書食餼有聲氏篝燈佐讀人稱
桓孟夫卒矢節二十餘年葱蓄臧獲莪周貧乏訓
子有則有方試輒冠軍言賢母者又多以氏爲法
焉

宮氏太史偉鏐孫女明經雲宗女田進士廣運元配
也于歸時姑先歿姑亦宮出氏以侄女爲新婦痛
不及親事之廣運家適貧氏治女紅易餐飯以奉
其翁嚴冬十指爲皴裂翁或盛怒必跪以請俟稍
定方起翁久之爲意解嘗語夫曰君祖進士君何
遽不爲進士耶勸學二十年不懈卒成其志初廣

運出繼其伯敬錫錫喜曰汝有賢婦勵汝學且以
事姑者事翁也吾亦豈有他望焉時姑許氏亦先
歿氏如敬錫公所期兩家無間言族黨以爲難廣
運乙酉校書內廷氏課子雲鶴益嚴雲鶴讀書
喜旁涉氏從窓中攬得玉茗還魂記恚曰若欲爲
真才子耶吾但願汝作假道學耳臨歿時聞夫捷
促雲鶴至枕前曰汝父捷差償我願但恐長汝驕
氣也日旋暝廣運終身不更娶以哀其志雲鶴爲
大中丞張漢陽公所知嘗品其文曰意必造奇語
不經人道蓋閩中之督率與庭訓相助云

泰州志

卷之六下

九

繆氏朱士楷妻溫良淑慎有桓孟風楷早沒氏飲水
茹蘖教育藐孤底於成立冢子明經仲子賡南首
拔於遂寧張公有聲庠序皆先後下世氏復以課
孫爲務毫無怨尤年今八十有九孫二人相玉國
學候選州同知式玉業儒

張氏徐鳳生妻事翁姑孝處妯娌和夫堂弟篤生沒
無子婦周氏矢節不貳氏感之曰我若生子必繼
爾夫決不食此言閱五年果產男氏欣然以嗣周
氏相處多年無間言子名漢川周氏節請
旌建坊立祠張後又生三子多孫人謂其賢淑之報

云

丁氏楊森楊椿之母幼熟經書性情端靜孝父母事夫樹勤儉勉操中饋供酒漿半出針指澍卒遺孤尚在襁褓氏清苦矢節凶歲食常不充而事上育下不少缺及子長無力延師凡所讀書多出氏口授日夜有課程不及程則痛哭嚴懲戒毋輕言笑亂步趨令森食餼椿名噪膠庠

劉氏王軾妻軾家世清宦無腴產氏佐以釵環之資家遂豐裕生六子十三孫遊雍序者甚衆今年十月壽九十歲猶清健如常

秦州志

卷之六下

九

黃氏癸卯舉人秦定遠母以賢孝稱自少至老不苟言笑惟持家課子有陶孟風年登九十有七合肥李文定公爲之旌額曰百歲人仙

周氏潘文選妻敬孝姑嫜鄉里以賢淑稱夫中道没矢節撫子成立前牧魏獎曰節孝流輝道憲康獎曰松茂蘭芳

蔡氏儒童沈之模妻孝女蕙胞妹也夫亡子天立嗣子煌愛而兼勞視若親生孝事翁姑慈馭臧獲以及恤鄉里睦宗族閭巷中皆稱道之今年近五十苦節歷三十載

氏宋琅妻性孝謹朴訥事舅姑敬慎夫家中落食
舉案有梁孟風夫亡諸子幼氏痛欲死養而兼
教知次子成勤幹有爲卽令之京効力求名州
大水衣食不給終不召子歸迎養數年復還夫
弟無依命子養殯從厚後成官廣州遇
覃恩賜封孺人

陳氏海寧思南守陳祺永女光祿寺典簿宮翼宸妻
事姑孝姑疾寢興依左右事夫敬夫有目疾經年
氏百計禱求至誠所感目愈如初生一子一女年
三十卒里人賢之

秦州志

卷之六下

九二

徐氏文學陳觀光妻光早卒父母亦相繼而逝氏獨
力殯三喪婚嫁子女皆有條理寡言笑謹儀容閉
戶紡績守志四十年

高氏河南魯山縣令高禹猷次女秉性端莊不苟言
笑初適陳鑽未及終旬郎操持家政奉事兩姑如
所生相夫以德睦妯娌以禮奴婢侍妾馭以恩閨
門中不答撻聲閭里咸稱賢孝焉

葛氏癸丑進士張琴妻生而賢淑氏父成輔晤琴于
維揚賞其文曰此大器也因以氏妻之氏端恪守
婦訓事繼姑馬以孝聞家貧紡績佐夫讀書成名

夫逝撫庶出子女踰于親生孫曾四世數十人悉秉氏教閨門肅如年八十有二季子音婦劉氏亦能通書史守禮義躬操井臼以事姑雖叠遭歉歲而黽勉有無不疎甘旨治家嚴肅持已端莊里人謂其有姑葛氏風

朱氏隱士俞允瑄妻瑄字宣人純孝好學撰有明德篇致知錄二書少貧娶朱氏得內助家少豐三十歲方得子名維植宣人卧病五年劇時囑氏曰予生一子望其成人吾身後可將吾所撰二書時時課之勿負吾志遂卒維植甫十二歲氏延師課

秦州志

卷之六

下

九三

訓每令夜讀紉刺督之子倦氏必述古聖賢孝弟忠義之事警醒告誡以勵其志閱十年凡言動步趨無不求其方正其教育之嚴如此年五十四卒里黨莫不播其壺德稱女丈夫焉

朱氏明經陳仍之妻給諫陳忠靖冢媳氏產名家嫺女誠歸陳克修婦道奉舅姑誠孝飲饌必躬治精潔夜則篝燈紡績以佐夫子以故仍得一意舉子業七試棘闈長子陳闇年十三入郡庠以夫先逝每晨起必號泣視前三年無間因此致疾年六十一卒

韓氏兵巡道崔之四妻性溫恭知大義年十七歸之
四時四復兄仇累年于外後赴滇勤王事氏獨力
操持閨門之內肅若冰霜事太姑曲盡孝養與婦
姆杜情愛倍篤待孤姪爾復如親生杜卽廩生之
一妻也一死仇時爾復方一歲杜篤志守節教以
義方衣帛茹素終身未見喜色氏愈敬禮之卒同
撫遺嬰有成鄉里兩賢之

劉氏中翰候補府佐朱光巒妻前甲辰進士任江西
崇義縣劉玉少女生而穎慧甫三歲父口授毛詩
及禮記內則諸篇卽解大義年十五適朱四教七
秦州志
卷之六 下
九
誠靡不周知能事翁姑相夫子御下以寬待衆以
禮女紅外聞涉書史或吟小詩有林下風味年六
十有六

田氏庠生沈兆隆妻賢孝聞于鄉里訓四子以義皆
遊庠壽九十三人又以賢母稱

沈氏貢生朱王綸妻事翁姑以孝相夫以勤課子以
義下以慈壽八十一

陳氏邑庠生唐日章妻相夫黽勉持家勤儉早年夫
亡惟教子讀書守先人訓子四人仲子麟書增廣
生孫枝蕃茂氏食飴弄孫年登九十有一

蔣氏廩生文名世妻年十六適文姑患氏口吮膿血獲愈數載姑歿遺兩幼叔氏撫養訓課遊泮各爲婚娶相夫讀書著述頗繁三十五歲卒里人悼其賢淑長子治次藻俱能文同列州庠

陳氏王心齋七世孫明經王鳳藻妻幼割股救親長而持家相夫子山斗入庠序長女適房門次女適張門幼俱割股救母娶婦陳氏亦能割股救翁

王氏庠生相宜女太學生陳志球妻端莊和靜孝翁姑睦妯娌處豐嗇順逆從無間言夫病風痰臥床三載艱於言語氏竭心力購參苓衣不解帶多方

秦州志

卷之六下

九

調劑夫疾獲愈歲荒家貧百計輸稅課每午夜挑燈伴子吟誦責以遠大性好施予分食分衣往往有之子纘書紳紱廩膳生次子纘領鄉薦壽今七十九

陳氏邑庠生徐之銑妻事舅姑孝姑羸疾臥床氏抱持乳哺登耄耋小姑適顧早寡氏迎婦垂四十年俾全節終姪流落收育之徐好積善有餘陰濟貧乏嘗見雪中殭者苦無以濟謀諸氏脫纏臂資焉育棄嬰施義塚戶生芝草教子從賢士遊鬻衣留客不懈里中以陶母相比長子泌弱冠受知學憲

鄧殿撰入州庠次禮季澍俱業儒

繆氏歲進士陳志襄妻賦性端嚴相夫以德建祠修史嘗脫簪珥以資匱乏子綬弱冠食餼旋授中翰蚤卒夫繼逝復督兩孫秉鈞鑽肄業成名年近九十健順如常人士咸稱為賢壽云

鄭氏振海女年十五適貢生張應祚孝敬慈和嫻於婦德鄉里賢之祚慷慨喜施氏常脫簪珥助之祚卒氏年廿九守節撫孤闈四十年操持勤苦子孫多入庠序

魯氏宮懋猷之母事嫡恭謹嫡韓氏疾魯氏禱天請秦州志 卷之六下 九六 代割股以進疾即愈生子懋猷克紹家學州人咸以為恭謹之報

孫氏廩貢中書陳綬妻事翁姑以孝稱夫早亡子孱幼氏矢節事上育下足不出戶者二十餘年長

秉憲入泮即亡子婦俞氏年甫二十感姑勸節亦嗣姪韶武矢志侍姑焉

易氏太學生林滋妻滋閩人唐孝子林攢由進士授福唐尉母卒廬墓有甘露白鳥之祥及卒德宗降詔旌表題其墓曰唐孝友林先生墓明時遷泰元孫爾共娶宋氏事孀姑奈氏極孝生滋娶易氏甫

十八歲孝事翁姑及太姑扶持奉養不倦三子一女夫早沒氏延名師紡績以供守節三十五年長子棟太學次枚次相俱業儒有三孫

戈氏太學生陳芄妻嫁年十七時伯母周氏早寡無嗣氏孝事舅姑兼事伯姑姑戴足疾氏嘗藥禮斗求代者三年姑夢中忽覺有人撫其足痛旋止里人謂氏孝格氏出望族父崑玉生子遊庠而絕氏迎養於家及卒慮祭祀不常置買張家堡建塋禮葬祔兄於側墓樹陰翳復以族姪女爲次媳令世世展禮戈墓教子讀書立品後媳戈氏克盡孝道

秦州志

卷之六下

九

氏臨終曰媳孝吾必體吾志助夫母忘外家享祀吾心慰矣卒年六十一

朱氏瞽者華盛先母先早年失怙氏撫瞽子而育之子年七十有二而氏卒時氏年九十有九其未及百齡而惜之

紀氏太學易玕妻相夫持家姻婭奉爲壺範夫沒撫教一子以成立

江氏徐龍津妻生而端慎適徐孝舅姑相夫子夫沒夫節壽至八十有二閱二十餘年子婦朱氏申氏守志教子人謂一門節孝

蕭氏翟士賢妻適翟天性孝友居家克勤克儉未幾夫亡氏守節丸熊畫荻教子義方今其子皆有聲

庠序

張氏庠生錢柱妻夫故氏年廿八撫二子孝事翁姑篝燈課子苦節三十五年

房氏許字周曹氏許字鄧俱未適房歸兄七十卒曹歸毋家餽粥不給女紅自養毋病封股療愈剪髮易未雙瞽死鄉人稱之貞節云

魯氏費永昌妻正德丙子孝廉費曾元孫婦孝敬翁姑翁病疾割股以療愈夫沒氏年三十二矢節教

秦州志

卷之六

九

子成立今年八十六受

恩賜粟帛子孫蕃衍

